

**NATIONAL ASSEMBLY OF
SEYCHELLES**

Wednesday 12th July, 2023

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab; nou zofisye Lasanble ki pe ensiste nou; bonzour bann viziter dan Galeri ki ozordi i en group etidyan Anse Royale. E osi bonzour osi nou piblik ki swiv nou. Mersi zot tou pou zwenn nou pou sa lazournen travay.

Mon a donn loportinite Onorab Lemiel, Manm Elekte pou Anse Royale pou fer byenveni pou son etidyan.

HON SYLVANNE LEMIEL

Mersi Mr Speaker. Bonzour Mr Speaker. Bonzour tou mon bann koleg Manm Onorab; tou bann dimoun a lekout. E en bonzour spesyal pou tou nou bann etidyan S3 ki dan galeri anler, avek zot *teacher* Mis May-Paule Samson.

Mon ti a kontan swet zot labyenveni isi dan nou

Lasanble Nasyonal. E nou konnen poudir Lasanble Nasyonal li menm i form parti enn zot *curriculum*, ki zot aprann en pti pe travay ki en Manm Lasanble i fer. E osi ki rol Lasanble Nasyonal.

Mon espere ozordi ek sa vizit ki zot pou fer e ki pou annan lezot group osi ki pou vini, zot ava aprann byen egzaktaman ki rol en Manm Parlman.

E ki rol, aköz nou bezwen annan en Lasanble Nasyonal? E mon ti a dir zot sezi sa loportinite pou zot aprann *the maximum* ozordi, ganny otan lenformasyon.

E petet demann nou ava war larelev bann *future MNAs*, bann ki pe asiz anler. Mersi.

MR SPEAKER

Mersi Onorab. Mon a donn laparol Onorab Gervais Henrie pou en *matter of privilege*.

HON GERVAIS HENRIE

Mersi Mr Speaker. Bonzour tou dimoun sirtou bann zabitan dan distrik Mont Buxton. E en bonzour spesyal mon ava zwenn Onorab Lemiel pou swet labyenveni bann manmay S3 lekol Anse Royale, e osi Mis Samson taler nou ava ganny sans fer en pti konversasyon.

Mr Speaker, anba *Order 40* mon'n demann ou pou lev en *matter of privilege* konsernan en *item* ki'n pas dan nouvel *SBC* yer swar. Reportaz lo *PNQ* anmennen par Dirizan *Leader* Lopozisyon. I annan 3 *pti issue* avek sa reportaz. Malgre mon dir sa dan tout respektan lendepandans *SBC*.

Dan zot plato dan zot grantit nouvel, *SBC* ti dir e mon site - i ti pe reponn i referans avek Vis-Prezidan i ti pe reponn kekyon bann Manm Lopozisyon an relasyon avek sa lapwentman. E dan plato sa nouvel, zot ti sanze e dir e ki ti swiv apre par kekyon plizyer lezot Manm sirtou dan Lopozisyon.

E apre zot fer en kolaz ki montre bann Manm selman Lopozisyon pe demann kekyon. Mon *issue* se ki zot ti montre kekyon onorab Audrey Vidot, e apre zot met larepons ki mwan ki ti demann e zot a rapel ki lesel lenstans ki Lyetnan Kolonnell Allain Pierre ti reponn en kekyon en Manm yes se letan ler mon ti demann li en kekyon.

Alor mon santi poudir i pa reprezantatif sa ki ti arive dan Lasanble. E mon *matter of privilege* se pou senpleman demann *SBC* pou reflekte laverite sa ki pas dan Lasanble.

Akoz mon ti en Manm parti mazoriter ki ti partisip dan sa *PNQ*. E Mr Speaker, mon pe rezerv mon drwa pou mwan fer en protestasyon ofisyel avek *SBC*, parey mon'n deza fer an Desanm 2022 *via* en let ki zot ti demann mwan en *apology* fason ki zot ti reprezant mon vot dan Lasanble Nasyonal.

So, mon pe rezerv mon drwa pou mwan fer en protestasyon formel avek *SBC*. Mersi.

MR SPEAKER

Mersi Onorab. Mon respekte ou konsern, me mon pa kapab tret li koman en *matter of privilege* Lasanble. Akoz nou napa kontrol lo raportaz ki Lasanble, ki *SBC* i fer lo travay Lasanble. Dan lepase mon'n anmennen serten pwen konsernan kouvertir Lasanble.

Mon sizere ki petet nou kapab rod en mannyer kot sa i kapab ganny fer letan Manm i annan konplent, petet atraver nou lofis Medya. E byensir i a bezwen osi konsiderasyon Speaker, me selman petet nou devret annan en prosedir, e nou a les li koumsa. Mersi.

Nou a komans lo nou biznes ozordi, e sa i Mosyon. Nou annan 2 Mosyon lo *Order Paper*, e premye anliny se en Mosyon dan non Onorab

Gervais Henrie. Onorab mon a demann ou pou soumet ou Mosyon. Met ou Mosyon lo latab.

HON GERVAIS HENRIE

Mersi Mr Speaker. Mosyon ki mon pe table devan Lasanble Nasyonal ozordi i lir koumsa;

Sa Lasanble i demann Gouvernman ansanm avek tou son partner stratezik pou seryezman konsider met an plas en plan e tou mekanizm neser pour ki apartir le 1 Zanvyè 2025, sektè servis piblik e paraetatik, i aret servi larzan likid dan tou zot tranzaksyon finansyel. Mon soumet sa Mosyon avek Lasanble Nasyonal. Mersi Mr Speaker.

MR SPEAKER

Mersi. nou a demann en segonder pou sa Mosyon. Onorab Mondon.

HON TERENCE MONDON

Mersi Mr Speaker. *Motion seconded.* Mersi.

MR SPEAKER

Mersi Onorab. Onorab Henrie, prezan i kapab adres lo son Mosyon.

HON GERVAIS HENRIE

Mersi Mr Speaker. Mr Speaker, ankor enn fwa bonzour tou bann dimoun e mersi Onorab Mondon pou agree pou segonn sa Mosyon. Mr Speaker, Mosyon ki devan nou i senp.

I pe senpleman demande ki enn fwa pou tou, tou tranzaksyon likid i arete dan servis piblik bann antite paraetatik. An dot mo bann servis gouvènmantal e non pa servis prive ouswa servis non Gouvènmantal. Mosyon pe propoz en dele letan pou sa arive, 18 mwan di-si.

Avan ki parti Linyon Demokratik Seselwa LDS ti ranport eleksyon zeneral an Oktob 2020, nou rev se pou transform lekonomi Sesel dan en lekonomi limerik. E kot servis finansyel i vin en nouvo frontyer pou biznes.

Nou laspirasyon i trouve lo paz 22 a 23 nou manifesto ki apel Sesel pou tou son zanfan. Mr Speaker, koman nou'n vini nou pa'n tarde met nou lide an aplikasyon. Dan son premye diskour Bidze isi dan Lasanble an Fevriye 2021, Minis pou Finans, Planifikasyon Nasyonal e Komers Mr Naadir Hassan ti dir e mon site;

“Lemonn in fini antre dan *digital era*. E Sesel pa kapab ganny kit deryer. Sa revolisyon ki lemonn in pas ladan dan

devlopman teknolozi, i kapab anmenn bokou benefis pou nou pei. Nou alor bezwen met an plas bann Polisi ek striktir pou nou kapab devlop nou Sektor *Digital Economy*” Fen sitasyon.

Si nou retourn en pe an aryer, letan i ti vin devan Lasanble Nasyonal pou reponn kestyon lo demars pou pous servis nimerik dan bann Minister, departman avek lazans ouswa *MBAs* an Desanm 2020, Vis-Prezidan Ahmed Afif ti donn en langazman ki di-si lafen 2021, laplipar *MBAs* i ekspekte annan en *point of sales*, ouswa *POS* omwen pou fasilite tranzaksyon finansyel nimerik olye larzan likid.

Ki zistans nou’n arive Mr Speaker? Yer apre, midi mon’n annan en konversasyon avek Kontab Zeneral par enterim dan Divizyon Zesyon kont Piblik ek Trezor Mrs Kareen Bonne. Ki’n dir mwan ki deza 95poursan bann *MDAs* i annan *POS*.

I annan omwen 2 a 3 bann antite ki pa ankor adopte sa metod peyman. Parmi i annan Minister Ledikasyon, e Minister Gouvernman Lokal sirtou bann lofis Ladministrasyon Distrik ouswa *DA’s Office* dan nou bann distrik.

Me an zeneral avek 95poursan i pa mal, i pa move. Nou pe bouz dan bon

direksyon, e mon persyade ki di-si lafen lannen 2023 i ava leka partou. Menm ler detrwa antite parey Lakonpanyen Transpor Piblik *SPTC*, e osi *Seychelles Parks and Gardens Authority (SPGA)* pe adopte en lapros *cashless*. Setadir pa aksepte larzan likid, mon persyade ki i kapab annan *MDAs* ki pou reziste sa sanzman.

E sa i enn bann rezon ki mon’n anmenn sa Mosyon, avek bi azout lavwa e sipor Lasanble Nasyonal dan sa demars. Pa pou Gouvernman *LDS*, me Sesel koman en pei. Mon lapriyer i se ki dwatet devwar e responsabilite tou bann endividi ki a latet bann *MDAs* ki pe kolekte larzan lo lapar Gouvernman, pou servis avek prodwir pou met an plas sa mezir o pli vit posibil.

Kekfwa ou a pe demande ki larzan ki Gouvernman i anmase ki dan term bidzeter nou apel *receipt*? Pli *grosso modo* i bann diferan *form taxes* atraver Komisyon Reveni Sesel *SRC*, ki enkli *personal income tax, VAT, levy, tax biznes, excise tax, duty*, eksetera.

I osi annan lanmann atraver lakour. *Fees* kot Lotorite Plan ouswa Lofis Rezistrar, Biro Imigrasyon, lapolis eksetera. Tiket kot mize

ouswa dan bis, larzan *license*, lavant propriyete, *loan*, bonous lo bann par ouswa *shares* eksetera.

Mr Speaker, kan *SPGA* ti lans son servis peyman limerik pou bann viziter ki oule vizit Zil Curieuse an Zilyet 2022, Sef Egzekitiv sa lotorite Mr Allen Cedras, ti dir ki dan en lannen profitab *SPGA* i merit anmans environ R15milyon, ouswa \$1milyon lo lavant tiket pou vizit sa zil.

Me ou konnen kwa? Akoz sa zafer larzan likid, *SPGA* in perdi lanmwatye sa sonm;-setadir environ R7.5milyon.

Lo kote *SPTC*, dapre en deklarasyon fer par ansyen Sef Egzekitif *SPTC* Mr Patrick Vel, an Novanm 2021, ant Zanvyek Out sa menm lannen setadir 2021, sa lakonpanyen ti perdi en estimasyon R3milyon ouswa 10poursan son reveni.

Sa perd ki apel *leakage* an Angle, i ler pasaze i pey zot pasaz selman zot pa ganny tiket avek drayver. Ler pasaze pa ganny en tiket, *SPTC* pa kapab rikord sa tranzaksyon.

I fermal pou mwan koman en Seselwa ki bann sonm parey pa pe antre dan kof Leta pou ed mon distrik ganny *bus shelter*, lalimyer avek *bin site* ki i byen bezwen.

Ouswa pli enportan logmantasyon saler ouswa sekirite e benefis sosyal, ki a satisfere tou dimoun. Mr Speaker, zis atraver sa 2 legzanp, i kler ki nou bezwen elimin litalizasyon larzan likid kot i konsern koleksyon reveni Gouvernman.

Annefe si mon osi rapel demann Minis Hassan avek Gouvernman Leta z-Ini, an Septanm lannen 2021, i ti dir ki pei i mank abilite pou fer lenvestigasyon, anmenn ka ki solid pou asir prosekisyon ki pou reisit dan bann ka koripsyon.

Alor i ti demann Gouvernman Ameriken pou sipor teknik pou *SRC* avek Divizyon *Customs*.

I ti promet ki disi 2022 Gouvernman *LDS* pou bous tou trou kot reveni pe koule e perdi dan sa 2 antite. E zisteman Mr Speaker, *SRC* in ganny en nouvo *platform* peyman limerick, ki en modifikasyon sa enn avan pou fasilite par egzanp koleksyon sa R6.5 bilyon an 2021, avek sa plis ki R19,993 *taxpayers* laplipar bann dimoun biznes.

E san obliy koleksyon *personal income tax* ki bokou plis ki 100 ankor. E osi atraver *VAT*.

Minister Finans, ansanm avek Labank Santral in fasilite kreasyon en lot kont apard sa enn 1401 spesifikman pou SRC, pou fasilite rekonsilyasyon son reveni.

Apard SRC, resaman nou'n vwar e antann osi lensman bann platform peyman limerik pou biro Rezistrar Zeneral, Lotorite Plan avek Lotorite *Licensing SLA*. PUC i lot antite leta kot i annan son prop *platform* peyman. Akoz risk frod, vol ek pert reveni, Lasanble atraver sa Mosyon i rekonnet ki;

1. Si nou aret fer tranzaksyon larzan likid dan Gouvernman, sa i ava elimin tou risk e difikilte administrativ e osi kou asosye avek sa bann tranzaksyon.
2. Nou pou amelyor lefikasite e trouv benefis maksimonm, dan zesyon kont piblik.
3. Nou pou pe ankouraz lilizasyon teknolozi dan sistenm peyman Gouvernman, anliny avek stratezi lekonomi nimerik ki Gouvernman pe ankouraze.
4. Nou pou redwir potansyel bann aktivite ilegal e mal onnet. E

5. E nou pou pe siport stratezi Gouvernman pou amelyor lanvironnman biznes e posibilite fer biznes Sesel atraver adopsyon en sistenm peyman ki pli efikas.

Mr Speaker, mon pa pou kapab kontiny argimant adopsyon sa Mosyon, san rekonnet e salye zefor sak endividi ki ziska la in pouse pou sistenm finansyel Sesel vin nimerik.

An di-z-an sa mon pe rekonnet, mon repete - an di-z-an sa mon pe rekonnet e apresye ki avan *LDS* in vin o pouvwar, in annan bokou demars e travay ki'n fer pou nou ariv kot nou ete ozordi.

Mazorite sa bann travay in fer par Departman Lenformasyon Teknolozi avek Kominikasyon (*DICT*), Labank Santral (*CBS*) avek sipor diferan partner etranze.

E osi avek konsiltasyon sektor prive atraver Lasanm Komers Sesel (*SCCI*). Sa bann travay in prensipalman konsantre lo en stratezi avek 3 pilye.

1. Letablisman lenfrastruktir nimerik konvenab pou enspir konfyans kliyan dan servis e en o nivo sekirite.

2. I konsern tou laspe legal sa stratezi ki annan relasyon avek bann lamannman dan *National Payment Systems Act, Financial Institutions Act e Cyber Crime Act.*

In osi enkli lentegrasyon teknolozi dan servis finansyel. E kot nou'n vwar Gouvernman e sekter prive tou lede pe byen servi legzistans sa zouti. Mr Speaker, Gouverner Labank Santral in fer kler ki i pa lentansyon Sesel pou vin en *cashless society.*

Setadir enn kot larzan likid i aret ganny servi net, ouswa ban pou servi en mo radikal. Sa pa ditou lentansyon, me pou fer Sesel vin en *cash-lite society.* Setadir enn kot tranzaksyon likid i redwir konsiderableman. Alor lentansyon sa Mosyon nou pe dir avek Gouvernman diriz par legzanp.

Tranzaksyon finansyel nimerik i annan bokou lavantaz, parey bann ki pe servi sa servis ozordi i kapab temwaye pou servi mwens letan pou fer okenn tranzaksyon. Akoz ou kapab nenport landrwa ki konvenab pou ou fer sa tranzaksyon.

Alor i ofer ou sa fleksibilite e konvenyans. Ou kapab

fasilman gard rikord ou tranzaksyon akoz rikord bann tranzaksyon i presi. Tranzaksyon i vit, e byensir apre nou leksperyans *COVID-19* tranzaksyon nimerik i pli izyenik e an bonn sante.

Mon pe ekspekte bann Manm ki pou entervenir pli tar devlop sa bann largiman pou e kont lutilizasyon larzan likid vizavi tranzaksyon nimerik anplis detay. Me lefe i reste ki swa e laliberte personnel i o milye sa deba, i annan ki pou vin dir nou, nou pe al en pe tro lwen.

Ki nou pou pe penaliz en group dimoun par kit dekote ouswa kit zot deryer. Dan sa 18 mwan ki devan nou - akoz Mosyon pe demande ki sa mezir i vin anfers apartir le 1 Zanvye 2025 - nou oblize akomod dimoun ki annan diferan bezwen.

Nou oblize adres lenpak ki en desizyon pou pa kontinyen aksepte larzan likid dan tou servis Gouvernman e son bann antite paraetatik pou annan lo bann ki napa en kont labank, ouswa kart labank.

Ki mannyer pou enpakte bann ki pa doue teknozikman. Bann ki annan dezabilite mantal e osi bann aze ki pa doue avek teknolozi modern. Me ankor nou bezwen

regarde kote nou ete ozordi. Ki zistans dan sa evolisyon nou'n arive. Eski nou pou kal lanmenm? Nou pou retourn an aryer e reste a kote bann ki per avans devan ouswa nou konsey zot ki nou pa pou kapab anpes modernite.

Zanmen mon a obliy sa zour ki mon ti vwar Mr Frazer Jeremy pe asize anba batiman *Quadrant* e pe pey son bil *PUC* lo son telefonn portab. Sa ti menm avan mwan, mon komans servi sa portab. Ler mon vwar Mrs Jenna Tomkin pe poste lo *Facebook*, ouswa Mrs Jocelyne Florentine pe partisip aktivman dan group *WhatsApp*.

La mon pe koz lo bann zabitan Mont Buxton ki annan 70an e plis. Zot bann legzanp tipik, bann aze ki avanse teknozikman e annan kiryozi pou kontinyen aprann. Alor ler mon regard zot, mon napa krentif ditou, ki i pou difisil sansibiliz larestan popilasyon pou famiyariz zot avek sa bann nouvo peyman modern.

Mr Speaker, an gran parti laplipar kliyan Gouvernman pa pe pey li avek larzan likid ozordi. Laplipar biznes avek endividi pe servi mwayen transfer labank, kart labank ouswa kaye *cheque* pou pey Gouvernman. Zot aksyon ozordi

i fer ki i senplifye, swe Lasanble kot nou pe senpleman demande ki nou akseler nou zefor termin sa tranzaksyon dan nimerik dan Gouvernman.

Ki tou akter i armoniz nou lanbisyon nasyonal. E ki koman en pei e en pep nou partaz sa lanbisyon komen pou transform nou pei dan enn ki modern. Si nou fer sa Sesel pou zwenn sa gran kominote nasyon, ki pe bouz ver mwens litalizasyon larzan likid.

Par egzanp, 2 *survey* fer an 2019 in prouve ki tranzaksyon ek larzan likid ti vo zis 1 poursan *GDP* Laswed. Lanorvez sa sif i ant 3 a 5 poursan son *GDP*. Dan son vizyon 2030, Larabi Saoudit pe target 70poursan tranzaksyon finansyel ki pa pou avek larzan likid.

Ziska prezan sa lannen, 73poursan tranzaksyon finansyel Emirad Arab Ini ouswa sa ki nou apel *UAE* pa dan larzan likid. Sa i en gran logmantasyon sorti 39poursan an 2018. Dan en *survey* ki ti fer atraver lemonn an Novanm 2022, in vwar ki dan 54 pei parmi sa 195 pei i an faver en rediksyon dan tranzaksyon larzan likid.

Lo kontinan Lafrik, i annan *Kenya*, *La Tanzanie*, *Uganda*, *Cote d'ivoire*, *Lezip*,

Nigeria, e *Afrique du Sud* ki an faver en tel mezir. *La Tanzanie* par egzanp zot dir en tranzaksyon ki ti pran en lazournen antye aprezan i pran lerdan pou fer.

E *Uganda* sa ki ti pran berdtan, pe pran 40 minit akoz tranzaksyon nimerik dan Gouvernman ouswa dan servis piblik. An konklizyon Mr Speaker, kestyon ki sak Manm ki anvi entervenir lo sa Mosyon i dwatet donn nou en larepons lo la se; eski i posibil pou aret servi larzan likid dan servis piblik e bann lorganizasyon paraetatik, dan sa prosen 18 mwan?

Si zot krwar wi, mon ekspekte zot dir nou bann lavantaz sa desizyon e ki size bann zofisye ki fer Polisi i merit pe pran kont e ki mekanizm zot merit pe met an plas, pou asire ki okenn kous nou popilasyon pa ganny kit deryer.

Si zot krwar non, zot merit dir nou ki opsyon Sesel pou annan pou egziste dan en lemond kot tou keksoz pe bouz lo *platform* nimerik. E la realite ki pou komanse pou annan rezistans vizavi sa lide, sirtou par bann ki pa abitye avek sa fason fer e i pa oule sanzman.

Sa ki nou pou bezwen pe met en kantite lenerzi ladan, se sanz fason panse e permet

dimoun vwar benefis en tel linisyativ. Pourtan Mr Speaker, i annan en legzanp model lanmenm ater avek nou, ki laprev ki sa ki sa Mosyon pe demande i posibil.

Depi 2015 - setadir 8an pase lakonpanyen *Seychelles Breweries* ti deside al *cashless*. Napa en tranzaksyon larzan likid ki deroule dan sa lakonpanyen ki baze Le Rocher. Tou tranzaksyon finansyel i atraver transfer labank, kart labank ouswa *cheque*. Menm *petty cash* pou aste bann pti keksoz ki sa lakonpanyen i bezwen servi lo en baz toulezour, depi bann zafer netwayaz, *toilette paper* e tousala pa servi larzan dan *Seybrew*.

Me zot annan en sistenm kart ki zot in entrodwir pou bann zofisye administratif, ki annan responsabilite pou *procure* sa bann lartik i gannyen. Apre sa i re ganny rekonsilye dan zot bann sistenm entern anndan, setadir napa larzan i *cashless*.

Alor Mr Speaker, si en lakonpanyen prive ki anploy 180 travayer ki an 2022 ti annan en *annual turnover* lavalè R500milyon e ki lannen pase ti fer en profi R142.9milyon konpare avek 95.9milyon an 2021, li in kapab

aret servi larzan likid atraver son loperasyon komersyal, mon pa vwar rezon pou okenn nou la anndan argimante ki servis piblik e bann lorganizasyon paraetatik pa kapab fer parey. I annan en legzanp devan nou depi an 2015. Avek sa *I rest my case*. Mersi Mr Speaker.

(APPLAUSE)

MR SPEAKER

Mersi Onorab. Zis pou fer en pti koreksyon lo en sif ki ou'n donner an referans avek la perd kot *Marine Parks Authority* ou'n dir 705milyon, mon krwar ou sif ki ou'n donner avan i montre poudir i devret 705mil. So, zis pou met sa pti koreksyon. Nou a kontinyen avek ladres par segonder Mosyon, Onorab Mondon.

HON TERENCE MONDON

Mersi Mr Speaker. Dabor mon oule dir bonzour tou bann zanfan dan Galeri, e avek zot ansennyen. E tou dimoun ki pe ekout nou.

Mr Speaker, Mosyon pe demande ki tou peyman tradisyonnelman peyman likid i ganny ranplase par peyman nimerik dan tou tranzaksyon servis piblik. Menm si Mosyon i tre kler, i vize ver en target spesifik.

I enportan ki nou osi regard sa size dan konteks sa revolisyon global anver en lekonomi nimerik. Leksperyans bann pei ki pli avanse ki nou, in trouve ki tranzaksyon nimerik i anmenn bokou benefis pou pei. Peyman limerik i bokou pli *secure*, e i pran detrwa segonn pou konplet en tranzaksyon.

I pli fasil pou swiv en tranzaksyon nimerik ki fer ki en aktivite frod oubyen *misappropriation* i kapab vitman ganny retrouve. Anplis ki sa, i pli fasil gard rikord bann tranzaksyon nimerik.

Ler ou pran kont kou en tranzaksyon peyman nimerik e lakantite tranzaksyon ki pase dan bann lorganizasyon piblik, i kler ki nou meyer opsyon se pou bouz lo sistenm peyman nimerik o pli vit posib.

Loter Mosyon in propoz le 1 Zanvyè 2025, mon krwar ki sa dele letan i rezonnab e Gouvernman i devret kapab fer sa arive. Mr Speaker i neserer pou tou lazans Gouvernman fer sa tranzisyon. Mon rekonnèt ki in annan bokou zefor par nouvo ladministrasyon pou met an mars sa prosesis an transformasyon.

Plizyer platform in ganny entrodwir ki ofer plizyer opsyon enteraksyon pou zot kliyan. Nou osi konnen ki plizyer lezot

proze i dan prosesis lenplimantasyon. Par egzantp *ASYCUDA World* kot *SRC Custom* pe ganny devlope avek son prop sistenm peyman nimerik.

Enn bann stratezi enportan ki pe ganny enplimante par sa nouvo ladministrasyon, se kreasyon en lekonomi nimerik. i ankourazan pou war bann akter dan sekter finansyel anba sipervizyon Labank Santral Sesel, pe byen sezi loportinite pou moderniz zot servis.

Ler Gouverner Labank Santral i dir nou ki sa lenstitisyon i reste angaze pou siport Gouvernman dan sa stratezi modernizasyon, mon vremen ankouraze avek sa kolaborasyon ant Gouvernman sekter piblik e prive ki enkli tou bann lenstitisyon finansyel, i ekstrememan enportan.

Se sa zefor kolektiv ki Sesel i bezwen pou fer sa diferans pou son zanfan. Rapor anyel Labank Santral pou 2022, i osi prezant travay ki sa lorganizasyon in akonpli pandan sa lannen. Parmi i bann linisyativ ki konplimant devlopman lekonomi limerik.

Proteksyon konsonmater finansyel, ledikasyon finansyel, *settlement* atraver frontyer, proteksyon *data* e *cyber*

security parmi bann lezot. Mr Speaker, nou'n osi vwar Gouverner Labank Santral dan en konferans lapres, pe koz lo nesosite pou ranforsi konektivite ant diferan rezo enformatik.

E fer akse avek *internet* vin pli konsistan e abordab. Akse avek finans pou bann pti e mwayen antrepriz. *MSMEs*, i en lot eleman enportan pou akseler sa prosesis modernizasyon sekter finansyel. plan modernizasyon sa labank i osi enkli devlopman en sistenm peyman nasyonal.

E lentansyon se pou annan en sistenm ki abordab robis e byen proteze. En sistenm ki pou aksesib lo diferan *platform*, enkli akse atraver en telefonn mobil. *Seychelles Electronic Funds Transfer (SEFT)* ki Gouvernman i servi pou fer peyman saler travayer dan servis piblik, i legzanp peyman nimerik.

E atraver sa Mosyon, nou pe demann Gouvernman pou ankouraz lenplimantasyon sistenm peyman nimerik. E fer ki tou lorganizasyon dan domenn piblik i adopte en sistenm peyman nimerik pou zot kliyan.

Rediksyon dan *service charge* pou marsan, lo peyman avek kart in posib avek

langazman *visa* ek lezot akter dan lendistri finansyel. Dapre sa rapor sa linisyativ in kre en logmantasyon dan lakantite marsan ki'n aksepte peyman avek kart atraver *point of sale systems*.

Payman atraver *SEFT* i *free of charge*, ki enkli *internet banking platform*, *Mobile Banking Apps* e lezot *interbank transfer*. I annan plizyer diskisyon ki pe pran plas lo size teknolozi finansyel, par egzanp nesosite pou met an plas en striktir pou zer peyman o nivo lokal.

Nouvo *incentive* pou dekouraz dimoun servi larzan likid, oubyen *cheque*. E linisyativ pou ankouraz peyman nimerik. Linisyativ lo ledikasyon finansyel devlope par Labank Santral i vreman enportan. Sa linisyativ i promouvwar enklisivite finansyel kot serten kous nou popilasyon i kapab partisip dan aktivite dan diferan aktivite pou akimil konesans nesese lo bann servis finansyel.

Lamazorite zenn Seselwa i devret kapab adopte sistenm finansyel nimerik, dan zot lavi toulezour. Prenan kont volim biznes ki sorti dan sekter piblik, enkli bann lantrepriz piblik e kou tranzaksyon pou peyman nimerik,

Mon kapab dir ki lenvestisman dan lenfrastriktir ek tout teknolozi finansyel, i enn ki vo lapenn. Nou bezwen ankouraz letablisman nouvo platform teknolozi finansyel. Labank Santral i deza fer provizyon pou entrodwir nouvo lenfrastriktir pou sistenm peyman, parey *Apple Pay*, *Samsung Pay*. Lenfrastriktir teknolozi i esansyel pou devlopman servis finansyel.

Me i osi enportan pou konsonmater reste angaze dan sa proses e kontinyen valoriz bann servis finansyel nimerik. Sekter prive i annan en plas enportan dan devlopman sekter finansyel. E nou ekspekte plis devlopman dan sistenm peyman nimerik ki pli konvenyan pou kliyan.

Dan sa bann dernyen lannen, nou pe vwar laplikasyon lentelizans artifisyel dan bann sistenm peyman nimerik. Tou tranzaksyon *online* i bezwen en sistenm deteksyon kont frod. E i enportan pou note ki sistenm deteksyon i bezwen evolye pou kapab dil avek diferan frod ki egziste ozordi.

Lentelizans finansyel i ofer sa posibilite pou adres bann defi ki Lendistri Finansyel pe fer fas avek. Lo en nivo global, sistenm peyman nimerik in

bouz dan en fason ekstraordiner, dan sa dernyen deseni. Sa in ariv atraver devlopman rapel, rapid dan teknolozi. E lezot lenfrastruktir sipor sirtou avek adopsyon *smartphones*.

E osi avek bann standar etabli dan sistenm peyman global, atraver *ISO—2022*. Pandemik *COVID-19* in osi zwe en rol katalis e in akseler adopsyon sistenm nimerik. Dapre prozeksyon bann *expert*, krwasans dan tranzaksyon *non-cash* i ekspekte grandi par 17poursan anyelman. Pou ariv plis ki 2.1 trilyon tranzaksyon an 2026.

Tranzaksyon atraver kart i premye lo lalis, me nou pe osi vwar gran logmantasyon dan *Mobile Wallets*. Peyman atraver *QR Codes* pou depas 2.2 bilyon an 2025. Laplikasyon *Blockchain* e *peer-2-peer (P2P)* i bann nouvo teknolozi ki lemonn pe rapidman adopte.

Dapre Labank Mondyal, lekonomi nimerik i reprezant 15 poursan *GDP*, globalman. Lekonomi nimerik pe agrandi 2.5 fwa pli vit konpare avek lekonomi fizik.

Mr Speaker, ler konsonmater i swazir peyman nimerik oubyen larzan likid pei i bouz ver sa ki nou apel en *low cash economy*. E sa dan li

menm i anmenn plis lefikasite dan pei.

Mr Speaker, i enportan pou fer sa distenksyon ant en *low cash* e en *no cash economy*. Nou pa pou kapab elimin larzan likid, si non nou pou annan dimoun ki pou war zot an deor sistenm finansyel.

I osi enportan, pou asire ki bann dimoun ki napa akse avek teknolozi, zot osi kapab kontinyen rezouir zot lavi toulezour. Mr Speaker avek sa mon remersi ou.

(APPLAUSE)

MR SPEAKER

Mersi Onorab. Pou kontinyen deba, nou a pran laparol Onorab Philip Arissol.

HON PHILIP ARISSOL

Mersi Mr Speaker. Bonzour Mr Speaker, tou zanfand ki dan graden anler. Tou dimoun ki pe swiv nou. Mr Speaker, sa Lasanble pe demann Gouvernman ansanm avek tou son partner stratezik, pou seryezman konsider met an plas en plan e tou mekaniz neser pou ki apartir le 1 Zanvye 2025, sektor servis piblik e paraetatik i aret servi larzan likid dan tou tranzaksyon finansyel.

Mr Speaker, sa i Mosyon anmennen par Onorab Henrie. Sa Lasanble pe fer en demann pou ki tou tranzaksyon finansyel, ki konsern sektor servis piblik e Paraetatik i ganny fer dan en fason elektronik apartir le 1 Zanvye 2025. Pou sa kapab anmenn bann lavantaz konkret ki pou benefisye nou tou.

Premye lavantaz, ki nou bezwen konsider sa mezir pou ede redwir risk frod letan nou servi larzan likid. I annan risk pou perdi, ganny vole ou menm nou kapab pe servi fo larzan san realize. Sa pa pou kapab arive si nou pe servi bann sistenm nimerik, ki pou permet tou tranzaksyon finansyel ganny fer direk.

Bann sistenm nimerik, i annan bann mekanizm ki pou protez, protez nou kont frod. E sa pou permet nou fer sa tranzaksyon finansyel an tout sekirite. Mr Speaker, dezyenm lavantaz, se ki pou amelyor transparans finansyel. Ler nou pe servi larzan likid pam souvan ki nou gard en rikord lafason ki sa larzan in ganny depanse.

Ki nou'n fer avek? Konbyen nou'n depanse ou servi? E ki bann benefis ki nou'n resevwar. Me kan nou pe servi sa sistenm nimerik, tou sa

bann lenformasyon pou anrezistre. E pou kapab fasilite verifikasyon e kontrol. Setadir nou pou annan rikord okenn tranzaksyon.

En lot lavantaz, se i pou kapab amelyor lefikasite. Kan nou servi larzan likid, nou oblize deplase nou menm pou fer sa tranzaksyon. E sa i pran letan. Letan ki nou kapab pe servi pou fer lezot travay, ou aktivite pli enportan. Letan nou servi sa bann sistenm nimerik, nou kapab fer sa tranzaksyon finansyel kot ou lakour, dan ou landrwa travay. Setadir ou kapab fer sa tranzaksyon san bezwen fer okenn deplasman ou menm.

Mr Speaker, sa pou permet fer pou permet nou fer nenport tranzaksyon pli rapidman. E sa pou permet nou ganny plis letan ki nou kapab servi pou fer bann lezot aktivite ou travay ki pli enportan.

Mr Speaker, 2 semenn pase nou fek debat lo en Mosyon anmennen par Onorab Zialor kot nou ti pe demann pou en Polisi Nasyonal pou garanti en sosyete pli enkliziv pou dimoun ki pe viv avek dezabilite.

Kan nou servi sa sistenm nimerik, dan tranzaksyon finansyel, sa osi pou kapab permet nou servi sa bann

dimoun ki pa kapab deplase. Si en dimoun i annan difikilte pou deplase, e i pa kapab ganny akse avek larzan likid, sa i kre en kantite difikilte retar dan bann servis ki sa dimoun i bezwen.

Mr Speaker, letan ki nou servi sistenm limerick, sa pou permet nou servi sa bann dimoun osi. E li osi sa dimoun i kapab fer tranzaksyon finansyel kot son lakour. Sa pou permet li ganny akse ek bann servis ki i kapab, ki i pa kapab gannyen oparavan.

Sa pou osi permet amelyorasyon dan bann servis e permet rapid, rapidite dan bann peyman.

Mr Speaker, pou kapab met an plas en plan tou mekanizm nesaser, pou ki sekter servis piblik e paraetatik i aret servi larzan likid dan tou tranzaksyon finansyel, nou bezwen travay ansanm avek bann partner stratezik.

Sa pou permet nou pou kapab benefisye ek bann lekspertiz e resours ki bann *partner* i annan. Enn bann *partner* ki kapab ede, se bann lenstitisyon finansyel. Bann lenstitisyon finansyel i annan bann teknolozi avanse, ki kapab permet nou fer tranzaksyon finansyel direk.

Zot kapab ed nou met an plas bann sistenm nimerik, ki pou permet nou servi bann kliyan pli byen. Zot kapab ofer nou bann solisyon teknolozi avanse, ki pou ede protez nou kont faid. E pou permet nou amelyor lefikasite. Mr Speaker, en kot partner i kapab ede se bann Lenstitisyon Leta.

Bann lenstitisyon Leta i annan bann mekanizm ki kapab permet kontrol lo depans Gouvernman. E sa i kapab amelyor transparans finansyel. Bann partner ki annan teknolozi avanse pou kapab ede. Ed nou met an plas bann sistenm ki pou permet nou fer bann tranzaksyon finansyel direk.

Zot kapab ed nou met an plas bann aplikasyon, ki pou permet nou fer peyman pli vit. Zot kapab osi ed nou met an plas bann sistenm ki pou permet nou fer bann tranzaksyon finansyel direk, avek bann komersan lokal e osi enternasyonal.

Mr Speaker, lorganizasyon sivil i en lot partner ki kapab ed nou dan sa demars. Bann lorganizasyon sivil, i annan bann rol enportan ki pou ed nou edik nou bann dimoun lo mezir ou sa mezir. Zot kapab ed nou sansibiliz bann dimoun lo lavantaz ki pou annan pou servi

sa bann sistenm nimerik. Zot kapab osi ed nou fer bann konpany pou edik bann dimoun lo lafason pou servi sa sistenm nimerik.

Mr Speaker, demann pou met an plas en mekanizm pou sekter servis piblik e paraetatik sispann lilizasyon larzan likid dan tou tranzaksyon finansyel, apartir le 1 Zanvye 2025, i annan en kantite lenportans e lavantaz. Anplis letan ki nou pa pe servi larzan likid, dan tranzaksyon finansyel, sa i kapab permet nou plis linovasyon dan sa bann sekter.

Nouvo teknolozi i kapab ganny enplimante e aplike pli byen. Tel ki peyman limerik, aplikasyon mobil, e lezot solisyon digital ki kapab fasilite akse avek servis piblik pou popilasyon. Sa i kapab amelyor latransparans, e diminyen baryer dan itilizasyon pou fer okenn tranzaksyon finansyel.

Mr Speaker, mwan mon pou aport mon sipor pou sa Mosyon. Mersi.

(APPLAUSE)

MR SPEAKER

Mersi Onorab. Laparol i prezan pou Onorab Kelly Samynadin.

HON KELLY SAMYNADIN

Mersi Mr Speaker. Bonzour tou mon bann koleg Onorab; tou dimoun a lekout e tou etidyan ki prezan dan Galeri. Mr Speaker, avan mon komanse permet mwan mon swet tou etidyan dan Sesel en bon Lasemenn Karyer. Mon swete ki zot ava profit maksimonm pou rod lenformasyon lo zot fitir karyer. E ki zot ava fer plis refleksyon lo kwa ki zot merit fer an term letid, pou asire ki zot pe travay pou ariv ver karyer zot rev.

Mr Speaker, dan en sosyete ki *cashless* bann tranzaksyon finansyel pa ganny fer avek larzan biye oubyen *coin*. Me plito avek lenformasyon limerik ki byensir i en reprezantasyon lazan elektronik.

Dimoun i ganny posibilite pou transfer larzan nimerikman, swa par kart kredi oubyen *debit*, transfer elektronik, *crypto currency*, e osi bann servis peyman *online* oubyen an itilize en telefonn tel koman *PayPal* ou ek *Apple Pay*.

En sosyete ki *cashless* i egziste dapre ban Polisi gouvènmantal ki'n ganny etabli, pou fasilite sa bann tranzaksyon. Malgre ki napa en sosyete ki antyerman *cashless*, bokou *economist* i krwar ki

bann preferans konsonmater, bann presyon konpetitif li biznes, e bann profi ki an demann par labank, i kapab vitman anmenn ver son progresyon gradyel.

Bokou eksper i krwar ki *Sweden* i pei ki'n bouz *cashless* pli vit. Larzan an nespes parey nou dir an Franse i ganny servi dan mwens ki 15 pousan bann tranzaksyon dan sa pei. E son valer an sirkilasyon in desann signifikan pandan 21enm syek. Ki aprezan reprezant apepre 1 pousan zot *GDP*.

Bann *retailers* Seselwa, ensi ki bann restoran i ganny legalman permet pou refiz peyman *cash* senpleman par poste en lafis. I enportan pou note ki plis ki lanmwatye bann labank sa pei, i nepli zer tranzaksyon *cash*.

Mr Speaker, mon'n kapab temway sa pandan ki mon ti lo en vizit lesanz dan sa pei an 2018. Kot zot ti sok mwan a sa letan pou vwar ki lilizasyon *cash* ti preski in-egzistan pou laplipar tranzaksyon. Pou servis bis piblik oubyen tren, mon ti bezwen aste mon tiket *online*, si mon ti napa en kart bis, oubyen si mon pa ti'n ganny sans resarz mon kart, ki li osi ou bezwen fer *online* dan serten magazen, oubyen kot

stasyon servis ki li osi ou bezwen fer *online*.

(Eskize Mr Speaker, mon a rebran) Pou servis bis piblik oubyen tren, mon ti bezwen aste mon tiket *online* si mon ti napa en kart bis, oubyen si mon pa ti'n ganny sans resarz mon kart ki li osi bezwen fer *online*; dan serten magazen oubyen kot stasyon servis transpor piblik. Bann tranzaksyon dan laboutik, osi byen ki bann lezot form peyman ti bezwen ganny fer avek kart banker.

Granmersi mon ti ase abil avek sistenm nimerik, si non mon ti pou dan mal. I osi enportan pou note, ki bann Labank Santral dan plizyer pei in entrodwir *Government Back Digital Currencies* pou ranplas oubyen konplemant lazan papye ek *coin*, avek bi pou fasilite tranzisyon pou vin *cashless*. E sa i plizoumwen en form lanmonnen ki pa ganny atase avek komodite fizik.

Mr Speaker, letablisman en sosyete ki *cashless*, i anmenn plizyer benefis. Premyerman i permet en sitwayen santi ki son larzan i pli an sekirite.

Letan ou larzan i dan en kont banker, dan bann *assets* oubyen lenvestisman ou plizoumwen napa okenn sans pou ou ganny vole, perdi

oubyen ganny andomaze parey larzan papye. E atraver bann diferan mezir sekirite ki ganny met an plas, en dimoun pa bezwen trakase ki son larzan pa ava tonm dan move lanmen.

Dezyenmman Mr Speaker, i permet bann endividi pou kapab investir pli byen zot larzan. Letan ou met ou larzan dan en *savings account* i ganny lenter. Deplis en dimoun i annan opsyon bann lenvestisman parey *neutral funds* ek bann *fixed deposits* par ki ou ganny bann *returns* dan en peryod letan.

De lot kote, valer larzan papye i diminyen a longer ditan. En lot benefis dan sosyete *cashless*, se ki i permet bann endividi pou pli zer zot larzan. En *bank statement* i permet ou pou *monitor* ou bann reveni, depans, *savings* ek retour ou bann lenvestisman.

I pou osi permet ou pou fer bann plan kour mwayen e lonterm ki swa familyal, ledikasyon, oubyen lezot lenvestisman.

Mr Speaker, kekfw a i ti ava byen ki en *Mobile Wallet App* lokalize i ganny entrodwir, kot bann endividi i kapab servi pou fer peyman avek bann *retailers* ganny akse avek bann sit *e-commerce*, ensi avek bann lezot *service providers*.

Akoz sa i kapab permet pou fer plizyer tranzaksyon anba en sel parasol. Mon ti a kontan felisit bann diferan lakonpannyen telekominikasyon, tel ki *Airtel* avek *Cable & Wireless* ki'n fer provizyon peyman *bills* telefonn ek litilite, fasilite pou resarz telefonn ensidswit atraver zot bann *kiosk* ki kapab ganny trouve en pe partou atraver pei.

Sa i permet zabitan evite voyaz bann long zistans, e osi fer bann gran laliny pou kapab ganny akse avek peyman. Me par kont Mr Speaker, i annan bann departman ek *service providers* ki zot prosedir administrativ i vremen long, malgre ki tranzaksyon i ganny fer *online*. *Invoice* i ganny anvoye par *email*, me apre kliyan i ganny demande pou fer peyman atraver Labank Santral, kot la i ganny dir pou pran a pepre 3 a 4 zour pou ganny *clearance*. Sela kot kliyan i dezapwente, e i dir pou plito i al fizikman kot sa biro e kot son prosedir tranzaksyon i dir pou mwens letan.

Mon pe rekomannde ki sa sityasyon i ganny get ladan pou kapab asir satisfaksyon kliyan, ensi ki ankouraz plis dimoun pou fer peyman online.

Mr Speaker, mon pa pou long. Me avan mon terminen

mon ti a kontan demann avek tou bann *service providers* ki ti a kontan war scope zot *online cashless* kliyantel agrandi, pou mazin entrodwir bann promosyon ek *discount* ki atiran.

Mon konnen ki i annan ki'n komans fer li, me mon pe ankouraz lezot ankor pou komans *venture* ladan. Petet zot pa pe realize, me sa i en fason pou zot biznes epanouir.

Mr Speaker, pou reponn keston loter Mosyon lo son lentervansyon, mon krwar i posib pou lamazorite popilasyon, ki i posib pou lamazorite popilasyon al *cashless*, me ledikasyon i reste touzour en laspe enportan.

Nou konnen ki nou dan *digital age*, kot bokou zenn i byen verse nimerikman. Me lafason ki zot zwer sa konesans i osi enportan. Mon demande ki Minister Ledikasyon i regard dan lafason ki sa i kapab antre dan *curriculum*, petet dan laklas *PSCE* dan konteks *Civic Educations*.

Nou osi pa kapab obliy nou bann dimoun aze, e bann ki pe viv avek dezabilite nou pa pou kapab kit zot deryer. Sa tranzisyon i bezwen enn ki enkliziv. Pete bann sesyon lo nivo distrik i kapab ganny fasilite par bann lenstitisyon

finansyel, an partenarya avek Lotorite Distrik pou ed zot konpran pli byen lemonn limerik.

Sa osi byen ki mazin nou kreasyon bann *visual hearing aids* parey nou war lo bann masin *ATMs*, pou permet sa group dimoun ensi ki bann ek dezabilite kapab bouz *cashless* egalman parey zot sitwayen.

Pou konklir Mr Speaker, mon oule felisit loter Mosyon, akoz koman en pei Sesel i bezwen bouze ansanm avek larestan lemonn an sa ki konsern limeralizasyon. E Gouvernman ensi ki lezot partner, i bezwen fer sir ki i annan lankadreman nesese an sa ki konsern servis e akse, pou ki nou pep pa reste an aryer. Avek sa Mr Speaker, mon konfirm mon sipor pou sa Mosyon. Mersi.

MR SPEAKER

Mersi Onorab. Prosen entervenans mon donn laparol Onorab John Hoareau.

HON JOHN HOAREAU

Mersi Mr Speaker pour laparol e bonzour tou dimoun a lekout. Mr Speaker, Mosyon ki devan nou pe demann Gouvernman pou fer en keksoz, pou met an plas bann mekanizm nesese pou fer peyman vin nimerik.

E i osi pe demann pou fer sa keksoz dan en lespas 18 mwan oubyen di-si le 1 Zanvye 2025.

Mr Speaker, sa Mosyon i en Mosyon ki en pti pe teknik, alor i pou annan enn de bann term teknik ki pou ganny servi.

Mr Speaker, nou pei pe rantre dan en nouvo lepok. En nouvo lepok i vin avek nouvo lide. Nouvo lide i vin avek inovasyon e modernizasyon.

Se sa vizyon transformasyon ki Prezidan in fer resorti lo 4enm paz nou manifesto - *Transition to the new Seychelles*. Sa kontra ki LDS in fer avek pep Seselwa le 24 Oktob 2020.

Kwa ki Prezidan i konseptyalize atraver sa mo transformasyon? Premyerman, en transformasyon ideolojik e *mindset*. Vedir en lapros pozitiv ver devlopman e fason vwar keksoz, ki malerezman pa toultan ki nou bann koleg lot kote latab i vwar parey.

Dezyenmman, en transformasyon dan en sistenm ledikasyon, i vedir en sistenm ledikasyon enkliziv ki reponn a bezwen tou nou zanfan. E ki kapab fer labaz oubyen met labaz pou fonksyonn – pour tou nou zanfan kapab fonksyonn dan en sosyete modern.

Trwazyenmman, en

transformasyon dan devlopman e lekonomi pei, kot i ankouraz tou sitwayen pou partisip e donn en koudmen pour anmenn pei de lavan. Parey nou vwar bann legzanp *public and private partnership* ki pe rezonnen.

Katriyenmman, en transformasyon dan servis piblik. Dan sa menm dokiman lo paz 14 e 15, i al an plis detay lo komitman pou fer servis piblik, ki'n en *failure* avan – dan Gouvernman avan. E petet enn bann pli gro klou dan zot serkey, san zot realize...

MR SPEAKER

Onorab, pa envit divizyon silvouple.

HON JOHN HOAREAU

Mon pa pe envit okenn keksoz Mr Speaker.

MR SPEAKER

Mersi.

HON JOHN HOAREAU

Mon pa pe envit okenn keksoz.

(interruption)

MR SPEAKER

Order! Order please! Onorab *yes*, prosede.

HON JOHN HOAREAU

Sa Mosyon alor i enn ki annan bokou merit e ki ankadre bann pwen enportan; parey lefikasite, latransparans, rann kont e *e-governance*.

E *plus* enportan ankor; lentegrasyon nou lekonomi avek larestan lemonn. E lezot bann pwen enportan ankor. Bann pwen kardinal ki permet en Gouvernman e en pei, kree son pozisyon dan en lekonomi mondyal.

Ler nou pe get bann pei avanse dan Lerop e dayer, nou vwar ki ozordi peyman nimerik in rapidman transform e vin en fason viv; ki'n transform *landscape* biznes e lafason ki larzan i ganny servi.

Si nou get Langleter par egzanzp; preski tou servis *taxi* i fer atraver peyman nimerik. Ou fer ou peyman swa avek en kart labank. Sa ki bokou dimoun i term koman *plastic money*.

Me ozordi nou bann kart labank ki nou pe servi Sesel, si nou a realize, i ganny prodwir par en lakonpanyen ki apel *Visa*. E li i anmas *commission* lo sa bann kart – lo tranzaksyon sa bann kart.

E la mon vwar Mr Speaker, atraver sa Mosyon, i annan lespas pou en antreprenner kapab, oubyen bann dimoun ki doue dan bann keksoz e elektronik e *internet* -

pou kapab vin avek en kart ki kapab petet servi pour *interface* bann biznes lokalman, ki bann peyman i kapab fer atraver sa kart. E sa *commission* i a reste Sesel.

Oubyen osi nou kapab vwar poudir konmela peyman ki ganny fer *online* ou kapab itiliz en *computer* oubyen en *smart phone*. E sa bann pei ki pe servi plis sa oubyen ki pe servi preski antyerman sa i ganny klasifye koman bann *cashless societies*.

Isi Sesel par kont, nou'n komans bouze dan sa direksyon. Serten biznes e servis tel koman; *Cable & Wireless*, *SRC* - bann *booking* avyon e plizyer ankor i servi peyman nimerik. I osi annan bokou labank ki'n kree bann *platform online* ki zot kliyan i kapab servi pou fer toudsort peyman.

Defwa sa kalite peyman i ganny klasifye osi koman *contactless payment* akoz i napa sa kontak fizikal.

Mr Speaker, sa ti vreman esansyel letan *COVID*. Letan pandemic *COVID* ti lo son *peak* e bokou dimoun ti pe travay dan lakour. Pou evit transmet sa viris – pou evit kontak, nou ti vwar sa sistenm i vin vreman efektiv.

Mr Speaker, mon pa pe an faver *total cashless*, e mon a eksplike akoz. Me mon plito toutafe siport *cash-lite society*. E sa 2 term i annan en diferans fondamantal.

Cashless se ler ou servi – ler ou pa servi larzan likid ditou. Tandis ki *cash-lite* se ler ou servi plis larzan nimerik. Me par kont ou servi osi en serten poursantaz larzan likid.

Mr Speaker, ozordi i annan en lot term ki pe ganny servi an relasyon avek peyman nimerik. Sa se *digital wallet*. E sa i senpleman vadir en platform nimerik ki ou kapab met ou larzan lo la. Par egzanp; *PayPal* ou *Apple Pay*. E atraver ou telefonn, *laptop* ou kapab fer peyman pour serten komodite.

Cryptocurrency wallet i en lot *digital wallet* ki pe konmans vin popiler, me an se moman zis serten biznes ki aksepte sa kalite peyman.

Mr Speaker, teknolozi nimerik oubyen *Fintech* – (*Financial Technology*) parey nou apel li, i sitan avanse ki ou kapab servi ou telefonn pou *scan QR Code* pou ganny akse ek lenformasyon e prodwi. E menm permet ou ganny akse avek *website address* kot ou kapab fer sa bann peyman.

Mr Speaker, ledikasyon finansyel i dezormen vin

vreman enportan pour nou zanfan ki pe monte, e osi adilt pou ki zot kapab fonksyonn dan sa lemonn nimerik.

E mon konnen poudir i annan en Manm lot kote latab ki'n toultan met lanfaz lo ledikasyon finansyel. I vreman enperatif ki sa sistenm ledikasyon i bezwen pran kont, e enkli sa bann program dan nou program skoler.

Mr Speaker, ziska prezan nou napa en Lezislasyon modern pou regilariz e siperviz bann diferan form peyman nimerik. Mon krwar ki si nou target, parey loter Mosyon in mete – I le 1 Zanbye 2025, nou bezwen akselere lo sa size lezislasyon.

Nou konnen ki *cybercrime* e labi i deza bokou - pe fer bokou fraka lo sa bann lenstitisyon finansyel *online*. Alor sa i bezwen ganny fer dan limesya. Tranzaksyon ilegal tel ki tranzaksyon *dark web*, oubyen tranzaksyon frodilan ki bezwen ganny dil avek.

La nou bezwen osi annan *capacity building* pour *FCIU*, pou kapab prosekit sa bann ki esey fer sa bann krim.

En lot pwen enportan, se ki labank i devret ede ankouraz dimoun pou bouz lo bann peyman nimerik. Zot kapab fer

sa an redwizan *commission* lo bann tranzaksyon nimerik.

E anvi ki zot pou osi redwir zot kou operasyonnel, akoz zot pa pou bezwen bann *staff* – lakantite *staff* pou servi konman *cashiers*.

Mr Speaker, se la ki rol *DICT* i vin vreman enportan pou travay lo bann platform nimerik, pou ed bann departman Gouvernman bouz avek letan. Vin pli konpetitiv, vin pli efikas e kree sa lanvironnman ideal pour biznes ogmant krwasans ekonomik.

Mr Speaker, peyman nimerik i annan bokou lavantaz dan sa lemonn modern ler ou pe fer peyman, an konparezon avek larzan likid.

Souvandfwa larzan likid nou napa kontrol lo son lorizin. Souvandfwa i kapab larzan prop, me i osi kapab larzan sal ki sorti atraver trafik drog *illicit*, lavant zarm leze.

E menm larzan ki sorti dan bann tranzaksyon ilegal, parey peyman lo *dark web*. E osi larzan ki annan defwa i sorti dan bann ziridiksyon, ki annan sanksyon enternasyonal lo zot.

Lavantaz peyman nimerik se ki toultan annan en *paper trail*. Si i annan okenn soupasyon lo larzan ki pa lezitim, sa i *trigger* sa ki nou apel en *transaction report* ki ganny

zenere, kot *FIU* i kapab *follow up* lo sa bann size. Sa i vedir i pou osi ede pou redwir blansisaz larzan e bann benefis ki bann *dealers* i fer avek larzan drog.

Sistenm nimerik i pou osi redwir koripsyon dan servis piblik. Annan defwa i annan travayer dezonnnet dan servis piblik, ki tante pou pran en gous e les pase serten komodite. E la Gouvernman pa ranmas sa *tax* ki i sipoze ranmase.

Mr Speaker, mon konnen ki sa i arive dan serten landrwa parey *Customs*. Mon pe dir sa avek bokou rezervasyon, akoz mon konnen ki laplipar travayer *Customs* i fer zot travay byen e dan en fason onnet.

Mr Speaker, sistenm peyman nimerik pou osi ogmant latransparans, rann kont dan servis piblik. E sa i en keksoz pozitiv pou ede anmenn bonn governans.

Ler ou annan en sistenm peyman nimerik kot Gouvernman i kapab odit – i kapab fer son odit pli fasilman. I osi anpes *leakage* larzan souvandfwa ki arive ler larzan i pas *main à main*

I pou osi redwir letan ki en tranzaksyon i ganny fer, akoz pou napa nesosite pou met gran

laliny e osi depans letan pou met laliny.

E Gouvernman i kapab anploy plis zofisyè pou fer bann prosedir - e pou pa – (sorry mon a redir sa) e pou pa permet Gouvernman anploy plis zofisyè pou fer bann prosedir papye. Alor i redwir bann prosedir papye e tranzaksyon i pli vit.

I redwir nesosite pou al labank e fer gran laliny devan *cashier*, parey nou ti vwar dan bann letan *COVID*.

Mr Speaker, sa pa ti zoli ditou letan ou ti vwar laliny ki ariv ziska devan laport, ou menm deor lo semen pandan letan *COVID*. E sa in donn nou en tre bon leson lo ki fason nou kapab bouz nimerik.

In fer nou realize ki ler nou pe fer en travay dan lakour, i enportan ki nou kapab konekte avek tou bann servis. Oubyen bann kliyan i kapab konnekte par internet pou fer zot biznes marse, olye ki reste *standstill*.

Mr Speaker, toultan defen Dokter Larose, ansyen Minis Finans, ti fer nou realize ki ler ou gaspiy letan ou kree lenflasyon. Sa konsepsyon i enteresan. Akoz pli ou pran plis letan pou donn en servis, pli sa servis I kout pli ser pou pei.

Mr Speaker, sistenm nimerik i osi redwir risk ki en dimoun i ganny atake, avek

voler pou pran son larzan. Sirtou bann dimoun vilnerab parey bann dimoun aze.

Menm si nou pe evok sanzman pou moderniz Sesel, nou pou toultan bezwen annan serten alternativ. Parey nou dir en *fallback position*, an ka ki ou sistenm i *crash*, oubyen ou annan bann *hackers* ki *hack* dan ou sistenm. E sa i en menas reel.

Ler ou bezwen pe rode ki fason ou pou rezourd sa bann problem, parfwa i kapab pran bokou letan. E alor en *fallback position* lo *cash* i très enportan.

Se pou se la ki mon pe siport sa demars pou nou vin *cash-lite* rather ki *cashless*. Bann vye dimoun i souvandfwa rezistan avek bokou sanzman. E sa bann sanzman, petet annandler zot pa sitan konfortab avek sistenm nimerik.

Alor i enportan ki nou annan sa sistenm *cash*, zis pou en *backup* pour sa bann dimoun osi kapab fonksyonnen dan nou Sesel modern. Alor en solidarite avek zot i enportan osi.

Mr Speaker, sa Mosyon i enn ki vreman enportan e pou anmenn Sesel dan en nouvo lepok, parey ki Prezidan Ramkalawan in koz lo la dan nou *Manifesto*. Pou pous *the*

ease of doing business a lavan e fer nou pei vin en model pour lemonn.

Pou nou vin pli efikas e pou delivre dan nou servis piblik. Pou ki Sesel pa reste izole dan sa lemonn global e nou bezwen siport sa Mosyon pou anmenn nou pei dan sa direksyon.

Mr Speaker avek sa mon pou remersye ou. Parey mon'n dir, mon pann fer okenn politik pou gat sa Mosyon. Mon'n zis met enn de bann fe devan. Mersi.

(APPLAUSE)

MR SPEAKER

Mersi Onorab. Prosen entervenans, mon donn laparol Onorab Regina Esparon.

HON REGINA ESPARON

Mersi Mr Speaker. Bonzour tou dimoun a lekout. E en bonzour spesyal pour bann etidyan lekol Anse Royal ki dan Galeri.

Mr Speaker, sa Mosyon ki devan nou Lasanble la bomaten i enn ki enportan. E mon pou aport mon sipor dan sa deba.

Mr Speaker, parey loter Mosyon in fer resorti dan son prezantasyon e egalman parey Mosyon pe demande, mon panse ki avek sa evolisyon ki pe arive dan bokou domenn, kot

lemonn pe bouz lo sa lapse nimerik ou *digital* – parey nou kapab apel li, i enportan ki nou osi konman en pti pei, nou pa ganny kit deryer dan sa evolisyon.

E ki konman en nasyon ki krwar dan sanzman, nou osi nou fer sa zefor pou bouz devan dan sa kouran sanzman. E evolye akote bann lezot pei ki pe devlope.

Mr Speaker, dan en prosesis tranzisyon kot i annan en sanzman, i bezwen annan en landrwa kot keksoz i konmanse. E se pou sa ki Mosyon pe demande ki nou konmans dan Gouvernman, e zwenn sa sanzman dan sa *digital era*.

E Manifesto *LDS* ki ti al avek dan eleksyon, ti site ki Gouvernman *LDS* pou donn sipor sekte finansyel e kit zot azour ek nouvo devlopman e regilasyon enternasyonal. An menm tan sofgard nou kredibilite, lentegrite dan domenn finansyel, sirtou dan domenn *offshores*.

Deza la nou war ki *LDS* ti al dan eleksyon avek en vizyon, pou met nou azour ek sa evolisyon dan sistenm finansyel.

Deza la nou'n war, kot *SPTC* in konmans dan en direksyon pou bouz *cashless*,

kot depi le 1 Zilyet zot in aret sa legzersis servi larzan likid dan bis.

Wi, pou konmanse in annan en pe lenkonvenyans pour serten, ki petet pa ti pe swiv ou port latansyon ek lanons, ek lavertisman ki ti pe ganny fer - pou averter piblik lo sa sanzman ki ti pou ganny al arive.

Me selman, ptitapti nou'n war ki keksoz in amelyore e kliyan i satisfè. Zis i pas son kart i ale. Pa bezwen fouy dan pous pou rod larzan sanze pou tard drayver. E pou sa drayver, ler i fini zis i donn son masin. I pa bezwen espere pou kont en ta Roupie avan i al dan lakour.

E sa bann pti lerer pe ganny aziste dousman, dousman. E fodre ki nou osi konstate ki tou nouvo keksoz parfwa ler i konmanse, i annan bann pti defi ki i vin avek. E anmezir ki i progresè, i aziste pou bouz devan.

Mon panse, Mr Speaker, ki avek en tel linisyativ osi ki Mosyon pe demande, i kapab annan enn de pti defi avek pou konmanse. Me selman, anmezir ki i pou ganny pratike i pou fasil pou li aziste.

Nou'n war kot serten labank, parey MCB in konmans en sistenm *cashless*. *Airtel* ti konmans avek en sistenm *Airtel*

Money, parey nou war konmela dan plizyer pei Lafrik. E ki mon'n war osi byen popiler *La Tanzanie*, kot nou sorti semenn pase Mr Speaker, ansanm avek ou.

En sistenm ki permet ou *load* ou larzan lo ou telefonn e servi ou telefonn pou fer ou tranzaksyon peyman. Nou'n osi war *Dubai* kot kliyan i *scan* zot *Visa Card* lo zot telefonn, e peyman i ganny fer atraver zis *scan* sa *QR Code*. Ki si i napa sa kart fizikman avek li, napa problem, i *still* kapab fer son peyman.

Ki bann benefis ki en tel linisyativ i kapab anmennen? Premyerman, i fasil detekte koripsyon. Ler ou *trace online* ou pou konnen kote sa larzan in ale.

E ozordi bokou sistenm i kapab detekte bann *transfer trade online*. E ou konnen ki voyaz finansyel ki serten larzan in fer. Kote in deplase, kote in ale.

Lot benefis se ki napa larzan likid pou zwe ladan dan lanmen, pou ou ganny tante pou met en pe dan pos.

Pou sa travayer ouswa *accountant*, i pa bezwen perdi letan dan gran laliny labank pou fer tranzaksyon. *From* son lofis, tou i kapab ganny fer dan en fason nimerik oubyen *online*

banking, oubyen online transfer.

Mr Speaker, ozordi ou menm kapab pey ou *bill PUC*, ou *bill* telefonn, oubyen *license, Intelvision online from* ou lakour - san ki ou bezwen deplase pou pri dan en gran laliny trafik pou al lo *counter*. Ou konserv pli bokou letan, kot ou kapab servi sa letan pou ou fer en lot keksoz. Ou mwen strese, kot ou kapab fer en kantite keksoz dan konfor ou lakour san ki ou bezwen deplase.

Dan tousala, i osi rekomannde ki bann labank osi i vin pli fleksib e ankouraz zot bann kliyan pou annan en kart kredi. E avan tou, fasilite sa prosedir pou ouver en kont labank. Parski an se moman, i annan dimoun ki ganny difikilte pou ouver en kont labank.

Proof of address in vin en prosedir ki konplike. Kliyan i monte desann e i vir an ron. Bokou labank pa oule ouver kont pour dimoun ki'n sorti dan prizon ki anvi rekonmans zot lavi. Ki'n fini antre dan en travay. Ki dele letan ki nou donn li sa dimoun pou fer sa prosedir?

Ozordi pou li ganny en *character certificate* ki klersi son rikord, i bezwen pran 5an. Pandan sa letan, ki i fer? Eski i

reste deryer? I enportan tir sa bann baryer dan bann prosedir.

La mon pe rekomannde ki labank osi i fer zot prosedir pli fasil e senp pour kliyan ganny enn sa kart elektronik. E ki sak *commission* ki zot sarze pou servi sa kart, i rezonnab.

Akoz sa ki napa kart pou ganny kit deryer e pa pou kapab zwenn dan sa nouvo devlopman pou ganny sa servis *online*. Avek sa 2 pti mo Mr Speaker, mon pou donn mon sipor pour sa Mosyon anmennen par Onorab Henrie. Mersi.

(APPLAUSE)

MR SPEAKER

Mersi Onorab Esparon. Prosen entervenans, mon pou donn laparol Onorab Georges Romain.

HON GEORGES ROMAIN

Mersi Mr Speaker. Bonzour tou koleg Onorab. Bonzour tou bann etidyan anler dan Galeri e tou dimoun ki a lekout.

Mr Speaker, sa Mosyon i enn ki enportan pour Sesel akoz i annan bokou potansyel pou transform lekonomi nou pei. E sa i vreman enportan, Mr Speaker.

Akoz la nou pe koz lo en tranzisyon anver en sosyete, kot an zeneral nou pa pe servi

larzan likid. E ler nou pe regard lafason ki lemonn pe evolye vit anver sistenm nimerik, i kler ki lafason ki nou servi larzan i pa en leksepsyon.

Mr Speaker, i annan plizyer benefis pour en pei bouz dan sa direksyon, kot nou pa toultan servi larzan likid.

Premyerman Mr Speaker, en tel sistenm pou anmenn bokou lefikasite, e rann nou lavi bokou pli fasil. Sa i akoz en tel sistenm peyman pou al pli vit e i pou pli fasil; ki ou pey ou *bill*, ki ou pe fer ou *shopping*. Oubyen ki ou pe fer transfer larzan lo en kont isi Sesel ouswa aletranze.

Tou dimoun, enkli biznes e Gouvernman pou kapab profite avek sa lesanz finansyel ki pou mars vit, e i annan plis lefikasite akoz tou prosedir i elektronik.

Mr Speaker, annou pran legzanp en dimoun ki pe fer en peyman atraver *cheque*. Normalman i kapab pran 1 a 2 zour pou sa *cheque clear*. E an plis, sa *cheque* i pa en garanti ki sa dimoun i annan sa larzan dan son kont.

Avek en sistenm peyman elektronik, si sa dimoun napa sa larzan lo son kont, sa peyman pa pou ganny otorize.

Avek en tel sistenm koumsa Mr Speaker, kot nou pe

pey en elektronik - sa osi i pou dekouraz bann dimoun ki vremen dezonnnet, kot pe kontinyen donn *cheque* menm si zot konnen zot napa sa larzan.

Mr Speaker, en lot lavantaz en tel sistenm pou anmennen, se en rediksyon dan bann risk vol oubyen risk servi fo biye, ki kapab arive ler nou pe servi larzan likid.

An plis, ler nou servi larzan likid i annan kou prodiksyon sa larzan, e i annan kou pou anmenn sa larzan pou al fer *banking*. I annan kou pou protez sa larzan, e risk ou sekirite ler ou pe mars ek en kantite larzan lo ou.

Mr Speaker, tou peyman ki ganny fer dan en fason elektronik, i amelyor lafason ki nou zer nou larzan dan lekonomi. Akoz i asire ki tou antite ki devret pey zot *tax*, pe pey parey i devret atraver sistenm finansyel ki an plas.

E osi kapab redwir bann tranzaksyon lo *black market* ki fer ki nou reveni nasyonal a vin pli transparan, e pou anmenn plis *accountability* dan nou sistenm finansyel.

Me Mr Speaker, i enportan ki nou bezwen pran kont bann defi ki nou pou rankontre ler nou entrodwir en tel sistenm. E la i annan plizyer fason ki nou

kapab adres sa bann plizyer defi.

Mr Speaker, enn bann pli gran defi i konsern bann dimoun ki napa akse avek *internet*, ouswa ki napa en kart labank. I vremen enportan ki personn pa ganny kit deryer dan sa tranzisyon.

E alor nou bezwen met an plas bann program ou linisyativ ki pou ogmant ledikasyon konsernan servi en sistenm nimerik - e osi ofer akse nesese pou dimoun annan sa teknolozi.

I osi enportan ki nou annan en sistenm *internet* ki stab, vit e ki kapab siport en tel linisyativ.

Mr Speaker, en lot defi ki nou konnen, se ki en sistenm nimerik i kapab annan konsern *cyber security*. E la nou pei pou bezwen kontinyen met an plas sistenm sekirite ki pou sekiriz sa bann tranzaksyon, e protez bann lenformasyon personnel e konfidansyel.

E la Mr Speaker, nou pou envit tou bann antite pou prepare e kontinyen ranforsi lenfrastruktir legal pou protez sa sistenm. E asire ki dimoun i ganny konfyans ler i pe fer son bann tranzaksyon.

Mr Speaker, plan pou met sa an plas i pou devret ganny fer gradyelman. Nou pou

bezwen fer en revi lo bann sistenm ki an plas ozordi, e lafason ki nou servi li.

E vwar dan ki fason nou kapab amelyor nou lenfrastruktir nimerik e *cyber security*. Oubyen parey nou dir; bann mekanizm *online* sekirite.

Mr Speaker, sa plan i devret osi fer provizyon pou annan kolaborasyon pros ant tou bann lenstitisyon finansyel ek bann lakonpanyen ki ofer sa servis teknolozi; koumsa nou ava kapab devlop en platform ki an sekirite e ki fasil pou tou dimoun kapab servi pou li fer son peyman.

Mr Speaker, byensir pei pou bezwen annan serten sanzman apropiye dan son Lalwa, ki pou akonpany sa tranzisyon.

Mr Speaker, i pou osi tre enportan ki i annan en sansibilizasyon lo nivo nasyonal pou edik sak sitwayen pou kapab benefis sa tranzisyon. E ki zot ekipe pou servi sa sistenm an konfyans.

Mr Speaker, sa tranzisyon i pa en keksoz ki nou devret fer en sel kou. Me i en parkour ki pou bezwen gradyel. Petet nou kapab konmans avek Gouvernman ek bann antite paraetatik. E dousman, dousman nou a kapab bouz anver bann lezot sekter.

Pou konklir Mr Speaker, annou vwar sa konman en keksoz pozitiv pour nou pei, akoz i pou anmenn bokou lavantaz pou nou.

Annou ekout konsern nou sitwayen pou nou kapab ganny en prodwi ki satisfè bezwen nou pep. Mr Speaker, mon pou donn mon sipor pour sa Mosyon. Mersi Mr Speaker.

(APPLAUSE)

MR SPEAKER

Mersi Onorab. A se pwen nou a pran poz e nou a rebran deba 11er. Mersi.

(BREAK)

MR SPEAKER

Nou kontinyen avek deba. Laparol pour Onorab Doyace Porice.

HON DOYACE PORICE

Mersi Mr Speaker. Bonzour Mr Speaker. Bonzour tou mon bann koleg *MNAs* e tou dimoun a lekout.

Avan mon konmans mon lentervansyon, mon bezwen dir mersi nou Bondye Papa pou donn mwan lasante, kouraz pou mon ariv dan mon travay ozordi.

Mr Speaker, sa Mosyon anmennen par Onorab Henrie, in vin dan moman ki Gouvernman pe kontinyen fer diferan sanzman. Ki pou anmenn plis solisyon pour nou pti pei Sesel dan domenn transformasyon, dan servis nimerik.

Ler nou koz sanzman, nou bezwen anmenn li dan tou son lapse politik. Mr Speaker, sa Mosyon i pou anmenn lo rediksyon krim, ogmant lefikasite, redwir lenflasyon lo *tax* pou ed Gouvernman pou annan en *savings* dan *printing* larzan. E pou osi koup koripsyon.

COVID in montre nou en kantite keksoz kot nou pei i bezwen servi e amelyor travay. I pou annan relevans kot pou ed amelyor servis ki ganny ofer. Ede ki bann frod e vol i arete, vi ki i pou napa larzan likid an sirkilasyon.

Zis parey *SPTC* kot zot in anmenn *cashless* dan zot servis bis piblik. E tou dimoun pe servi en kart ki zot met larzan lo la.

E i fer mwan mazin osi *SPGA* ki zot osi zot anmenn en servis nimerik. Lankourazman par *social security* osi pe demann son kliyan pou ouver en kont labank, ki tou tranzaksyon i fer laba.

Aret servi larzan likid, i annan bokou lavantaz ki i ava anmenn plis lefikasite e anpes gaspiyaz resours pou deliver en pli bon servis dan sekter servis piblik e paraetatik.

Mr Speaker, sa size i pa nouvo aköz bokou pei i deza pe bouz lo sa nivo. E mwan en tel sanzman parey, i ava en pa a lavenir, kot nou ava pli bon fason pou delivre. E osi kot bann aktivite ki annan frod ek larzan piblik, i a ganny met en lord ladan, enn fwa pour tou.

Sa Mosyon Mr Speaker, pe demann pou le moman, se pour Gouvernman diriz par legzanp e kot i konmanse. E si sa demars i marse, sekter prive i ava swiv.

Mosyon pe demande pou sa mezir i vin anfors d-isi le 1 Zanvyè 2025. Nou deza annan 18 mwan di-si. I annan sifizaman letan pour konsiltasyon, met tou mekanizm e Polisi an plas pou siport sa demars.

Avek sa demars, i pou anmenn nou pei parmi bann pli gro pei ki dan Losean Endyen, dan Lafrik - kot nou met osi, dan Lerop.

Parey ou konnen Mr Speaker, ki nou dan *LDS* nou pa per pou anmenn Mosyon, kestyon e sizesyon kot nou Gouvernman. Aköz nou en tim byen serye e nou toultan pe

mazin le fitir. Non pa mazin fer travay la pou la. E nou konnen ki Gouvernman i toultan ekout nou.

Nou asire ki sekter prive pou get sa demars byen, e zot osi zot pou bouz ver sa lide apre zot analiz. Zot osi zot pou esey rod sa diferans e sanzman dan zot biznes. *Cashless* i pou fer zot ranmas plis reveni e pli bon servis ver zot biznes.

Wi Mr Speaker, aret servi larzan likid dan tou tranzaksyon finansyel dan sekter servis piblik e paraetatik, i pou en lot pa an avan pou nou pti pei Sesel.

Kot nou pou kapab anmenn plis reveni e osi plis sipor anver lezot pei zanmi, e lezot pli gran pei ankor. Kot zot pou war ki Gouvernman Sesel i vremen serye pou anmenn plis lekonomi pour pei. E anmenn en pli bon lavi pour nou Seselwa.

Mr Speaker, Onorab Henrie in anmenn en Mosyon ki pou en lavans pour Gouvernman dan en tre bon demars anver san lide *cashless*.

Ki pou ganny diskite avek tou son partener stratezik ki pou seryezman konsider met an plas. E mon asire ki en tel sanzman parey i en pa ver lavenir pli fritye pour nou pei Sesel.

Kot i ava azout progres avek lezot sanzman ki Gouvernman LDS in anmenn dan nou pti pei Sesel. Si i bezwen anmenn okenn kad legal, mazorite LDS i a pare pou siporte.

E nou pou demann nou lezot koleg dan Lopozisyon, pou anmenn zot sipor zot osi. Avek sa lentervansyon mon pou aport mon sipor pour sa Mosyon. Mersi.

(APPLAUSE)

MR SPEAKER

Mersi Onorab. Laparol i pour Onorab Naddy Zialor.

HON NADDY ZIALOR

Mersi Mr Speaker. Bonzour Mr Speaker. Bonzour tou koleg Lasanble e bonzour tou dimoun ki a lekout.

Mr Speaker, mon ti a kontan aport mon kontribisyon ki pa pou long - vizavi sa Mosyon, parske i annan son lenportans.

E lentervenans ki'n koz avan mwan, in osi - sirtou Onorab Hoareau, in fer en mansyon ki i plizoumwenn teknik. Me i osi annan son bout pratik ki mon krwar i annan en lenpak signifikan dan lavi kotidyen tou dimoun toulezour.

Mosyon pe demande ki servis piblik e paraetatik i aret servi larzan likid apartir le 1 Zanvyè, 2025. E mwan mon touse avek sa parske nou bezwen onnet avek nou lekor ki Sesel i pa an aryer avek bouzman dan teknolozi.

In osi annan sa tranzisyon rapid, sirtou avek COVID ki'n montre nou ki pa neserman nou bezwen reste avek sa mannyer fer tradisyonnèl.

E la in annan bokou servis ki'n bouz ver peyman nimerik an servan *internet* pour bann tranzaksyon, komunikasyon. Menm aret servi papye dan bann tranzaksyon.

E prezan letan Onorab Henrie in anmenn sa Mosyon, mon'n asiz dan lakour e mon dir; be, ki bor mwan konman en endividi. En dimoun ki Onorab Kelly, e Onorab Philip in nonmen - en dimoun ki pe viv avek dezabilite - ki benefis en tel tranzaksyon pou anmennen pour nou?

E loter Mosyon in osi rekonnèt ki in annan pa mal travay ki'n ganny fer dan bann lannen lepase, pou nou anmenn sa tranzisyon.

E wi, i annan en nesosite. I annan en nesosite pou nou bouz avek teknolozi. I annan en nesosite osi pou nou elev e ariv ver sa misyon pou fer

Gouvernman vin en *e-Government*.

E la mon mazin bann servis ki dan lepase – mon kapab servi detrwa legzanp; dan lepase par egznanp si ou pran en lazans – Lazans Proteksyon Sosyal.

Dan Vandredi laliny ti arive ziska *Amusement Centre*. Senpleman aköz, nou ti annan sa tradisyon, sa koutim ki fodre nou vin anmas nou bann larzan, *cash* dan bann servis.

E la bokou fwa in annan bann lenstans kot nou'n vwar – swa letan pe kontan i manke, swa i annan i ganny an plis ou bezwen al rod son dimoun. So i annan serten travay ki'n ganny fer.

Nou pe bouz avek teknolozi. Ozordi i pa neserman ou bezwen ganny ou *payslip* dan ou lanmen. Alors ou ganny ou *payslip* atraver ou *email*.

Ou tranzaksyon banker letan i rantre lo ou kont ou pe ganny en *sms* ki dir ou, ou larzan in antre lo kont. E I annan *internet banking* kot ou senpleman met ou *password* ek ou *username*. E ou kapab fer ou tranzaksyon.

Sa i bann keksoz debaz. Sa i sa konmansman. Prezan letan nou ariv dan servis Gouvernman. Nou pe koz en

Gouvernman ki pli efikas. Nou pe koz en Gouvernman ki delivre. Nou pe koz koup lo birokrasi.

Ankor mon retourn lo debaz, lavi toulezour. En dimoun i vini. En legzanp; mon kontan servi lanplwa. I annan serten servis ki ou peye, par egznanp; *retention of service*, ou bezwen ekrir en let. Letan ou ekrir sa let, i ganny met dan en *file*. Sa *file* fizikman i sorti kot sa zofisye, I al kot sa direkter, i al kot sa direkter zeneral. Ou ganny en laprouvasyon ki notifie ou an ekrir ki ou *retention of service* in ganny aprouve.

E la ou bezwen desann – mon pa konnen si i ankor menm pri. Ou desann avek R200 Ou bezwen pey sa R200 *cash* kot *accountant* pou ou ganny en resi.

Me nou, nou pe dir, senpleman annou *do away* avek sa. Ozordi nou annan bann servis *online* pratik. Annou fer en aplikasyon *online*. Nou ava annan en sistenm ki *verify, certify, approve*.

E ou koman sa dimoun ki pe rod sa servis, ou senpleman annan sa *window* ki ouver la ki dir ou, fer ou peyman pou ou ganny ou akreditasyon e ou resi. Onorab, mon mazin sa i

bann keksoz tipik e pratik ki ou pe demande.

Lot mo, en lot legzanp – mon'n tann *Licensing* koz bokou lo la. Mon pe al pey - *renew* mon *license*, fer mon *test*, fer *test* mon transpor. Pou mon fer peyman, mon bezwen ale fizikman pou mon peye.

Kan ou ti kapab letan ou fini fer mon *test*, ou anvoy mwan mon rezilta atraver mon *email*. E mon fer mon tranzaksyon peyman deswit.

Tel parey pour *GOP*. Mon pa konnen si i annan an aplikasyon. Mon annan en lalis of *GOP holders*. Dan plas pou mon desann fizikman, pas dan sa bann papye enn par enn. Mon pe pey pour entel, pe pey pour entel, pe pey pour entel.

Ou donn mwan en total, e la mon servi mon *credit card* oubyen okenn *mode of payment*, mon peye. Mon mazine sa i le bi Mosyon bomaten. Me pour sa arive Mr Speaker, nou osi annan bann lezot fakter konman en pei, ki nou bezwen pran konsiderasyon. E sa se enn ki pri mondyal, se servis *internet*.

E la letan nou pe koz servis *internet*, fodre ki Gouvernman osi i konsider ogmant *the speed of internet* dan bann landrwa gouvernmental e paraetatik.

Fodre ki nou fer sir ki tou bann lezot *stakeholders*, parske i pa pou en keksoz mon mazine ki pou antyerman *rely* lo Gouvernman. Me i pou osi annan sa bout *private sectors* ki pou antre ladan. Mon mazine la i bann labank.

Tre souvan ou pe pas en peyman atraver *POS*, i dir ou napa *network*, ou peyman pa'n pase, ou larzan in *bounce back*. Ou bezwen *call* ou labank, i dir ou ankor dan de zour, trwa zour ki i pou retourn lo ou kont.

So i bann teknikalite ki pandan ki nou pe diskite, pandan ki Gouvernman pe ekout nou – sa osi nou bezwen pran an konsiderasyon.

Parske i bann keksoz ki souvandfwa pti keksoz ki kapab aranze. Me sa ki enportan annou get li an lonterm, annou get pli lwen. Annou get servis.

Mon letan mon vwar sa Mosyon, mon vwar i enn bann lakle parmi lezot ki pou ede annan en servis pli efikas, koup birokrasi, e anmenn sa satisfaksyon pour piblik.

Pour sa *businessman* ki li i bezwen pas dan bann prosedir dan bann biro Gouvernman, ki souvandfwa i dir avek ou; mon'n pas en zournen antye zis pou mwan pas la, pey sa. Pas la, fer sa. Pas la pou mon anrezistre. Soumet mon form.

Ler mon'n soumet, en departman pi demann mon en kopi. Sa lot departman pe demann mon en lot kopi; peyman isi, peyman laba. Mon mazine *à mon avis*, sa pou permet nou konman en pei, *achieve* nou bi pou annan en *electronic Government*. En servis pli efikas.

E dayer dapre resers, en tel servis i 3 fwa pli vit ki sa metod tradisyonnèl. I pli *safe*, malgre i annan son risk ki vin avek. Me an menm tan mon krwar toultan nou'n dir, nou anvi elimin persepsyon, ouswa latras koripsyon.

Sa i ava enn bann mwayen pou fer li. An menm tan, i ava osi ed mwan, ed ou konman sa endividi pou annan en pti pe plis kontrol an term Bidze.

Bokou in koz lo *SPTC* kart. In annan son pti *hiccups*. Me sa osi i en mwayen dan parastatal pou ed nou sitwayen, pou ed sa endividi kalkil son Bidze o mwan. Kantite *trip* i fer? Konbyen i pou arive? Sarz son kart.

E mon mazine atraver sa Mosyon, nou pe senpleman ankouraz Gouvernman, ankouraz nou pep – edik nou pep. Fer bann *awareness program*. Pas bann program lo televizyon kot pou montre bann benefis en tel servis.

Donn lespas sitwayen pou vin devan, e met serten konsern a ler aktyel bann servis ki aktyel pou nou donn solisyon. E parey mon dir, an avan ver 2025. Mr Speaker, avek sa 2 pti mo, mon pou aport mon sipor pour sa Mosyon. Mersi.

(APPLAUSE)

MR SPEAKER

Mersi Onorab. Mon a pas laparol Onorab Wallace Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour tou dimoun kip e ekout nou. Bonzour tou Manm Onorab.

Mr Speaker, mon pran laparol bomaten lo sa Mosyon prezante par Onorab Gervais Henrie. E mon annan serten pti – serten komanter, serten kontribisyon mon ti a kontan osi fer vizavi sa Mosyon.

E mon pou konmans par dir Mr Speaker, ki i inevitab ozordi pou ki Sesel i bouze. I bouze – i bouz ver teknolozi nimerik, an vi depandans Sesel ozordi avek larestan lemonn. Sirtou dan domenn finansyel.

So, sa migrasyon si oule, ver en lekonomi nimerik - ki swa a nivo sekter prive, ki swa a nivo sekter piblik, i enn ki

inevitab. e i enn ki'n en prosis. Si nou swiv byen listwar, si nou swiv byen devlopman Sesel, devlopman pei - devlopman lekonomi Sesel, nou pou war i enn ki'n en tranzisyon.

E ki bokou – deplizanpli bokou lanfaz in ganny mete. E in ganny fer resorti lot kote ki i annan demars ki'n ganny fer oparavan. E i bann – i en tranzisyon ki i neseserman bezwen arive, ki inevitab pour nou pa reste an deor avek devlopman ki pe arive dan lemonn.

Malgre ki nou pti. Malgre ki nou lwen avek bann sekter finansyel. Nou lwen avek bann devlopman bann gran, gran pei, me nou osi entegre atraver bann servis ki nou donnen avek sa bann larestan pei.

Par egzanj; servis banker. Par egzanj; servis lenformatik. La mon pe koz *internet*, mon pe koz telefonn, mon pe koz bann lezot servis ki ganny donnen dan bann pei bokou pli devlope ki nou. Me ki nou pa kapab reste a lekar.

I annan en nesesite pour nou kontinyen bouz dan sa laliny, ver en pei ki mon kapab dir, *embrace* plis teknolozi nimerik. E sa i pou bon pour Sesel dan le fitir.

Ler mon pe koz lo tranzisyon Mr Speaker, i enportan ki nou koz en pti pe lo rikord devlopman lo sa domenn pandan bann lannen ki'n pase.

E sa bann rikord i osi annan bokou pou fer avek lenvestisman sekter prive. e osi lenvestisman dan sekter gouvornmantal, sirtou dan bann lenfrastruktir nimerik.

Now, sa lenfrastruktir li menm i *provide*, i donn sa fondasyon - parey an Angle nou dir, sa *backbone* pou kapab *allow* sa devlopman pou arive. E ler nou pe koz lenfrastruktir ozordi, *Cable & Wireless* pe selebre 130an son legzistans.

E *Cable & Wireless* in enn bann pilye devlopman sosyete Seselwa ozordi, ki'n anmenn sa progre, sa tranzisyon ver en sosyete nimerik Sesel. Komans tre byen lontan, 130an pase avek bann *basic* zouti kominikasyon ki'n fer Sesel reste an kominikasyon avek larestan lemonn.

E avek bokou lavansman, bann diferan devlopman ki'n annan – sa lakonpanyen in *over the years* anmenn bann diferan nouvo teknolozi. Ki'n permet nou, konman sitwayen Seselwa, e osi bann dimoun ki vizit Sesel - benefisyavek bann diferan devlopman, bann

diferan teknolozi ki'n vin a laporte diran bann lannen.

E apre – mon pe koz lo *Cable & Wireless*, me selman in osi annan bann lezot lakonpanyen, par egzanp *Airtel*, par egzanp *Intelvision* e bokou lezot ankou.

E osi nou annan par egzanp; bann lenstitisyon finansyel ki *over the years* zot in la. Zot in enplant zot Sesel. Zot in fer biznes Sesel. E pou zot kapab reste azour e donn servis pep Seselwa, zot in forseman bezwen adopte e antre dan bann diferan servis ki'n dabor benefisye pep Seselwa.

Me sa bann servis in bezwen ganny anmennen akouz, sansan nou ti pou dekonekte avek lemonn. So lefe ki nou viv dan en lemonn global, e ki nou reste konekte ek lemonn – sa bann zafer i - parey mon'n dir i inevitab e i en progresyon dan devlopman Sesel li menm.

E mon krwar nou bezwen rekonnet ki sa bann devlopman lenvestisman sirtou dan bann lenfrastruktir nimerik, sirtou dan sekter prive, in fer nou ariv kot nou ete ozordi.

E si – e sa in fer li posibil Mr Speaker, par bann diferan aksyon ki'n ganny fer; ankou diran lannen par Gouvernman pou met bann lankadreman legal, bann striktir

lankadreman pou fer ki sekter prive i kapab investir ladan.

San lankadreman, san striktir, nou pa bouz osi vit ouswa parey nou ti ava anvi bouze. So nou bezwen osi rekonnet bann diferan mouvman, bann diferan zefor ki'n ganny mete; polisi dan sa direksyon par Gouvernman lepase, dan tou sa bann letan ki nou pe koz lo la.

Mr Speaker, ozordi ki lavantaz sa bann zafer in anmenn nou? Sa bann diferan lenvestisman, diferan devlopman stratezik ki'n ganny fer, pou bouz dan sa bann domenn?

Kwa ki'n siport sa bann diferan devlopman Mr Speaker? Premyerman, nou'n annan nou en sistenm ledikasyon ki'n permet bokou nou sitwayen ganny en nivo ledikasyon pou kapab adapte, pran sa bann diferan teknolozi - sa bann diferan loportinite ki vin ver zot – byen. E prepar zot pour teknolozi.

Ozordi nou sitwayen lo nivo Lafrik, nou bann pli edike. Menm atraver lemonn nou en sitwayen byen edike, gras a sistenm ledikasyon ki'n permet nou ariv a sa nivo.

E si nou pe koz osi lo kote sitwayen Mr Speaker, Labank Santral i dir nou ki ozordi nou

annan nou en *highly banked population*. E ler nou pe koz al ver peyman nimerik sirtou atraver, parey Mosyon pe demande – dan Servis Piblik, i enportan ki nou...

Sa statistik 94poursan nou popilasyon ki *belong to* en labank, *or* ki annan en kont dan en labank, *or* ki *bank* - ki fer tranzaksyon atraver labank, i enn ki enportan.

Akoz evantuelman se sa popilasyon Mr Speaker, ki pou akse sa bann servis. E si zot annan en popilasyon ki an deor sistenm banker, *then* i pou vin vreman, vreman difisil.

Ou kapab met tou ou bann teknolozi, tou ou bann platform, tou ou bann sistenm an plas, me si ou napa en popilasyon, en group dimoun ki pou pran lavantaz sa bann zafer, *then* i vin en problem. So, nou bezwen osi felisit travay ki Labank Santral in fer avek son bann partener *over the years*.

E la mon pe mazin osi; bann Minister Finans, bann Polisi ki'n ganny met an plas pou nou kapab annan sa *94 percent* popilasyon ki ozordi ki apartir en labank e ki annan bann kont.

E ki kapab fer bann tranzaksyon. I kapab profit sa bann devlopman ki arive dan

bann sistenm banker pou zot kapab fer bann tranzaksyon nimerik.

Mr Speaker, bann zefor ankor ki'n ganny fer diran lannen pou bouz ver teknolozi nimerik - e presizeman la mon pe al ver sekter piblik. E mon pe koz lo devlopman *e-Government - electronic Government*.

Ti deza – si nou pe koz lo en sistenm peyman nimerik, ouswa bouz Gouvernman dan en sistenm totalman nimerik. Sa *e-Government* i deza sa fondasyon, sa striktir solid – ankor enn fwa parey mon dir, sa *backbone* pou konstrir sa devlopman lo la.

E Mr Speaker, an 2022 *Business Inside Africa* in pibliy lalis Nasyon-z-Ini lo *Government Development Index*. E Sesel i klase trwazyenm dan pei Lafrik. Trwazyenm. Selman Moris – Sidafrik avek Moris ki par devan nou.

E pou mwan mon krwar sa i en pozisyonman ase signifikan. I en pozisyonman ki montre devlopman ler nou pe koz lo *e-Government*. Travay ki ozordi *DICT*. Me bokou son bann predeserer in fer. Bokou bann dimoun ki'n travay dan sa domenn. Bann diferan keksoz zot in met an plas a diferan letap.

E sa striktir *e-Government* ozordi i fer ki nou kapab *build* – nou kapab *build* bokou keksoz lo la. Nou kapab *build* bokou keksoz lo la e nou kapab avans bann azanda bokou pli inovativ ozordi, gras a sa sistenm ki la.

E ankor mon tourn ankor Mr Speaker, lo zefor ki'n ganny mete dan *training*, dan ledikasyon. Dan fer ki nou bann profesyonnel ozordi i kapab donn en koudmen, devlop sa bann diferan keksoz.

Me Mr Speaker, sa i pa sifi. Definitivman nou bezwen bouz osi avek letan aköz keksoz i sanze, keksoz i evolye. Nou bezwen bouz avek letan.

Alors ki bezwen arive Mr Speaker, pour Sesel bouz pli vit ver sa ki nou apel lekonomi nimerik. Mon krwar nou bezwen *improve* lavansman lenfrastriktir teknolozi ozordi ki nou annan.

I enportan ki nou kontinyen vwar loportinite, ki mannyer nou kapab entegre bann nouvo lavansman teknolozi ki annan atraver lemonn. E prensipalman – dan mon pwennvi pour mwan – prensipalman sa i devret ganny dirize *or driven* par sekter prive.

Kot nou donn sekter prive loportinite pou kapab anmenn bann diferan teknolozi ki ozordi

pe ganny servi dan bann gran, gran pei bokou pli devlope.

Sertenman Mr Speaker, enn ban keksoz ki mon krwar nou bezwen admet ki'n fer en gran diferans dan... E ki pou kontinyen fer diferans dan devlopman teknolozi. Sirtou teknolozi nimerik, se sa *under seekable* ki nou'n nobou anmenn Sesel. E nou annan koze ki i annan ankor pe vini.

E la *Intelvision* dernyen rer in anmenn en lot *Cab*. So tousala i pou ede devlop sekter nimerik Sesel. Fer desann pri. Fer servis pli vit. E fer akse par nou popilasyon enn ki bokou pli fasil, pli vit. E en leksperyans bokou pli akseptab.

Nou bezwen osi Mr Speaker, vwar kad legal kot tousala i fonksyonnen. I enportan. Kad legal i enportan aköz i etabli ki mannyer sa bann operater ozordi i fer biznes dan sa lanvironnman. Ki mannyer bann konsonmater - osi enportan, bann konsonmater. Bann dimoun ki pou servi sa bann teknolozi, i ganny serten proteksyon.

Souvandfwa nou war dimoun i konplent ozordi ki i fer en peyman atraver kart labank. Peyman i pase, selman i annan serten konplikasyon. Ouswa peyman pa pase, selman labank i tire. Apre i annan

diferan konplikasyon avan ki ou ganny ou larzan.

So nou ankor annan sa bann pti *glitches* dan sistenm kot ozordi bokou nou bann sitwayen, bokou konsonmater zot war zot fristre, pa satisfè avek serten – sirtou bann servis banker.

So nou bezwen bann kad legal pou kapab protez bann sitwayen. Mon konnen poudir nou'n fer Lalwa *Consumer Protection Act* an sa ki konsern bann *issues* finansyel.

Me nou bezwen vwar osi ki bann lezot kad legal ki nou kapab met an plas. Pou fer sir ki sa sistenm i enn ki solid, ki bous tou trou partou. Konm dir parey Angle i dir; ki *ridgid*. E ki kapab permet *the next level of* devlopman nimerik dan Sesel.

Mr Speaker, nou bezwen osi re ankadre travayer servis piblik osi. So i pa sifi zis pou dir ki ankor dan 18 mwan, *by 2025* nou bezwen kapab annan en *public service* ki 100poursan nimerik. E peyman atraver servis piblik i 100poursan nimerik.

Mon krwar nou bezwen re ankadre. Parey mon'n dir pli boner; nou sitwayen i byen edike; *well-trained* dan en sans pou kapab *embrace* nouvo teknolozi. Me selman nou bezwen fer sir ki nou re angaz e

re *train* nou bann travayer servis piblik pou zot kapab bouz dan sa laliny.

Nou bezwen osi Mr Speaker, pour le fitir ki vini, nou bezwen kapab revwar nou sistenm ledikasyon, pou enkli ledikasyon finansyel dan bann lekol.

I enportan. Mon konnen ti annan serten demars ki ti pe ganny fer avan bann lannen 2020, pou kapab entrodwir ledikasyon finansyel dan bann lekol. Mon pa konnen ki zistans sa in arive.

Enkilke sa dan bann *curriculum*. Rod en fason ki mannyer nou bann zanfan i ganny akse avek ledikasyon finansyel byen boner.

Ledikasyon finansyel, wi pou zot kapab konpran e manipil sa ki pou vini dan le fitir. Me osi pou zot kapab manipil e *manage* ozordi zot sityasyon finansyel.

Bokou dimoun ozordi ou war zot dan difikilte. Akoz petet lavansman dan teknolozi. Lavansman dan lafason ki nou depans nou larzan. Lavansman dan fason ki *marketing* i vin devan nou. Diferan keksoz i fer ki dimoun parfwa in pri.

E imen li menm i ankor an aryer avek lavansman teknolozi. So i enportan ki a en tre zenn az nou konmans

ekspoz nou bann zanfan avek ledikasyon finansyel.

E osi, i annan serten demars pe ganny fer. Me *à mon avis* Mr Speaker, i pa ase. Parfwa ou war en pti *text* i antre lo ou telefonn ki dir ou – ki koz *about financial literacy*, ledikasyon finansyel. Me pou mwan mon krwar ozordi Gouvernman an kolaborasyon avek Labank Santral, zot devret fer bokou plis pou enkilke ledikasyon finansyel parmi nou popilasyon.

E dernyen, me sertenman pa - parey Angle i dir; *last but not least*; lizaz ek kantite, ek kalite servis banker. Nou bezwen ankouraz dimoun pou servi plis servis banker. E nou bezwen fer ki bann labank i amelyor kalite servis banker ki zot pe donner.

Bokou bann – *well*, mazorite nou bann labank isi, pa bann labank ki zis Sesel. I bann labank ki afilye avek bann labank enternasyonal. E i annan bokou *practice* ki ganny fer dan sa bann labank enternasyonal, ki pa neserman pe ganny fer ozordi isi par bann labank ki pe *operate* Sesel.

So, nou bezwen ankouraz dimoun pou servi sa bann servis. Me selman nou bezwen ankouraz dimoun pou osi servi

– *sorry*. Nou bezwen ankouraz labank pou osi donn pli bon kalite servis.

Mr Speaker, sa direksyon ki nou anvi ale, i enn ki nou bezwen ale, Mr Speaker. I enn ki en progresyon konstrir lo bann travay ki'n ganny fer, ganny etabli dan lepase pou kree sa fondasyon neser.

So, nou *believe* ki fondasyon i la, in ganny kree, i solid. E nou bezwen progresse lo la. E i bezwen Mr Speaker, ganny fer tout an prenon kont bann keksoz - Par egzanp; ozordi nivo en formalite an term lanplwa e biznes. Nou bezwen aksepte.

E Biro Statistik Nasyonal in dir nou ki poudir i annan apepre 8mil204 an 2020. Apepre 16.9poursan nou popilasyon i ankor pe *operate* dan en sekter enformel.

So, ler nou pe dir ki nou pou bouz ver nimerik dan sekter piblik, nou bezwen osi pran kont ki poudir i annan en bon porsyon nou popilasyon, 16.9poursan – ki swa pe travay dan sekter formel, mazorite msye. Ki swa pe fer *sort of*, en biznes, ouswa en pti fason ganny larzan dan sekter enformel.

So ki mannyer nou *cater* pour sa bann dimoun ozordi ki ankor dan sekter enformel. Zot

pa neserman ilegal, me selman zot pe ganny zot dipen dan en fason - petet an deor en pti sistenm manner i ete.

So nou kapab osi pran sa an kont ler ki nou pe devlop, e nou mazin al 100poursan nimerik dan bann peyman, an sa ki konsern servis piblik.

Mr Speaker, boner in ganny fer serten referans – e la mon bezwen atraver ou Mr Speaker, dir avek Onorab John Hoareau ki; wi, bokou fwa Mr Speaker.

Onorab Hoareau, nou difere avek lafason ki nou vwar keksoz avek zot. Dan lapros ki manner nou, nou fer keksoz avek zot Mr Speaker. Dan lafason ki manner keksoz i devret ganny fer.

E nou, nou konnen Mr Speaker, e nou konvenki Mr Speaker konman Lopozisyon ki poudir zot konman en Gouvernman, souvandfwa zot melanz zot priyorite.

Annefe, mon pa pou al tro pli lwen lo la. Mon pou dir ki parfwa zot pa konn zot priyorite. E se sa ki ou war ki nou parfwa nou annan en lopinyon difere avek zot. Akoz nou pa krwar ki poudir serten priyorite ki zot anmennen, i neserman priyorite dizour. Ou konpran?

E la nou pou dezagree. Nou, nou war li en fason. Zot, zot war li en fason. E nou pou dezagree. E nou, nou – si nou krwar en keksoz i devret ganny fer en fason, nou pou bezwen met nou pwen devan.

Mr Speaker, ozordi bokou zot bann aksyon – malerezman Gouvernman i vize ver en serten group privilezye.

E dan son lentervansyon Mr Speaker, mon pe war ki direksyon Onorab pe ale avek sa. Bokou dimoun ozordi ler nou pe devlop sa bann zafer, se bokou dimoun ki annan abilite, ki annan biznes dan sa domenn ki pou pran lavantaz e ki pou benefisyé.

Ler nou pe koz etabli en platform pou tou sa bann zafer. Souvandfwa se bann dimoun – parey mon'n dir, ki annan larzan. Se dalon ki benefisyé.

So, si nou, nou war poudir keksoz pe al dan en direksyon, sertenman nou pou le valer, Mr Speaker. Sertenman nou pou le valer. Akoz nou santi ki dan lafason fer i bezwen annan keksoz -i bezwen annan lafason fer ki lamazorite Seselwa i war li enkilke e i form par ladan.

Ozordi Mr Speaker, bokou nou bann zabitan, *ok?* Mon'n koz lo bann diferan keksoz ki'n arive. Be bokou nou bann zabitan ozordi, Mr Speaker zot

priyorite pou mwan pa pe ganny adrese. Mosyon ki Onorab in anmennen i petet sa priyorite ki li i war ki li in dir i sorti dan Manifesto *LDS*.

Be bokou bann zabitan pa pe war zot priyorite imedya ozordi ganny touse. Menm ler ki zot lot kote latab zot pe koz lo bann gran, gran lavansman. Pou mwan zot fikse parfwa lo lekstravagans, me zot bliy en pti pe lo bann *basic* – bann keksoz ki ozordi Seselwa pe koz lo la, e Seselwa pe demann serten solisyon.

Wi petet pou avans en azanda peyman nimerik dan sekter piblik i enn ki bezwen ganny fer. Me eski i pran priyorite par lao sa bann fristrasyon ki ozordi bokou pep Seselwa pe koz lo la?

Pou mwan i annan en *gap* dan sa ki Gouvernman pe fer pour bann sitwayen, ki pe demann ozordi dan limedya, pou rezourd serten problem ki pe afekte zot lavi toulezour. I annan en gran *gap*.

Mon pa dir nou pa devret fer serten keksoz enportan, pou pei kontinyen bouze. Me mon pe dir annou fer tou keksoz dan en menm *pace*. Annou ferm sa *gap* dan bann sityasyon ki ozordi Seselwa pe koz lo la, ki afekte zot lavi toulezour.

E Mr Speaker, ler mon pe koz lo la, napa legzanp pli kler Mr Speaker, en? Ozordi tou sa bann leokri ki sitwayen dan *meeting* piblik in fer sorti lo linefikasite servis piblik anba Gouvernman *LDS*.

Wi, nou bezwen petet bouz dan en sistenm peyman nimerik dan servis piblik. Be i osi annan lezot keksoz dan servis piblik ki ozordi pe koz fristrasyon. Fristrasyon pep Seselwa. E Gouvernman i bezwen osi war lafason ki mannyer i adres sa bann *issues*.

Par egzanz Mr Speaker, bann sen, senp keksoz. Par egzanz kot Minis pa pe reponn let ek *email*. Sa i senp! Ou konpran? Petet nou bezwen rod en fason. Petet Mosyon i devret elarzi, rod en fason ki mannyer i annan bann sistenm nimerik

MR SPEAKER

Onorab ou pe larzman - ou pe larzman debord Mosyon la.

HON WALLCAE COSGROW

Non mon pa pe deborde Mr Speaker. Mon pe dir...

MR SPEAKER

Silvouple. Annou sey retourn...

HON WALLACE COSGROW

Mon pe donn bann sizesyon – bann sizesyon ki ler nou al dan sistenm nimerik dan *public service*, ki nou kapab adres serten bann *issues* dan *public service*. E pa zis servis peyman.

Bann letan kot bann Minis pa pe pran letan pou adres apwentman dimoun. Kot sitwayen pe rod en servis zot pe ganny fer tourn an ron.

Sa osi nou bezwen devlop bann lankadremman ki mannyer nou dil avek pou fer sir ki sitwayen i ganny en pli bon larepons, Mr Speaker.

Ankor kot sitwayen i rod servis sosyal. Ozordi bokou keksoz i lo papye. Zot ganny donnen en papye. Zot dir ou bezwen al rod sa, sa, sa, sa. Be annou rod fason ki mannyer pou nou *ease* zot lavi. Annou fer sa en fason nimerik, *digital* ki sa dimoun i kapab konekte ek isi, konekte ek laba. E i ganny sa lenformasyon.

E petet ni menm sa dimoun. E petet sa lazans li menm ler mwan Wallace Cosgrow mon vin devan li. I kapab tap sa, tap sa, tap sa, e i ganny tou sa lenformasyon ki i pe dir mwan ek en papye al rode. So, sa osi i en *avenue* pou nou kapab bouz dan en sistenm *digital*.

Pa zis peyman kot nou anmas larzan avek pep

Seselwa, me osi *digital* kot nou fer li fasil pour pep Seselwa. I pa gat son letan. I pa desann kot en biro pou li vin pas sepa konbyen letan. Apre pou li 2 mwan apre – 2 mwan apre Mr Speaker, ganny en larepons dir li; eskize. Ou konnen i pa'n aprouve.

So, sa osi bann keksoz ki nou devret pe gete, ki mannyer nou avans bann teknolozi nimerik dan servis ki Gouvernman i donnen. Me non pa zis servis peyman.

Mr Speaker, en lot pwen ki mon ti a kontan touse ozordi ki al ver ancor sa fristrasyon. Par egzanz, Mr Speaker; dan ladministrasyon Gouvernman. Ozordi en senp zofisye lapolis ki Praslin i pe ganny demande pou transfer Mahe. Ki tou sa lavi in Praslin. Ler in vini, nou pa ancor kapab *sort out* ki mannyer i pou desann ek son bann zanfan. Ki mannyer i pou ganny en landrwa reste. Nou pe deplas li *from* en landrwa, pou met li en lot landrwa, pou fer li vin kot en landrwa kot i pa abitye. E...

MR SPEAKER

Onorab! Onorab! *Order!*

HON WALLACE COSGROW

Mr Speaker, sa i bann...

MR SPEAKER

Order!

HON WALLCAE COSGROW

Sa i bann senp...

MR SPEAKER

Order, please!

HON WALLACE COSGROW

Non, be sa i bann senp fristrasyon. Si mon kapab kontinyen?

MR SPEAKER

Wi. Wi, Onorab. Be nou annan en Mosyon devan nou.

(Interruption)

HON WALLACE COSGROW

Wi, Mr Speaker.

MR SPEAKER

Silvouple! Onorab, nou annan en Mosyon devan nou.

HON WALLACE COSGROW

Ok.

MR SPEAKER

Annou pa servi li konman en leskiz pou relev tou kalite *issues* ki souvandfwa in ganny mete dan – devan piblik dan Lasanble. Mon ti espere ki nou kapab fer sa deba dan en fason kot nou annan en pli bon

standar respekte biznes ki devan nou.

HON WALLACE COSGROW

Nou annan standar.

MR SPEAKER

Onorab, selman mon pe remarke ou'n al 27 minit. Petet ou ti kapab konklir.

HON WALLACE COSGROW

Ok.

MR SPEAKER

Mersi.

HON WALLACE COSGROW

Ok Mr Speaker, donn mwan ankor zis en minit mon konklir, *hmm?*

MR SPEAKER

Mersi, wi.

HON WALLACE COSGROW

Mersi Mr Speaker. Mersi pou konpran mwan. Mr Speaker, sa ki mon pe sey fer konpran la, se ki wi i bon ki nou bouz dan peyman nimerik.

Me osi nou bezwen annan bann keksoz sistenm ki fasilite lezot laspe *public service* pou tir fristrasyon parmi nou popilasyon. Se sa ki mon pe sey vin *at*. Petet mon pa pe eksplik li parey zot anvi mon dir, me mwan mon dir li kri mwan.

Parey i ete, parey i bezwen ganny dir.

Mr Speaker, dan 30segonn, ozordi loter Mosyon – ler mon fer mon *summing-up*, loter Mosyon in koz lo Manifesto *LDS*, e promes Gouvernman *LDS* ver tou zanfan Sesel, Mr Speaker.

E mon enplor zot osi. In koz lo sa domenn nimerik. Lo sa domenn fer Gouvernman vin nimerik. Fer biznes vin nimerik. Mon enplor zot Mr Speaker, pou osi koz lo lezot parti manifesto.

E la mon pe koz sa parti ki dir logmantasyon reveni pep Seselwa, e partaz prosperite. Sa osi i en pwen ki nou bezwen koz lo la, e ki tou Seselwa i bezwen tande a en pwen pandan sa 5an.

Akoz pa reste bokou letan. Apre sa zot pa pou la. So mersi bokou Mr Speaker.

(laughter)

(APPLAUSE)

MR SPEAKER

Mersi. Silvouple. Nou a kontinyen avek deba. Onorab Herminie, ou annan laparol.

HON WILBERT HERMINIE

Mersi Mr Speaker. Mosyon pe demann Gouvernman pou aret servi larzan likid e dan tou

bann tranzaksyon finansyel. E bouz nimerik par ver 1 Zanvyè 2025.

Nou pe viv dan en lemonn globalize. I inevitab ki nou bouz dan sa direksyon, ki dayer nou'n konmanse bouze dan sa direksyon.

Gouvernman presedans ti kree *DICT* ki'n konmans bokou demars dan sa travay pou nou bouz nimerik. Menm si atraver ou Mr Speaker, Onorab Hoareau ek son tim *LDS* ti blok Bidze *DICT* an 2019, sa pa'n dekouraz zot.

Zot in kontinyen dan sa proses. La mon pe gete, zot in kree en *E-Service Gateway*, kot la i en platform nimerik kot mon war ou kapab fer bann akse – fer bann peyman *online*.

Mon war *Planning Authority*, *SRC*, *Ladwann*, *Licensing* – plizyer lezot departman ki ou kapab akse e fer peyman nimerik *online*.

Mon sey antre lo la. Premye keksoz ki i demann ou se; ranpli ou bann detay. Epi ou ariv kot sa bout kot ou fer peyman. I demann ou, ou bann detay labank.

En keksoz ki loter Mosyon pa'n demann nou, pa'n donn nou sa lenformasyon, eski tou labank i ofer peyman *online*? Sa en kestyon ki kekfwa taler loter

Mosyon i ava reponn nou dan son *summing-up*.

Si ou kapab – si ou servis banker i *provide* sa fasilite, *then* ou kapab bouz lo lot *step*. Lot *step* i dir ou koumsa i anvoy ou en *OTP* lo ou telefonn pou ou kapab konfirm peyman. *Ok?*

Prezan kestyon ki – kot nou bezwen demann nou si nou pe reste dan en lot pei. Nou en Seselwa *abroad*. Ki mannyer nou pou ganny akse avek sa *OTP* si nou pa lo *roaming?* En lot kestyon ki kekfwa taler loter Mosyon i ava touse. Ki mannyer ki sa bann servis...

Akoz in dir nou 1 Zanvye 2025 ki dan pa dan bokou letan. So i annan en bon pe travay ki mwan mon pe war, ki bezwen ganny fer avan sa sistenm i kapab vin anmars. *Ok?*

Ler nou pe get son bann bon rezon. Pou en sistenm koumsa vre, i *reduce theft*, vol, ou pa bezwen *carry cash*. Sekirite pour ou bann *asset* i pli fasil. I protez ou kont frod. Sa i bann bon keksoz ki sa sistenm i anmennen. E sa i bann nide ki dayer depi lontan Gouvernman oparavan ti'n konmans bouz dan sa direksyon.

Me kestyon ki reste; eski nou tou sa lasosyete nou pe bouz ansanm? Akoz ler mon pe gete, wi i annan dimoun ki

annan *smart phone*, i annan akse ek *internet*. Be i annan en kous nou popilasyon pa pe ganny akse ek sa bann sistenm.

Nou annan en telefonn ki i pa *smart*. Ki ou pa pou ganny akse avek sa bann servis. Seselwa napa larzan dan pos. So, mon pe gete, avan sa sistenm i vin an plas dan 18 mwan, ki sa Gouvernman pou fer pou me larzan dan pos Seselwa? Ki zot pou fer pour Seselwa ganny akse avek sa bann servis pli fasil?

Akoz, i pa fer sans ki en sistenm i vin an plas dan 18 mwan, ki lamazorite lasosyete pa pe kapab ganny akse avek. Akoz nou'n get – nou pe pran legzanp lo sistenm transpor piblik – *SPTC*, kot zot in *go cashless*.

I byen, in napa okenn problenm avek sa. Nou siport sa direksyon. Me problenm se ki akse ek sa servis ki difisil. Bokou dimoun pe konplent ki zot pa ganny akse avek kart. I pa *available* dan tou bann *outlet*. Sa ki problenm.

Nou bezwen *set* sistenm *up*, striktir, ki nou kapab ganny akse ek sa bann servis fasilman ki nou pa bezwen pran en lakoler pou nou kapab antre lo en bis. Bokou dimoun pe ganny kit ater.

Sirtou bann dimoun ki pa servi bis toulezour, ki bezwen akse en servis ki dan en serten letan, ki pou bezwen...

Son loto in fre, i bezwen pran en bis pou li retourn se li. I napa fasilite pou li kapab akse. I napa fasilite pou li kapab mont lo en bis, *unless* i konn en dimoun lo sa bis sa dimoun i a pey avek son kart. Li i a donn sa dimoun larzan.

So, i montre ou en serten problemm avek sa lankadremman ki zot pe sey vin avek, ki mwan a dan *mon avis*, 18 mwan i pa en *time frame achievable*. Mon pa konnen akoz zot pe tay deryer sa. Kekfwa sa i a vin ankor en lot *massive achievement*. Mon pa konnen. Sa taler loter Mosyon i a dir nou, ki sa vites ki zot pe tay avek. Akoz zot bezwen fer sa?

En lot pwen, Mr Speaker, i sa kote kad legal ki vin avek. Eski Lalwa in pare dan 18mwan pou nou kapab bouz avek sa? Akoz la mon pe mazine. Ler mon pe get lo *E-Service Gateway*, i donn ou bann dokiman ki ou bezwen *upload*. E sa ou bezwen annan ou sinyatir lo la. Eski Lalwa in pare pour *digital signature*?

Sa en kestyon ki nou bezwen konnen. Ki zistans sa Lalwa pou ou kapab siny elektronik i ete? I enportan pou

nou konnen si nou pe vin bouz dan sa direksyon dan 18 mwan. Akoz paret mwan ki nou pe tay ek keksoz ki nou pe bliy bann ankadremman ki vin avek.

Akoz ler mon pe gete. Enn; bon pe dimoun i ganny peye dan lanmen. Mon koleg in dir pres 16poursan ki dil dan *cash*. Ki *mechanism* ki nou'n met an plas pou nou *solve* sa *issue*?

Fodre zot arete ganny peye dan lanmen. Fodre zot al ouver kont. Loter Mosyon pa'n touse dan sa direksyon. In kit sa en pe ouver. Kekfwa pli tar i ava dir nou, akoz i annan bokou dout ki mon war - bann trou ki...

Vre i en bon nide. Be kwa ki zot in met an plas. Eski tou *mechanism* i la? In pare dan 18 mwan? Sa dimoun pou annan larzan dan 18 mwan pou vin pey *online*? Tousala bann keksoz nou bezwen demande.

Seselwa i deza napa larzan. Bokou Seselwa i dir ou zot *cashless*, i deza *cashless*.

(laughter)

HON WILBERT HERMINIE

Prezan nou pe fer fors zot. Nou pe bour en keksoz dan zot lagorz pou zot al *online*, pou zot al pey *online*, kan zot napa larzan. Kan premye keksoz ki sa Gouvernman LDS ti devret fer se met larzan dan pos

Seselwa! Zot pa'n fer sa! Zot pa'n fer sa.

Zot in met larzan dan zot pos. Gro, gro *allowance* pour Minis, sa zot in fer. Prezan i dir ou koumsa vin pey *online*. Ou pou pey kwa *online*, ou napa larzan? Ou deza *cashless*, ou pou pey *online*. Fodre ou annan larzan pou ou pey *online*.

(Interruption)

MR SPEAKER

Order!

HON WILBERT HERMINIE

Mr Speaker...

MR SPEAKER

Order!

HON WILBERT HERMINIE

Lot kestyon ki monte ankor. Lot kestyon ki monte ankor, ler ou pe fasilite sa bann peyman *online* pou ou kapab akse sa servis; eski, eski nou annan akse avek sa *speed internet*? E nou konnen pri *internet* i deza vremen ser.

Kwa ki pe ganny fer pou fer desann sa pri? Akoz pou ou fer sa bann *process*, ou bezwen akse ek *internet* a en *speed* ki ase vit pou li kapab ganny *processed*. Akoz i donn ou en *loading time*. Si ou pa ankor fini fer ou peyman dan sa bann

letan, ou pou bezwen *start again*. Or ou peyman pou kapab ganny perdi.

So, ki sa Gouvernman *LDS* pe fer pou fer desann pri *internet*? En lot kestyon. Lot kestyon i bezwen ganny demande. Eski zot pe travay pou fer pri *internet* desann dan plas fer nou vin pey *online*?

Kestyon ki demande, akoz *most* sa bann servis i donn ou 40 segonn mon krwar. Wi, 40 segonn pou ou kapab fini fer tou ou tranzaksyon, *unless - otherwise* i pou rekonmanse.

So, kestyon nou bezwen demande; ki sa Gouvernman pe fer pou fer pri *internet* vin pli bonmarse? Nou pa konnen. Mon war zot in dir nou pey *online*, se tou. Seselwa pe skente. Larzan pa ase. Zot, zot pe dir nou vin pey *online*.

Pa ni donn nou okenn direktiv, lankadreman. *At least* ti a donn ou en pe nide par deryer kwa ki zot pe vin avek pou ankadre sa sistenm pou fer peyman *online*.

It begs to demann nou en ta kalite kestyon. Ou ganny en konpran? Akoz zot pe dir nou - zot pe koz 2 parol ek nou la. Zot pe dir nou bouz *online*, selman sistenm ki pou fer sa arive, pa an plas. E sa pa pou zanmen arive dan 18 mwan.

Sanmenm sa ki tou kou nou dir nou mefye zot. Nou mefye zot akoz, zot koz ek nou 2 parol. Zot dir nou koumsa pey *online*, selman sistenm pa an plas. Seselwa napa larzan. Ki manner nou pou fe peyman *online*?

Eski bann labank in pare pou siport sa sistenm? Nou pa konnen. Loter Mosyon pa'n dir nou. Nou bezwen zis *assume* ki i annan keksoz an plas. Akoz zot, zot in dir nou le 1 Zanvye 2025.

Mon pa konnen si sa en konversasyon deryer rido ki'n ganny fer. Ki prezan sa Mosyon in vin la pou zot met nou pare, sansyonaliz sa. Ki ler in vin 2025 – 1 Zanvye 2025, zot a dir nou sa i en lot *massive achievement*. Si zot kapab met en plak o bor li, zot ti pou mete tou.

Mr Speaker, mon osi annan en konsern avek sa dat le 1 Zanvye 2025.

MR SPEAKER

Onorab. Onorab, ou pe repet ou lekor.

(laughter)

(APPLAUSE)

MR SPEAKER

Silvouple. I annan en lareg dan *Standing Order* ki dir; deba pa devret repetitif. Repet menm soz. So mon pou envit ou pou konklir lo ou deba silvouple.

HON WILBERT HERMINIE

Mersi Mr Speaker. Non, mon ti pe zis fer mon pwen lo sa. Akoz sa – apartir le 1 Zanvye 2025 i ladan li.

MR SPEAKER

Ou'n fer li. Ou'n fer li.

HON WILBERT HERMINIE

Mon ti zis pe demande si sa in ganny - zot in koz lo la avan. Parey ler Minis Fonseka ti dir dan *meeting* piblik ki i ti krwar i ti pe ganny demande sa lot kestyon mon.

So mon pe zi gete si en keksoz ki pa'n fini *prearrange*. E nou, nou pe fini koz lo en keksoz ki *already cooked*. Sa ki ti mon pwen Mr Speaker.

Selman an terminan Mr Speaker, mon pou ekoute ki loter Mosyon i annan pou dir. E *from that* mon ava deside ki manner mon pou vote Mr Speaker. Mersi.

MR SPEAKER

Mersi. Mon pou repet mon demann ki bann Manm i evite kriy atraver lasal. E sa i en *warning*.

Mon deplore ki deba tou Mosyon i retourn lo menm revandikasyon, lo menm pwen ki'n deza ganny fer plizyer fwa. Mon krwar i montre en mank standar deba dan Lasanble. An di-z-an sa...

Ankor en *point of order*, Onorab Pillay?

HON SEBASTIEN PILLAY

Mr Speaker, ki manner ou kapab dir mwan ankor en *point of order*, prezan ki mon lev en *point of order*?

MR SPEAKER

En *point of order*, Onorab Pillay. Ale.

HON SEBASTIEN PILLAY

Sa i en mank respe pour mwan Mr Speaker. Non mon bezwen demann ou, akoz ou pa kontan mon soulev sa size anba *Order 8, when it comes* ki manner ou aplik Lalwa Lasanble.

MR SPEAKER

Ki ou *point of order* Onorab Pillay?

HON SEBASTIEN PILLAY

Mr Speaker, i paret mwan poudir ler lot kote latab i fer en deba, depi bomaten nou'n trankil nou'n ekoute. Zis a en moman ki'n annan lenteripsyon, i se ler Onorab

Hoareau in fer en serten *statement*. E deswit *Whip* lo nou kote latab in entervenir e sa in arete.

Pandan letan ki Onorab Cosgrow in fer son deba, ou'n tande ou. Ou'n tande poudir lot kote latab in kontinyelman enteronp Onorab Cosgrow.

Pandan letan ki Onorab Herminie pe fer son lentervansyon, i son drwa pou li fer son lentervansyon. Lot kote latab in ankor enn fwa kontinyelman enteronp li.

Me selman sa ki mon realize. Ler in ariv ler pou aplik Lalwa, ou'n aplik li lo Onorab Herminie. Ou dir li pou dir i pe fer repetisyon. Me par kont, lo lot kote ou pa'n dir zot naryen.

Dezyenmman, ou dir pou dir deba pe al dan en direksyon. E ou'n dir sa selman apre ki Manm lo sa kote latab in entervenir.

En Mosyon in ganny met devan Lasanble. Bann Manm lo sa kote latab pa pe atak personn. Zot pe fer zot pwen pase as i zot drwa.

Mon ti a kontan – mon ti ava apresye war ki dan sironstans kot bann lezot deba ki'n pase dan Lasanble, ou fer menm *statement* ler Manm lo ou kote latab *LDS*, i fer zot bann lentervansyon.

Me apre tou Mr Speaker, parey ou'n toultan dir mwan, ou ki deside dan Lasanble Nasyonal. Mersi.

MR SPEAKER

Mersi. Mon'n deza tann sa bann konplent avan. Nou reste lo deba. Bon, an konsiderasyon pour bann Komite ki annan travay pandan sa poz, mon pou pran poz lo deba la. E nou a kontinyen 2er apre midi. Mersi.

(BREAK)

MR SPEAKER

Bonn apre midi tou dimoun. Avan nou rebran mon ti a kontan konfirm mon lalis e fer sir ki mon'n ganny tou dimoun, e osi ferm li a se pwen. So tou dimoun ki anvi laparol, silvouple lev lanmen. Onorab Loze, Onorab Aglae, Onorab Lemiel, trwa sa kote. Onorab Labrosse ou ti'n lev lanmen eski ou annan- ou le laparol? Be mon'n demann ou pour lev lanmen. Mersi.

Onorab Labrosse. Onorab Woodcock wi i lo mon lalis. *Ok* i pa la pour li reponn lapel. Me mon a gard li lo lalis e mon a demann li ler i antre. *Ok*. Byen. Bon nou a donn laparol Onorab Labrosse.

HON RICHARD LABROSSE

Mersi Mr Speaker. Bonn apre midi tou bann koleg Manm Lasanble, bonn apre midi Mr Speaker, Madanm Clerk, Deputy e tou lezot dimoun ki pe a lekout. Devan nou ozordi i annan en Mosyon ki pe demann Lasanble - ki pe demann Gouvernman ansanm avek bann partener, pour fer en - pour seryezman konsider met an plas en plan mekanizm neserer ki apartir le 1 Zanvyè 2025 sekter servis piblik ek paraetatik i aret servi larzan likid.

Mr Speaker, Mosyon ki devan nou i annan son merit e osi mon krwar i ava, i vin - i merit vin en konversasyon pli ouver ki kapab enkorpor tou sekter dan pei. E dan menm laliny osi i kapab vin en deba - en lot deba kot parey i annan enn de *MNA* ki'n koze avan mwan bomaten, kot in vin en lot deba edikasyonnel lo bann fason fer dan servis finansyel ki mon krwar koman enn pti pei i pour fer nou dibyen.

Tou le lannen Lasanble Nasyonal, i zwenn kot i diskite e i aprouv Bidze pour diferan antite dan pei, nou vwar bann sonm ki ganny diskite e apre ki nou'n diskite i ganny aprouve e sa bann larzan li menm li, i retourn *back* kot sa bann

antite, kot sa bann departman pour zot zer sa bann larzan dan bann diferan depans ki sa bann antite i annan.

Ek domenn teknolozi ki pe kontinyen evolue dan tou son splander atraver lemonn, fason peyman ki pe vin pli vit, mon totalman dakor ki pei i merit mazin al lo sa laliny o pli vit posib ki i kapab.

Ler nou pe demann bann landrwa Gouvernman e paraetatik pour aret servi likid dan li menm, in osi pour ede dan bann demars osi ki larzan pa perdi ouswa bann lezot fot ki kapab arive, par zis vol ouswa koripsyon me osi bann fot imen.

Bokou pei menm bann dimoun ki vwayaze konmela, i souvandfwa pe servi zot kart elektronik parey nou dir *ATM*, ouswa bann ki le fer en tranzaksyon parey nou dir *online* i bann opsyon ki pe ganny servi konmela. E sa i vin diferan fason fer, e bann diferan fason fer peyman Mr Speaker.

Ozordi dan lemonn kot bann larzan swa pe ganny transporte, lamazorite ka par egzantp ler nou get isi Sesel nou annan bann landrwa ki zot pe fer bann tranzaksyon parey mon kapab donn en legzanp Providence, *SRC*, *Licensing Authority*, parey nou dir ler nou pe koz lo resours imen pe ganny

servi menm parfwa pour, pour ou transfer sa larzan - pour transport sa larzan, son drayver sa bann dimoun ki *escort* li.

Avek en tel linisyativ si i ganny met an plas ki par Gouvernman mon krwar sa osi, i ava ede osi dan bann demars resours imen kot sa bann dimoun osi i kapab ganny deplwaye dan bann lezot landrwa, oubyen dan bann lezot servis ki an demann.

Akoz en ler nou gete osi, par egzantp ler nou get mon pe donn ankor *Licensing*, son ler fermen, enn de dimoun parfwa i demann kestyon lo la. Rezon ki kekfwa ki *Licensing* i bezwen ferm boner, aköz i annan son prosedir pour li al fer son *banking*, kot la mon mazine kekfwa avek en tel servis parey ek en bon sistenm an plas, sa osi i kapab *facilitate* zot osi pour zot kapab balans zot larzan byen osi, kot kekfwa dan plas ferm 2er kekfwa dimoun ti a ganny enn pti pe plis letan osi pour zot kapab fer zot bann tranzaksyon.

Mr Speaker, nou bann servis in enn ki'n tradisyonnelman - in tradisyonnelman servi larzan likid, tre pe kliyan ki annan swa pour servi zot kart elektronik. Menm parey viziter ki anvi al vizit Zarden Botanik, mon

mazinen konmela zot kapab servi kart, sa osi i kapab ede parfwa osi, si zanmen i ariv okenn evantyalite dan sa ban landrwa kot nou konnen poudir nou larzan in *safe*, i annan en sistenm banker ki'n kapab anmas reveni pei dan li menm dan sa kote.

E osi mon mazinen osi ankor en fwa lo la i - ler nou pe koz lo servis peyman osi parey nou pe koz lo bann *software* ki annan konmela ki dimoun i kapab fer peyman, ki dan li menm li ler en dimoun pe fer son peyman i ganny son resi lanmenm, i ganny tou son zafer lanmenm, nou pa pe vwar nou ankor pe retourn ankor dan sa fason tradisyonnèl kot ou vwar en dimoun pe anmas larzan, apre ou vwar li pe vire pour li fer kaye resi, ankor en fwa nou pe koz letan la.

Me i osi parfwa annan son dezavantaz osi parfwa ler nou pe servi kart elektronik tousala mon'n met an kont, la mon pe lans en lapel ek bann lenstitisyon banker dan pei. Pour zot vin mazin - si zot in kapab mazin lo pour vin avek en sistenm kart mon krwar nou kapab komans osi la fer en konversasyon, oubyen en refleksyon lo en plan *b* avek fason peyman ler nou pe koz

redwir en pe an sirkilasyon larzan dan lanmen.

Akoz, aköz mon dir sa menm parfwa ler ou pe servi ou kart elektronik i annan bann konplikasyon osi parfwa ki dimoun i rankontre sirtou lo bann masin *ATM*, swa sa masin ozordi i deside pa pe marse, ouswa in deside pran ou kart.

Me parfwa letan in ariv bann letan kot en gran konze piblik, ouswa lanmen napa travay, e sa mon krwar i vin en pe lanbarasman osi parfwa pour bann dimoun kekfwa ki zot ti byen bezwen - zot ti byen bezwen sa larzan sa zour.

E la mon pe mazinen - la osi mon pe mazinen, ki dimoun ki ti bezwen son larzan ouswa pa pe kapab fer peyman pour rezon parey, ler mon pe dir plan *b* Mr Speaker ankor enn fwa, mon pe, mon pe koz ankor an menm tan ki teknolozi pe amelyore, pe evolye dan lemonn partou kote. E mon krwar bann dimoun dan sa bann domenn parey, mon krwar sa i osi en lot refleksyon ki nou merit pe mazin lo la.

Ler nou pe koz Gouvernman pour bouz lo peyman nimerik mon vwar osi Minister Finans enn de fwa zot bann partener - la mon krwar osi ki Minister Finans ek zot bann partener osi sa mon pe

koz Lasosyasyon Labank, Lotorite Servis Finansyel, menm *FIU* zot merit zwenn ansanm pour anbank lo en kanpany edikasyonnel osi.

Pa zis lo kote peyman nimerik, me osi lo bann, lo bann keksoz osi ki annan pour fer avek lavi finansyel.

Ler nou pe koz lavi finansyel swa sa endividi li menm, ouswa ledikasyon li menm ki mannyer larzan i ganny depanse dan bann antite, parske parey nou kontan dir nou tou sa i nou larzan *tax*.

E parfwa mon santi ki i mank bokou ledikasyon lo sa bann kote parey. I annan dimoun kekfwa tre pe ki zot konnen kwa ki pe arive, kekfwa i annan dimoun ki mazin zis son lapey lafen dimwan ler i gannyen ki mannyer i pour depanse; me selman parfwa osi ler ou asize ou kalkile ou analize, ou vwar ki kekfwa i al enn pti pe pli lwen ki sa.

COVID-19 in montre lemonn en gran leson pandan sa bann dernyen lannen kot lemonn in soufer avek sa lepidemi, tou keksoz ti ganny fer dan en lot fason. Dimoun ti menm travay kot lakour, peyman osi ti ganny fer dan en fason ki pa ti en form fizik e la mon ti a kontan dir ki kekfwa la

osi, mon krwar in ler *COVID* in vini met en ta leson devan nou ater, spesyalman lo bann keksoz loperasyon ler nou pe koz lo finansyel.

Nou'n vwar nou menm ki mannyer keksoz ti fer enn pti pe pli vit, ou pa ti bezwen la fizikman parfwa. Me apre ler *COVID* i fini la, tou keksoz i retourn *back to normal*, parey nou dir *back to square one*. Me selman ankor enn fwa ki leson ki nou'n aprann ladan? Ler mon dir leson eski nou'n rod en fason, nou'n ganny en leson ki pour vin en keksoz pli inovativ parfwa kot li menm li, i kapab deservi dan en bon mannye.?

Me, ankor enn fwa parey mon'n dir tou keksoz in retourn normal, tou dimoun in met sa de kote.

Ler mon pe koze osi Mr Speaker mon osi rekonnet zefor ki Labank *MCB* in fer avek zot laplikasyon *MCB Juice* ki mon krwar sa i pe ed en bon pe dimoun, bann biznes e menm bann endividi ki fer li pli fasil pour zot tranzaksyon.

La osi mon mazine ki bann lezot labank osi i merit mazin al lo en laliny parey, pour fer lavi zot bann kliyan en pe pli fasil e osi Mr Speaker sa i ava ede osi dan tir en pe sirkilasyon osi, dimoun parfwa trafik,

tousala i en konsern parfwa ki nou pe koze.

E mon krwar nou merit - vre nou pe koz lo teknolozi selman parey mon pe dir mon krwar i en fason la a se moman kot pour nou kapab komans bann konversasyon - *well* Gouvernman i nouvo, *ok* tou dimoun pe mazin nouvo fason fer.

Mon krwar sa bann keksoz osi i merit enkorpor ladan kot ler - gete ki mannyer teknolozi i kapab ede osi pour fer lavi en dimoun pli, pli fasil. Par egzanp kwa ki fer mwan dir sa ankor? Si mon kapab donn en lot legzanp; par egzanp kot *Civil Status* ozordi, ozordi *Civil Status* pe ofer plizyer kalite servis, menm bann servis ki ou bezwen peye pour resevwar.

E ler nou pe koz zot teknolozi osi, konmela mon a donn en legzanp, si par egzanp en dimoun i desede, ou bezwen vin fer deklarasyon lanmor, ou bezwen sorti la al - sorti kot *Civil Status*, marse al ankor dan en lot biro.

Konmsi dan en sans kot nou pe koz teknolozi ozordi tousala ti kapab enkorpor ladan kot nou vin dan en *One Stop shop* parey nou dir.

E sa dan li menm i ava ede osi pour ankor enn fwa parey mon'n dir oparavan kot ava tir

en pe sa presyon resours imen, kot la nou kapab vwar bann dimoun osi ki kekfwa zot kapab ganny bezwen ankor dan en lot servis, kot nou pa bezwen vwar dimoun pe fer gran laliny parfwa pour bann servis.

Kot ladan menm li menm li i ava annan en fason zis - kekfwa en sistenm kot dimoun i vini i fer sa peyman, i konnen poudir, la mon fer sa peyman mon'n fini la, mon pa bezwen sorti la pour mwan sot laba, pour mwan al laba ki ankor fwa nou e koz lo letan li menm, ki i presye parey nou dir.

Mr Speaker, la osi mon byen kontan yer swar dan Nouvel lo *SBC* e mon'n tann Labank *Nouvobanq* osi, in met en nouvo kour ansanm avek *UNISEY* dan finans zis parey mon kestyon pour Minis Finans, ti pase semenn pase kot mon ti pe demann plis profesyonnel dan *securities dealers*.

Ki osi en lot veikil finansyel - kot mon krwar osi ki plis Seselwa osi la - *ok* vre mon kontan zot in met sa mars la pour dimoun vin *apply*, vin aprann. Me selman an menm tan osi, ankor enn fwa mon demande ki parfwa en keksoz ki mon remarke, ki i annan bann keksoz ki nou enplimante,

ouswa nou koz lo la ouswa nou'n vini.

La par egzant mon pe demann en legzanp parey sa bon linisyativ ki *Nouvobanq* in fer, me selman parfwa mon santi ki pour nou fer *marketing* lo la, pour nou fer dimoun konnen i annan sa la, kwa ki i pe enkorpor kwa ladan? Ki bann dimoun ki sipoze pe vin *apply* ladan?

So, mon krwar lo sa kote la mon krwar ki bann lezot *partners* osi, ler zot vwar en dimoun in fer premye pa par egzant *Nouvobanq* in fer premye pa, i merit annan bann lezot - en bann groupman ankor bann lezot dimoun ankor ki zwenn ansanm ki fer li vin pli for, kot nou senm sa, nou vann sa la deor kot tou dimoun ki annan en lentere; ouswa ki santi ki sa i kapab tous li dan en fason i ganny en sans pour li konpran byen.

Akoz apre tou ledikasyon finansyel li menm li, i en keksoz ki nou viv avek toulezour.

Mr Speaker, pour terminen, mon anvi aport mon sipor pour sa Mosyon e mon krwar parey mon'n dir i annan son merit. E mon ti a kontan ki Gouvernman ansanm ek Minister Finans zot, zot pran sa Mosyon tre serye ki *by* kantmenm pa le 1 Zanvye parey

nou dir, kekfwa nou ava dir en *short notice*, me selman o pli vit posib mon krwar ki i kapab ganny enplimante, i pour pli bon. Mersi bokou Mr Speaker.

(APPLAUSE)

MR SPEAKER

Mersi Onorab. Mon a donn laparol Onorab Loze.

HON JOHAN LOZE

Mersi Mr Speaker. Zis an pasan Mr Speaker mon'n tann Onorab mansyonnen, ki Gouvernman i nouvo, 2an edmi i ankor nouvo menm, tasyon fernwanr i fer zot dan semen, Onorab!

Mr Speaker. Mr Speaker, Onorab Larue i komanse la en, mon pa ankor ni komans mon *speech*. Mr Speaker si i annan en keksoz ki mon'n toultan leve dan sa Lasanble, koz lo la e pli boner mon *acknowledge* ki Onorab Hoareau, in fer sa rekonesans se ledikasyon finansyel. *Financial literacy*.

Financial literacy i senpleman abilite en dimoun pour li konpran e efektivman itiliz bann diferan zouti, talan, kapasite, pour manipil son finans *including* zesyon son finans personnel.

Non pa pour ou vin en ekonomis konpare avek sa ki Minis ti donn mwan, koman en

larepons dan deba Bidze, letan mon ti dir, Lepep Seselwa i devret sorti e servi tou zouti ki annan pour *attend financial literacy*, servi *Google*, servi *YouTube* Minis ti vini ti dir, ti fer riye ti dir avek *Google* ek *YouTube* e ou pa pour kapab vin en ekonomis, be mon pour repete sa parol, i pli meyer zouti ki en Seselwa i kapab annan *right now*.

E ankor mon osi yer swar mon vwar linisyativ ki *Nouvobanq* in pran e felisit zot. Mon kapab konpran osi *Nouvobanq* pe ganny *gérer* par en *Central Bank*, so mon konpran akoz petet zot aprezan ki *at the forefront of* sa. Menm si mon pa dakor sa zafer ki zot pe ankouraz dimoun fer *saving* dan labank, pour al ganny 2.2poursan lenter. Selman les li i en labank.

But, i kler ki nou annan en gran semen pour nou fer, nou bezwen edik nou pep lo kestyon finans, lo kestyon son finans personnel, lo kestyon depans me pli enportan ankor lo *budgeting*, ki mannyer nou depans nou *budget* personnel. Ki mannyer nou responsabiliz nou lekor?

E sa i vin doubleman enportan pour nou koman en nasyon akoz nou napa en tradisyon fer li. Ler nou napa en

tradisyon fer en keksoz, vedir nou pa pe pas li de zenerasyon an zenerasyon.

So nou kapab annan nou en zenerasyon Seselwa ozordi, ki an mazer parti i pe *live and let live*. I pe viv ozordi pour demen, e i napa sa tradisyon zer son larzan, zer son bann peyman, bidzet son depans, bidzet son lekor.

So ler paran napa sa kiltir, napa sa tradisyon sa pa ganny pase avek prosen zenerasyon.

So nou bezwen annan en komansman. Zis parey nou'n edik tou en zenerasyon pour aret manz torti, pour aret manz marswen, be in ler la pour nou edik en zenerasyon zenn Seselwa ki i bezwen bidzet son lekor, i bezwen konn zer son finans e i annan diferan fason fer keksoz.

Ou bezwen konnen ki ou kapab servi zis en poursantaz ou saler, investir en poursantaz ou saler, diran ou lavi, diran ou *working life* e si ava permet ou *retire* en pe pli boner, *être* endepandan.

i annan dimoun dan lemonn ozordi ki pe pratik sa konsep "*FIRE*" ki mon'n deza koz lo la dan Lasanble avan, *Financial Independence Retire Early*, ki pe pran zot *retirement* dan zot 30, 35 e menm ti en *burden*, lo sistenm pasyon pei.

Rezon mon lev sa Mr Speaker, set akoz direksyon ki mon tann Mosyon pe ale, ou pa kapab fer li dan labsans, konesans sa pep. Ou pour bezwen elev konesans nou pep pour bouz dan sa direksyon, ki Mosyon pe sizere. Akoz sa i pa vin zis avek en senp sistenm peyman, kot nou pour fer peyman anver bann diferan lenstitisyon Gouvernman elektronikman.

Be si nou pour fer li, swa nou bouz nou tou ansanm, ouswa nou pa bouz ditou. *If its worth doing* i bezwen *worth doing* pour Lanasyon Seselwa an antye.

Nou pa pour kapab annan person ki pe ganny kit deryer, nou pa pe kapab pe kit pe kit dimoun ater, pe kit dimoun deryer, kot pei i bouz dan en direksyon, apre lezot napa ladopsyon, *but even worse* i pa zis napa ladopsyon i annan rezistans. Dimoun i reziste.

So petet la mon santi mon kestyonnen, sa *timetable* 18mwan ki'n ganny donner mon vwar, mon pa konnen si mon poudir i pa mwan pa mon *timetable*, selman mon vwar li *its oddly specific*. So petet mon osi mon mazine petet sa i en desizyon ki'n fini fer.

Be eski nou'n kalkile enn;- ki mannyer nou pour anmas

tou dimoun? Ki mannyer nou bouz devan nou tou ansanm? *If it's worth doing, it's worth doing right! It's worth doing correctly!* So kan mannyer nou avans devan nou tou ansanm?

Kan mannyer nou met an plas tou bann *bits and pieces* ki pour neserer pour fer sa proze, vin enn ki byen e ki aport benefis pour nou tou?

Mon konnen enn nou konsern se ki enn nou elimin koripsyon, nou anmenn lefikasite dan sistenm koleksyon reveni Gouvernman. Deza i de benefis la. Ou tir depans lo lendividi, e posibleman fer kek *savings* kekpar e zeneralman annan plis larzan atraver Bidze pour depanse lo lendividi.

So there again, i bann keksoz ki pour bezwen ganny eksplike sa osi pour fer dimoun konpran. Nou pa pour kapab demen annan bann sityasyon, parey letan nou ti pas bann Lalwa ALM apre ti annan bann leksplozyon dan bann labank; ler labank ti pe komans met bann egzizans devan dimoun, ki ti form parti bann Lalwa ki nou isi anndan nou ti'n pase dan Lasanble.

So, i pour bezwen annan sa konponan ledikasyon. Be eski i annan letan pour fer tou sa ki bezwen ganny fer? Eski

pour annan letan pour met tou bann laspe regilatwar an plas pour nou al bouz dan sa direksyon? Mon konnen posibleman Onorab, dan son repons ava dir mwan ki se Labank Santral ki pour, ki pour azir koman regilater li menm.

Be eski sa pour ase? Eski Labank Santral li menm li i pour *going forward*, annan li sa konesans spesyalize pour li azir koman regilater pour sa nouvo direksyon dan sekter finansyel?

En lot laspe ki mon konsernen, ou - letan mon anmenn bann keksoz koumsa ou pou bezwen annan ou *dispute resolution*. Ou kapab annan *dispute* ki *incur over* en sitwayen i dir ou li in fer son peyman, Gouvernman i dir ou i pa'n resevwar peyman, mekanizm solisyon ant le de normalman i Lakour.

Mr Speaker, be konmela Lakour i fay! Lakour i fay konmela, mon en Seselwa parey tou Seselwa, menm si mon en Manm Lasanble Nasyonal, mon en Seselwa mon get televizyon, mon vwar Lakour pe donn lord.

Mon krwar i annan 6 lord la in donner. Lazans Gouvernman i inyore! I pa fer sa ki Lakour in dir li fer, so la prezan nou pe antre dan en lot zafer, la. Eski demen letan pour annan rezolisyon konfli, Lakour

li menm li i pour nobou ase for pour pran pozisyon kont Gouvernman, ki bann diferan lazans Gouvernman pour respekte?

Ouswa pour fer parey mon vwar pe deroule la, Sef Ziz i donn en lord, en lazans Gouvernman i inyor li? So sa i en pwen konsern.

Lot pwen ki mon annan, se ki nou annan dimoun Sesel ki ozordi *whether* nou kontan ouswa nou pa kontan, nou admet ouswa nou pa admet zot, zot mwen fortinen ki leres. Nou annan dimoun Sesel ozordi menm si zot pe *struggle*, avek de lanplwa, zot pe ganny difikilte pour fer de bout zwenn.

La mon pa pe koz ou dimoun ki, ki parese ki isi ki laba, mon pe koz ou travayer la. Mon pe koz ou travayer Seselwa ki vwar li dan difikilte. Ou menm annan ou dimoun, dan Sesel ki'n tous li 58an i pa dan en lanplwa - 55,57,58 - i pa dan en lanplwa, i pa pe tous lasistans e i pe vwar son lekor *basically unemployable*, akoz partou kot zot ale zot pa pe ganny akse avek lanplwa.

So en sistenm peyman elektronik, pli efektiv, e ou annan ou dimoun ki ou pour bezwen a la menm enstan osi rod ou en fason, swa elektronik swa ki mannyer pour ou zwenn,

ou sistenm peyman, pour zwenn ou sistenm *creditor*, ki ou deza annan e pour ou zwenn ou sistenm lasistans tou dimoun.

So how we go about it ki en dimoun, ki li i bezwen lasistans i a kapab ganny akse avek en sistenm peyman elektronik, ki swa son lasistans i a vin direk, lo la, swa i ava annan en form kupon elektronik?

Be en fason ki sa pei, i ava nobou kontinyen, pran ka avek sa ki pli dan bezwen. E la mon repete, sa ki pli dan bezwen, pa sa ki nou annan an se moman kot nou'n *end up at a certain point* ek zis 110, sepa 115 dimoun ki ti pe ganny asiste par en pei, ki ganny konsidere koman enn - posed enn bann meyer lekonomi dan larezyon. Sa i en keksoz ki pa akseptab.

I annan krim, pa zis touye ki krim, i annan keksoz i *unforgivable! So going forward*, nou pa get zis peyman, be nou osi menm evantyeleman fer nou en sistenm ki kapab tous tou dimoun.

Sa ki annan son larzan pour li peye, be nou pa egalman nou pa kit personn deryer aköz li i mwen fortinen. Annou pa kree de. Sesel, parey mon rapel lontan letan *SNP* ti asiz isi anndan avek tou son lentegrite ki *SNP* ti annan, ou ti annan

bann dimoun parey Onorab Nicholas Prea ti son gran parol sa, “i annan de Sesel”. Be annou pa kree sa de Sesel, ki *SNP* ti kontan koz lo la lontan.

En lot pwen ki mon leve Mr Speaker, se ki an se moman la ozordi nou pe koz en *electronic payment system*, nou pe koz *digitize* lekonomi Sesel, *digitize* peyman. Nou annan en sistenm elektronik, ki posibleman pe kit en gou anmer dan labous Seselwa, ki pour kapab pa ed sa sistenm peyman ki Onorab i le anmennen.

Nou annan en sistenm an plas ki nou dir i en *border control*, i en *electronic platform*, pour *border control*. E li sa sistenm li, Seselwa pa kontan li - dir mwan sa ki zot oule en - Seselwa pa kontan li, pa oule tann parle! Be pa sa le problem!

Le problem kot i vini, zot le anmenn en sistenm peyman elektronik, e nou'n deza annan enn, en sistenm elektronik pour *border control*.

Kot nou vwar nou anpaye la, sa sistenm ki egziste, Prezidan pa konnen konbyen i koute, enn. Prezidan i dir enn, lo son *website* i dir en lot, la. Nou sipoze annan nou en kont ki larzan i antre ladan e larzan i sipoze antre ladan, koman reveni Gouvernman. Nou

Lasanble Nasyonal, nou ti ganny refize ganny lenformasyon konbyen i annan dan sa kont, konbyen ki antre ladan? So nou pa konnen.

Deza nou'n mal komanse, nou deza annan en sistenm, ki mwan si ou demann mwan, pe mal ale, nou le anmenn en lot la e nou pa ankor kapab *resolve* sa enn ki nou annan.

E parey nou'n dir zot, pli o lenstans pei, pa konnen egzaktman konbyen sa i koute par tet. I donn en sif, *website* i donn en lot, i donn en poursantaz ki i dir sa i antre dan kof Gouvernman, nou Lasanble nou pa ganny ditou lenformasyon konbyen ki antre.

E la nou le anmenn en lot e nou annan enn ki nou pa kapab, anmennen deza. So, mon kapab mazine ki i pour annan dimoun ki pour anmenn en serten rezistans ki pour annan serten *issues* avek sa ki pe pase.

Mon pa pe dir sa an mal me mon pe dir li dan le sans ki Onorab mon krwar pour bezwen kalkile kantite louvraz, ki pour annan pour fer vizavi nou pep *right now* pour anmenn lakseptans- pour anmenn en *proper buy-in*, pour *convince* tou dimoun.

Posibleman sa konba pour enn pti pe pli *uphill* ki

mon'n tann li pe eksplike taler, ki mon'n tann li pe eksplike pli boner. Prezan ou annan en kantite dimoun Sesel, e sa SRC in koz lo la, Minister Finans in koz lo la, ou annan en kantite dimoun Sesel, ki li i pa dan lanplwa formel li. I pe fer son deboury par kote, swa i peser, swa i pirat, swa i pe koud kot li.

Kan mannyer zot ganny touse, par sa ki pe ganny propoze ozordi? Ki mannyer zot aksed avek sa bann keksoz, si zot, zot pa ankor antre dan sa lemonn? E akoz nou pe koz en porsyon signifikan nou popilasyon, e nou pe koz en porsyon nou popilasyon, ki ekonomikman aktiv, menm si zot dan lekonomi enformel.

Me Roupri enformel li, napa diferans ant li ek Roupri formel, i pe *still* sonny son fanmir sa boug. So, i annan tou sa bann konsiderasyon ki nou pour bezwen gete *going forward*.

Prezan ki mannyer eski nou balans keksoz? Mon'n tann bokou diskisyon lo *cashless* verses *cash-lite*, mon'n tann koz lo *cash* li menm, i annan en keksoz ki pe pase dan lemonn. Komansman premye 2 mwan sa lannen, in vwar bann Labank Santral atraver lemonn aste en rikord *gold bullion*.

Bann Labank Santral atraver lemond pe aste lor pour met dan zot rezerv, e pour zot fer sa zot pe *divest* zot lekor avek Dolar Ameriken. E la ou annan ou bann pei parey Sengapour, Latirki, Larisi, Lasin ki mon krwar zot in konsonm en total apepre 125tonn ant Zanvye, Fevriye.

In annan en pe lavant dan Me par la, me sa ti bokou bann pei ki dan *Ex-Soviet Union*, posibleman i annan pou fer avek lager laba. Ou konnen tou keksoz ki nou fer, nou bezwen annan balans.

Nou pour al elektronik, nou pour annan en sistenm peyman elektronik, posibleman *eventually* nou pour annan lamazorite nou bann lesanz elektronik. Akoz nou pa pour kapab komans ek peyman Gouvernman, fini lanmenm.

Be ki pour arive avek dimoun ki li posibleman i ti a kontan annan en keksoz pli sibstansyel dan son lanmen? Kan mannyer eski nou etabli balans pour en dimoun? E mon konnen i annan bokou Seselwa ki li i ti a kontan annan plis kontrol, plis keksoz tanzib dan son lanmen, pour li servi koman son mwayen desanz.

E tousala i bann balans ki nou bezwen etabli. Rezon mon'n lev sa zafer *gold reserves*

bann diferan Labank Santral, akoz sirtou parmi bann pei *BRICS*, i annan bokou pei ki pe komans kalkil lo - komans fer sorti bann *gold standards* dan zot *currency*.

E bokou sa bann pei, i bann pei devlope, bann pei ki annan bann bon lekonomi e zot pe desid fer sorti bann *coin* an or, pour sa lenvestiser ki li i anvi, investir dan lor, me pa neserman swa *afford* en bar, en *brick* ouswa en kilo me en *coin*, 2 *coin* en dizenn *coin* depandan lo son, lo kwa ki *afford* e servi sa koman en *medium of exchange*.

E mon pe, mon pe zis dir sa koman en fason lo ki mannyer nou etabli balans. Nou pe al elektronik, eski nou al pirman elektronik, e nou pa balans li ek nanryen? Ouswa nou etidye bann model ki bann lezot pei ki deza pli avanse ki nou elektronikman, be ki'n dir *ok* be annou pez en fren en kou la, annou komans annan an sirkilasyon bann *gold standards* ki dimoun i kapab aste, met dan zot kof dan labank, kit kot zot, *whatever how they wish to*, be zot annan en keksoz dan zot lanmen ki annan en valer pour zot.

E si demen i ariv okenn keksoz ek okenn lot keksoz elektronik sa dimoun i konnen i

kapab annan li en keksoz dan son lanmen. Mon konnen Mr Speaker sa ki mon'n dir la i pa strikteman lo Mosyon, be i en propozisyon ki mon ti pe fer.

Mr Speaker, selman mon pwen final ki mon le fer. Koman en nasyon mon krwar, mon senserman konvenki, ki nou priyorite i devret lo okip nou pep, nou priyorite i bezwen lo ed nou dimoun dan sa pei, pa zis lo batiman, lo *flashy things* ki nou tay deryer.

E dan tou sa ki nou fer i bezwen ganny fer avek en bi antet se pour ed sak Seselwa ki bezwen led e soutyen. Fodre nou *focus* lo la sa! I enportan, fodre ki nou retourn lo la koman en Nasyon, mon pa pe dir Gouvernman ki pour fer mwan, zot kapab swazir pour inyor mwan parey zot abitye i vin *at your peril*.

Be fodre nou retournen, ede e asiste nou dimoun. Mon swete, mon konnen zot in fini deside, mon konnen sa in fini *basically* fer, mwan swete i pa vin parey *cashless SPTC*, kot bokou dimoun in ganny difikilte, mon swete zot tir en leson dan sa ki'n arive, avek zafer *SPTC*, ki sa nouvo platform ki zot pe propoze i a vin bokou plis *smooth*.

Mon egalman swete ki tou keksoz pe ganny fer an

bonnfwa, ki napa personn pe *lurk* par la dan koulis, dan koridor ki'n pare pour tyonbo pour li pour tay avek. I annan lanons ki ti ganny fer lo kestyon *fuel*, ti pour donn *tablet* bann drayver, bann drayver ti pour zis al pran *fuel*, ti pour nepli annan kupon, ti pour elektronik, ti pour isi laba.

La in ariv en lot zistwar la, kot Victoria North, mon pa konnen si zot in vwar, mwan mon'n enn pti zwazo in pase in dir mwan la, i en keksoz bokou pli konplike ki tablet la. La in pli papye ki papye avan, *but* mon swete ki Gouvernman i konnen ki i pe fer ki ler zot fer sa bann lanons, zot mentenir zot deza annan zot plan e proze e fason ki zot kapab delivre lo bann keksoz ki zot dir zot pour fer.

Mr Speaker, mon pa'n vin ek lentansyon vin atake. Mon'n vini mon'n fer mon deba lafason ki mon'n fer. Mon demann leskiz si mon'n ofans okenn dimoun mon konnen letan mon koze dimoun pa kontan, be selman sa ki mon dir i bezwen ganny dir e si ariv ler poudir mon dir.

Mon remersye ou Mr Speaker, pour lapenn ou'n ekout mwan, mon remersi bann Onorab koleg osi. Mon swet tou dimoun en bon apre midi e en

bon kontinyasyon. Mersi Mr Speaker.

MR SPEAKER

Mersi Onorab. Mon remersye ou e osi mon remersye ou pour lapel ki ou'n fer ver mwan. Bon nou a kontinyen. Mon a demann bann ki reste pour koze pour obzerv en limit 20minit silvouple pour nou kapab terminen. Onorab Aglae mon donn ou laparol.

HON EGBERT AGLAE

Mersi Mr Speaker. Mon pour, pa pour long lo la, me selman mon krwar i enportan pour mwan osi aport mon kontribisyon lo sa Mosyon. Anvi ki i annan serten dimoun osi ki'n met zot konsern devan, devan mwan, lo sa size pour kapab vin a 2025 parey Mosyon pe sizere, *cashless* dan bann servis piblik.

Mr Speaker, premyerman mwan mon pour demann loter Mosyon petet en kestyon se akoz 2025? Kwa ki'n fer li vin ek sa dat 2025? Eski zis i pe *think* i dir *ok* pandan sa *at least* 2an lan edmi ki reste, se sa lapros ki i ti a kontan vwar 2025. Ouswa in deza annan en koze anvi ki li lo kote Gouvernman ki zot pe al fer sa apartir 2025?

Mr Speaker mon demann sa akoz sa size i en size ki

preokip en serten zenerasyon, ozordi. Dan nou sosyete ozordi, i annan en zenerasyon ki kapab, nou kapab dir *fully* nimerik, in fini konpran sa teknolozi li *ok*? E byensir bokou i ava dir, be ou ava aprann ou a konnen.

Me i annan en zenerasyon, ki i pa'n en zenerasyon ki'n ne dan letan teknolozi a lavansman teknolozi. Li i pa en gran group li, zot pe mon pe dir li dan lafason, zot pe o firamezir zot pe kit nou zot pe ale zot.

Nou bezwen annan sa balans akoz la nou le 12 Zilyet 2023, e apartir 2025 sa group zenerasyon ki mon pe koz ou ki dezavantaze, ki pa neserman nimerik, doue, bokou zot pour ankor la.

E malgre zot poursantaz i pour redwir anmezir ki sa bann zenerasyon i monte ki pli nimerik i ranplas bann ki pa doue nimerikman. Me selman nou pour annan nou en dilenm kot, ou pour annan en group ki pour ankor egziste.

S,o mon kestyon alor se eski *by* 2025, letan lenplimantasyon i vini, serten sa bann group dimoun, pou'n pare nimerikman?

Akoz ki petet parey zot kontan dir, la mon servi atraver ou, Mr Speaker, parol Onorab William o firamezir. O firamezir

ki nou popilasyon i annan sa tranzisyon, nimerik ki pe arive e bann ki bezwen antre ladan, sirtou bann nouvo zenerasyon ki pe vini kot ou napa swa, be ou bezwen antre ladan, san bliy osi sa enn kategori ki li i pour bezwen vwar li swa si nou fer lapros a la diktatir, mon bezwen dir li koumsa kot ou pour napa swa me ou bezwen bouz nimerik, e la i annan en group ki pour ganny kit deryer. E taler, mon pour koz lo de group, lo la.

E premye group se nou bann dimoun aze Mr Speaker. Nou tou nou konnen ozordi i annan bann benefis ki sa bann dimoun i gannyen byensir i egzize ki zot annan en kont labank e tou keksoz ki pas labank, e minim ki ozordi pe tous en larzan likid dan son lanmen. *Ok?*

E nou konn byen i enportan levolisyon. Nou pour bezwen evolye, nou pour bezwen al nimerik, me selman nou bezwen gard en balans aköz osi avek sistenm nimerik, i annan son danze. Taler mon pour tous enn pti gin bann danze ki atase avek. So, pour nou pa kree okenn *ségrégation* dan sa laliny, se sa ki mon pe dir o firamezir kot i konsern servis piblik, nou kapab entrodwir bann sistenm, be

selman i bezwen dan en lankadreman pa tay avek.

Akoz mwan dan sa kourt dele letan, mon pe *wonder* si tou lankadreman, pour pare pour kapab *accommodate* sa bann antite, sirtou ki resevwar reveni ki *require* pour fer en peyman pour son servis, ouswa ki pe anmas reveni parey nou bann sistenm taksasyon. Eski zot tou zot pare?

Akoz plizyer fwa ou'n antre dan serten sa bann departman, ou vwar serten difikilte rankontre pour ou kapab fer serten tranzaksyon. *Ok?* Parfwa i dir ou espere sistenm i *down* - menm labank i annan letan i annan lenteripsyon *they have to go back to manual*. Sistenm i *down* i annan bann *glitches*, aköz teknoloji zonm ki'n kree sa, i pour annan lerer.

So ladan nou bezwen osi reflesir lo sa pli gran portre lemonn global, kot i konsern nou sistenm nimerik finansyel, i annan en lager ozordi ki pe arive.

I annan en lager dan nou sistenm nimerik global, sakenn pe rod son fason pour li kapab met get *the big chunk of sa cake* li menm li, nou pe vwar sa. E lenpak sa lager i pour annan lenpak lo nou, lo ki direksyon ki nou bezwen pran aköz nou osi

nou annan bann tranzaksyon koman en pei, ki nou fer ek plizyer sa bann pwisans.

So an gro li menm li, nou pour napa swa dan en a lavenir dan lefitir me pour antre lafason. Bokou i dir poudir, i pour anmenn efikasite, redwir letan ki ou pour pran pour ou kapab fer tranzaksyon, byensir, me selman osi nou bezwen mazine avek sistenm nimerik ki nou pour antre ladan, kekyon se bann profesyon de karyer, ki tonm dan domenn *accounts* li menm.

Sa nou kapab annan bann, nou sa ki nou apel bann *accountant* e nou bann *account technician*. Eski sa pa vedir petet nou pour bezwen annan *minimum* teknisyen ki pour pe travay? Akoz nou pe bouz *digital* i fasil pour *manage*, en sel dimoun i kapab *manage* en sistenm li menm, ouswa pe resevwar e ale. So tousala i bann refleksyon.

E letan mon dir si nou nou'n pare osi, nou pran kont osi, sa laspe finansyel pour fer sa bann konversyon, pour met en sistenm an plas, ou pa kapab zis dir vini ou pe kree en kont la la, kont nimerik met en *POS* la non, i pa mars koumsa, i annan keksoz ankor ki atase avek.

I bezwen annan sa *oversight* li menm li, dan sa departman, kot ou bezwen kree en *unit* ki pe *oversee* ki tou keksoz pe mars byen, bann difikilte parey mon dir bann *glitches* preski minim, pour fer ki *run* efikasite akoz ozordi i annan sa ki nou apel *hackers*, *ok*.

Hackers e konmela zot *very organized*, zot vreman avanse e osi i annan ki form parti bann lorganizasyon kriminel enternasyonal. So si nou, nou kit nou lekor dan en staz vilnerab, nou pa avanse letan nou pe komanse, nou bezwen ganny *the best* teknolozi li menm li pour eparny nou kont zot.

Me osi ou bezwen annan sa *oversight* e la kot ou bezwen sa bann mendev *IT*, ki ou pe bezwen fer sir ou annan sa bann profesyonnel, ki pe bezwen *trained*. E ki kapab deteksyon *early detection* ki arive; en pe parey tou resaman nou'n tann en pti pe dan *case* zafer *Nouvobanq* ki'n arive, zot in monte eksplik nou ki arive. So, sa bann keksoz i la e *scammers* i la li ozordi.

So okenn keksoz ki kapab arive nou koman en pei, nou bezwen annan en sistenm *backup*, ki dan en fason i *secure* mon kapab dir sa, i *secure* akoz

Gouvernman i kapab leve demen bomaten, i kapab vwar leve tou keksoz in ganny *wipe out*, in *blackout* dan en fason.

So nou, nou bezwen, mazin dan sa laliny pa zis ale fer bann peyman nimerik pli fasil, nou bezwen mazin ankor pli lwen ki sa. *How far do we go?* Sa i kestyon petet ki nou bezwen demann nou lekor.

Osi *mindset* dimoun - nou pep. Akoz ozordi nou annan nou en group travayer, ki dan sistenm enformel zot osi e nou tou nou konnen ki Gouvernman li, *it's the biggest contractor* ki egziste ozordi dan pei; e pli *gro chunk of capital investment* se Gouvernman ki donnen.

So nou bezwen mazine poudir dan bann lezot servis i annan bann lezot servis afilye ki atase avek e osi sa enn ki'n, sa kontrakter - i bezwen bann *allied services* ki travay avek li osi. Tousala nou bezwen pran kont, *how* nou anglob zot dan sa monde global finansyel nimerik.

Akoz ozordi mon - semenn pase mon donn pasaz en dimoun ki travay dan sekter *tourism*, sirtou lo *boat charter*, e li i en kwizinyen. I dir mwan poudir, be konmsi dan sa *monde* nimerik ki nou pe viv ladan ozordi, keksoz parey

letan i ti sorti en *charter*, malgre nou pe koz lo sekter piblik mon pe donn en legzanp la.

I sorti en *charter*, i dir mwan, be lontan ler mon sorti en *charter* par semenn mon kapab ganny mwan apepre 500, \$600 *tips*. *Ok*, i normal. I dir mwan be ozordi, vini menm pour ou kapab ganny enn pti 100\$.

I dir mwan be akoz? Be kliyan, in fini pey tou son keksoz nimerikman an deor, e ler i vini i pe lwazir i pa bezwen vin ek larzan, i annan son *Mobile Wallet* ki annan tou son zafer ladan, ouswa i annan son kart kredi, ki fer ki menm si i ti anvi donn ou, kantmenm \$50, me i napa. I annan i nimerik, i pa kapab transfer sa ou napa en *POS* ou menm, pour ou resevwar sa ou menm.

So sa osi i bann refleksyon ki nou port atansyon si nou pour go *hundred percent* a lavenir nimerik finansyerman, kot pour napa okenn larzan ki likid ki sorti dan lanmen ki pour al dan en lot. Tousala.

Ki arive avek bann lezot - en dimoun ki vin travay, ki pour vin travay kot ou, mwan mon pe met sa devan mwan. La nou pe koz lo servis piblik, me selman nou pe mazin, akoz i pa pour fini la sa.

Once you go in the public service, numerical financially i pour transborde i pour bezwen tonm dan lezot sekter a lavenir, parey mon'n dir sekter enformel.

Si en travayer pe vin fer en zournen kot mwan ki mannyer mon pour pey li? Tousala i annan. E si lemonn i deside li menm li, al 100poursan nimerik finansyerman ki vedir nou sistenm monneter sa ki nou apel nou larzan likid, pour dir disparet. Disparet konpletman, la petet bann eksper ki ava donn zot bann lopinyon lo la, mon pa eksper dan domenn finansyel - *what will happen next?*

Sa i en *bigger* kestyon en portre ki dan mon latet, ki mon pe sey mazin lo la. So Mr Speaker, mon pa poudir Mosyon napa merit, i annan son merit, me selman i annan bokou preparasyon ki bezwen ganny fer. Akoz si nou pa pe prepar nou, e pour mwan sa 2025 ki zot pe met devan, *it's quite ambitious*. E mwan mon konnen poudir nou pa ankor pare 100 poursan pour sa. *But* nou kapab *start somewhere*.

SPTC nou vwar problemn ki'n arive avek *ok*. In lanse malgre ou'n donn dimoun, akoz natir imen sa. Menm si ou anonse tou kou i annan en

group ki li, i pa pe pran sa traka dan en sans, ziskan ler i ariv sa moman pour li servi sa servis, kot li i vwar li dan serten difikilte.

I normal dan lanatir imen, ou pa kapab pous tou dimoun ver menm direksyon. I annan ki fer son *diversion*. Lot problemn *Travizory, Travizory* i en keksoz ki ozordi bokou dimoun ozordi ki pe vwar, ki pe arive, e dan lentrodiksyon ti dir en e *border control* pour *COVID* fasil, me letan ou get pli profon, i parey en *spyware* ki'n ganny mete lo latet Seselwa pour konnen kot ou ale?

Kot ou pe – ki ou fer? Ki pei ou'n vizite? Ki kantite letan ou'n fer? Tousala i annan i parey sa, i en deteksyon. Petet wi, i ed pei dan en fason pour kapab trouv - anpes nou ganny targete dan en fason, avek bann move pratik kriminel, wi.

Me selman pour nou Seselwa nou menm nou, nou prop nasyon, sa legzizans ki i pe koze lo nou i pe kree serten lenkonvenyans. Sa nou tou nou bezwen aksepte sa.

En lot, en lot en lot pwen Mr Speaker, dan sa sistenm ki nou anvi enplimante a 2025, mon ti a kontan petet loter Mosyon i - si i annan en konversasyon, avek Minis Finans, ouswa Departman

Finans, ouswa si in fer en konversasyon ek okenn eksper teknisyen finans.

Akoz mon rapel Minis dan son Ladres Bidze ti koz enn pti gin ver sa, ver sa proze. Zot ti a kontan wi, nou ti a kontan vwar nimerik, sistenm pour anpese ki annan bann - pour anpes frod, pour anpes larzan perdi dan en fason.

Petet ladan konbyen ki pour kapab – konbyen ki pour kout pei fer sa balans pour kapab antre dan *full* sistenm nimerik? *Ok?* E zot in nonm par egzantp *business to business* ki Minis ti anonse dan Bidze. Kot i konsern *the POS system* ki *still* in anonse lan pase, ziska *maintenant* nou pa ankore kapab *fully fledge* en bon, en *proper* sistenm *business to business retail*, nou pa ankore kapab. Bokou –

SRC i dir ou i annan difikilte, avek pour kapab konekte ek sistenm, pour annan en pli bon *software* ki koute tou, tousala i larzan.

So, i bann senp legzanp kot nou pa ankore kapab fini fer enn, nou anvi taye ek en lot. Me selman i en laspirasyon zot Gouvernman, mon respekte sa. Si zot arive demen, me solman annou pran kont, poudir pour annan en group ki tou kou ki li ou pour bezwen annan serten

legzizans paramet pour ou kapab anmar - anpar li si li i pa kapab, ouswa i pa oze al ver sa sel direksyon.

So Mr Speaker avek sa mon pour termin lanmenm lo sa size. Mersi.

MR SPEAKER

Mersi Onorab. Mon a donn laparol prezan Onorab Woodcock.

HON WAVEL WOODCOCK

Mersi Mr Speaker. Mr Speaker sa Mosyon ki devan nou, i en Mosyon ki vremen enportan. Me i enportan ki nou met dan son konteks, ki Onorab Henrie in anmenn sa Mosyon. Akoz mon vwar bokou *attempt* lo lot kote latab, pour sey *distort* en pe rezondet Mosyon ki Onorab Henrie in anmennen ozordi.

Mosyon Onorab Henrie pe demande, i pe demann sa Lasanble. “Sa Lasanble i demann Gouvernman ansanm avek tou son partener stratezik pou seryezman konsider met an plas en plan e tou mekanizm neser pour ki apartir le 1 Zanvye 2025, sektor servis piblik e paraetatik i aret servi larzan likid dan tou zot fonksyon dan tou tranzaksyon finansyel”.

En Mosyon senp! En Mosyon senp, en Mosyon kler ki

pe fer en lapel avek Gouvernman ek tou bann partener Mr Speaker pour met en plan an plas, pour nou bouz lo sistenm nimerik; pour nou bouz lo parey nou pe dir kot Gouvernman i arete avek bann tranzaksyon likid dan Gouvernman dan bann *MDAs* e osi dan bann paraetatik, dan bann *public own enterprise* pour zot aret servi *cash* me selman ki tou tranzaksyon prezan i bouz, i al nimerik, i al *online* Mr Speaker.

E mon konpran le rezondet aköz sa Mosyon in vin devan nou Lasanble ozordi Mr Speaker. E menm si lot kote latab bann Manm in dir poudir a sa Mosyon i pa en priyorite, i pa nesese, nou pa ankor pare pour se, be zanmen nou pour pare pour nanryen Mr Speaker.

Ozordi lemonn antye pe bouz ver nimerik, pour en senp rezon Mr Speaker. E ozordi nou konnen lekel sa fleo ki pe afekte nou pei plis Sesel. De fleo Mr Speaker, pa enn. Enn annefe, se Mr Speaker ki'n manze e ronz nou pei e ronz Kof Leta sa koripsyon Mr Speaker.

Koripsyon Mr Speaker ki'n met bokou retar dan nou pei! Larzan ki nou ti kapab kolekte pour depans Gouvernman, pour fer plizyer bann proze, e pour nou soulaz nou pep e met

an plas bann program pour devlopman nou pei.

Mr Speaker larzan dan lepase Mr Speaker nou konnen bann diferan lenstans kot larzan in ganny mal zere, e nou pei in perdi bokou larzan.

E sa Mosyon Mr Speaker pe demann nou pour met an plas dan tou lebra Gouvernman, tou antite, tou *MDAs* kot zot kapab servi parey in mansyonnen poudir ozordi apre 95poursan bann *MDAs* pe servi *POS* sistenm, petet 2 ou 3 Minister ki pa ankor servi parey Gouvernman Lokal, e dan Ledikasyon. Me sa pa anpese pour annan tranzaksyon likid.

Akoz kot i annan tranzaksyon likid Mr Speaker, i annan bann dimoun ki zot lizye i sorti gro e zot anvi koken zot anvi tous larzan Mr Speaker.

E nou, nou anvi anpes sa bann keksoz kontinyen ronz nou pei, sanmenm rezondet sa Mosyon Mr Speaker. Kot bann peyman, bann tranzaksyon Gouvernman, bann Minister i *online*. I pa bann larzan *cash*, likid dan lanmen larzan ki en *ex- Minis* ti pran pour al mon krwar *Saudi Arabia* sepa *Dubai* mon krwar pou proze lakaz apre larzan ti disparet Mr Speaker!

E nou annan plizyer bann lenstans kot gro, gro sonm larzan dan *briefcase* in zis

disparet! Larzan Leta dan bann letan eleksyon ti pe monte, Consolation, Mont Plaisir dan *briefcase* pour donn dimoun Mr Speaker!

(APPLAUSE)

HON WAVEL WOODCOCK

Akoz nou Mr Speaker, nou pa anvi ki larzan Leta, larzan Leta aköz ler tranzaksyon i *online* Mr Speaker, likid, larzan likid pa dan lanmen. E nou'n vwar bann labi dan lepase Mr Speaker, nou pa Seselwa pa anvi vwar ankor Mr Speaker, kot son larzan i *end up* dan bwat takeaway pandan eleksyon.

Seselwa pa anvi son larzan i ganny servi Mr Speaker, kot ler letan eleksyon, laliny ti pe al kot Lorloz bann dimoun ki pa merit ganny *welfare*, pe met laliny e larzan pe ganny donner kot ASP. E nou'n vwar koripsyon dayer Mr Speaker ka pour devan Lakour.

Mr Speaker, dan lepase in annan bokou ki'n arive e nou bezwen fer sir ozordi ki larzan la i annan sa *paper trail*. Aköz ler i annan tranzaksyon i deroul online atraver bann *online banking system* Mr Speaker, ou vwar ou kapab *trace* sa larzan. E ozordi nou'n pas Lalwa POCA aköz *Proceeds of Crime Act* Mr

Speaker e ozordi nou kapab *trace* sa bann larzan kot pe ale.

Sanmenm sa Mr Speaker en lot fleo ki pe ronz nou Sesel se drog. Nou pe koz lo sekte enformel Mr Speaker. Nou pe koz lo sekte enformel, i annan en Manm ki'n koz lo sekte enformel in dir koumsa poudir sa Mosyon la nou bezwen mazin sekte enformel.

Mr Speaker sa Mosyon pe koz tranzaksyon dan bann MDAs, dan Gouvernman peyman bann tranzaksyon kantmenm zot pe koz ou sekte prive li. Apre tou Mr Speaker nou bezwen pran nou responsabilite osi pour ankouraz - Onorab Wallace Cosgrow in koz en pe lo sekte enformel, nou as bann Manm Lasanble Nasyonal e dayer li i ti *ex-Minis*, nou bezwen ankouraz dimoun pour fer keksoz vin legal, pour fer keksoz vin formel Mr Speaker pour anrezistre zot biznes, annan en *license*, pey zot *tax* pour kontribye osi dan lekonomi nou pei Mr Speaker.

MR SPEAKER

Onorab Larue ki ou pe fer...

HON WAVEL WOODCOCK

Ler nou pe koz lo enformel Mr Speaker...

MR SPEAKER

.. laplodisman

HON WAVEL WOODCOCK

Pli gro biznes enformel dan nou pei ozordi, se drog. Pli gro biznes e - Mr Speaker mon a prosede?

MR SPEAKER

Les Onorab fer son ladres silvouple apre mon a pran *point of order*.

HON WAVEL WOODCOCK

Mr Speaker ozordi gro, gro sonm larzan, milyon pe ganny dekouver dan loto, larzan likid an mouvman Mr Speaker. Ozordi nou bezwen fer sir ki nou sofgard kof Leta, nou pa pe koz pour sa peser, pour sa bazardye Mr Speaker.

Ou konnen si zot, zot ti *ok* avek lafason ler larzan likid ti lo semen, zot ti kapab fer tranzaksyon mannyer zot le, larzan disparet, donn bal, parey ti arive dan bann, dan ou Gouvernman presedan Mr Speaker nou pa pour toler sa dan sa Gouvernman nou.

E i annan en bann keksoz ki zot in dir pour sey *mislead* nou pep. Enn ki zot in dir sepa konbyen, mon krwar Onorab Herminie in dir sa, ou bezwen mon krwar 10mil ekek Roupri, R10mil pour ou kapab fer annan en kart visa.

Konmela tou labank, ou kapab annan R100 lo ou kont Mr Speaker, ou pour ganny en cart visa Mr Speaker, tou dimoun i kapab ganny en kart visa ozordi. Menm bann pli pti labank parey *Credit Union* Onorab Desheila in travay avek *Credit Union* ozordi zot annan *online banking*.

Lemonn antye pe evolue dan sa direksyon. Zot pe konplent zafer, zafer bis. Be partou kot ou ale aletranze konmela ou servi kart. Sidafrik ou ale ou servi *Uber*, *Uber* ou pey *online* Mr Speaker.

Sa i direksyon ki lemonn pe ale aköz i byen, si ou pou al Sidafrik konmela *Uber*, si ou dir ou pe pey *cash*, i pa oule vin sers ou aköz i pa fye pangar i ganny atake, dimoun i pran larzan avek li, apre i pli *safe* osi Mr Speaker.

Lontan sa bann zafer pour al fer *banking* dan Gouvernman, konbyen trik arive Mr Speaker kot en dimoun pe al fer *banking*, i aranze ek son zwer, i vini i atak li i dir larzan in ganny vole! In arive sa Mr Speaker.

I annan en kantite lensidan lo bis osi in arive bann fo tiket i ganny vann e konbyen larzan nou'n perdi? Nou koz – Onorab Henrie in koz lo *SPGA (Seychelles Park and Garden*

Authority.) Nou tou nou konnen bann keksoz ki'n arive.

I annan dimoun; i annan dimoun pa pey tiket pour antre, i pe antre i pey, pour antre Curieuse Mr Speaker, me la ler ou pey *online*, napa en fason ki annan bann trik ki deroule, ouswa en dimoun i pey *rangers* pour antre, olye aste en tiket.

L'Union Mr Speaker, L'Union pa ti pe fer en sou profi dan le pase depi ler nou move *online*, ozordi dimoun i kapab aste zot tiket *online*, ki nou vwar? L'Union pe fer profi.

Me, Zarden Botanik ankor en lot size ankor Mr Speaker, akoz i annan bokou larzan likid, larzan ti voltize, ti disparet Mr Speaker! Tousala Mr Speaker akoz ler i annan larzan likid, i annan en bann ki ganny tante parey mon'n dir ler zot vwar larzan zot lizye i le sorti Mr Speaker akoz zot tro kontan larzan Mr Speaker.

E nou, nou pe anpes sa ozordi, nou pe anpes sa bann vol dan nou pei.

Mr Speaker, nou bezwen fer resorti akoz i annan en Manm in dir en keksoz vreman enteresan, mon krwar Onorab Herminie si mon pa tronpe - dan son entervansyon i dir koumsa, *cashless* savedir napa larzan! *Ok*, mon konnen in byen lekol Liniversite Langleter, me

selman mon krwar Seselwa, pa'n lekol avek mer koulev! Mr Speaker ...

MR SPEAKER

Onorab! Onorab silvouple.

HON WAVEL WOODCOCK

Wi Mr Speaker.

MR SPEAKER

Mon pa le dir ensilte.

HON WAVEL WOODCOCK

Yes.

MR SPEAKER

Evite fer lakizasyon kont lezot Manm.

HON WAVEL WOODCOCK

Mon krwar Mr Speaker i pe kree en konfizyon deor. Akoz i pe konpran e mon bezwen fer Kreol deor konpran byen. Onorab Herminie i pa pe konpran ki diferans ant tranzaksyon nimerik ek tranzaksyon avek larzan likid Mr Speaker.

Let's say ou annan ou R10mil lo ou kont, parey tou le mwan, nou tou, tou le mwan nou resevwar nou saler lo nou kont, ouswa i annan dimoun ki'n ganny peye dan son lanmen, ouswa ou annan en R10mil lo ou kont ouswa R10mil lo ou lanmen dan ou lanmen.

I menm kantite sonm larzan Mr Speaker. Swa i lo ou kont, swa i dan ou lanmen R10mil Mr Speaker i R10mil. Me selman i lafason ou fer ou tranzaksyon ki diferan. Ler ou larzan i lo ou kont Mr Speaker, mon le fer peyman Mr Speaker, mon le fer peyman PUC, mon le pey mon bil, mon al *online*, ou swa mon al lo *website* PUC, mon fer mon peyman online.

Cashless Mr Speaker! Mon annan *cash* Mr Speaker, mon pa *cashless*, mon napa larzan. I pa vadir ki mon napa larzan, mon annan larzan solman i lo mon kont. I pa dan mon lanmen selman i lo mon kont.

Prezan Mr Speaker ki mon fer, mon al *online* mon antre lo sa *website*, mon si mon bil i ariv R300 mon fer transfer sa larzan, lo kont, lo kont PUC mon fer mon peyman normal. Ki mon pa bezwen fizikman mwan si mon reste Port Glaud sorti Port Glaud, pran en bis, gaspiy mon letan pour mwan vin met en laliny pour mwan pey R300mon bil PUC Mr Speaker.

E sa i ede koup kou loperasyon; i ede ou pa gaspiy ou letan, i fer tranzaksyon pli vit e ler mon pe desann pour mwan al fer peyman napa en boug ki pour vin tap mwan avek

en bekir deryer mon latet, pour vol mon R300 Mr Speaker.

Mr Speaker, sanmenm sa le rezon akoz ki ozordi nou Gouvernman pe deside, pour *move towards* – Gouvernman pe *move towards being cashless* pour nou servi sistenm bann tranzaksyon nimerik Mr Speaker; *Online*, *POS* mannyer ou le apel li Mr Speaker.

Akoz Mr Speaker dan nou pase, i annan sitan bokou keksoz, ki'n arive. E ozordi akoz le rezon ki nou'n amann plizyer Lalwa nou annan en Komite Anti-Koripsyon menm si dan lepase koripsyon ti en persepsyon. Menm si ozordi Mr Speaker ou vwar poudir nou annan *POCA*, *Proceeds of Crime Act* akoz nou tou nou konnen lafason pli gro fleo dan nou pei se sa *issue* drog.

E larzan i bouz an likid li Mr Speaker. Larzan i ganny lave atraver - larzan i fasil ganny larzan aste en loto, aste 2 loto, aste 30 loto Mr Speaker, mars avek ou ta larzan dan ou - deryer - dan ou keson Mr Speaker. Sa i bann keksoz ki pe arive dan nou pei ozordi.

E in annan *involvement* dan lepase, Gouvernman avek plizyer bann dimoun Mr Speaker, dan sa bann, dan sa bann zistwar la. Mon pa pour al an detay lo la, me nou konnen.

Ozordi sa bann larzan; larzan pe ganny dekouver in kasyet dan miray Mr Speaker, ansanm ek zarm osi in ganny kasyet Mr Speaker! Ennlèr mon pa konnen si ti annan plan pour fer koudeta - ou pa konnen tou sa bann keksoz Mr Speaker, *ok?*

Dan bann lakonpanyen *ASP* Mr Speaker. Nou'n vwar lo kart *STC* sepa konbyen larzan pa'n zanmen ganny servi, i annan en bann i annan biznes selman i annan kart avek larzan lo la.

Mr Speaker nou'n vwar bokou koripsyon, dan nou pei dan lepase. E nou Gouvernman i bezwen pran sa responsabilite, Mr Speaker, pour nou koup sa bann keksoz akòz nou pa le ki vol i ariv ankor ki zot bour zot lanmen ankor dan kof Leta pour vol larzan sa pep Mr Speaker.

E *DICT* apre tou – en bann i dir ah Onorab Herminie Mr Speaker in dir zafer get nou pe koz lo *DICT*, selman nou ti blok Bidze *DICT*. Mr Speaker, ti annan zis en rezon akòz nou ti blok Bidze *DICT*.

En zour bomaten ler tou bann travayer desann leve okip zot zanfan, met kot *daycare* desann travay, arive, alim zot *computer* portre Mr Faure lo zot

lekran, “vot pour Mr Faure”, Mr Speaker.

Pandan letan eleksyon! En labi Mr Speaker! Sa rezon akòz ki nou ti blok Bidze *DICT*, akòz i ti en labi, ou ti pe vyol drwa sa bann dimoun, en boug pa anvi vwar portre Prezidan Faure lo son *computer* li, i anvi vwar portre kefwà son zanfan, ouswa portre lanblenm Gouvernman. Pa portre en boug ki zot in mete akòz zot anvi i ganny elekte Mr Speaker.

Mr Speaker, *cashless* i en pe parey, i en pe parey en dimoun parey ki pa'n ganny elekte, me selman *still* in antre dan Lasanble Nasyonal. I annan sa tit! Sa tit i la me selman i pa'n ganny elekte, *still* i konte i en *MNA* Mr Speaker.

Mr Speaker, Mr Speaker si ozordi nou annan larzan lo kont piblik i konte Mr Speaker, ou en Onorab, ou ankor en Onorab menm si ou pa'n ganny elekte ou dan Lasanble, ou *still* en Onorab Mr Speaker. sa ki mon pe dir, pour zot konpran *cashless* mannyer i marse.

Si i annan larzan dan kont piblik ozordi, se akòz bon zesyon larzan piblik. Se akòz koup gaspiyaz e koripsyon Mr Speaker. E nou Mr Speaker parey mon pe dir, nou pa anvi bann pratik lepase retourn ankor dan nou pei. I annan en

Manm ki'n dir koumsa ki sa pa priyorite, i pa enportan, konsern Lepep Seselwa i pli enportan. Me sa i en konsern pour Lepep Seselwa Mr Speaker. Le rezon aköz Lepep Seselwa elekte nou se pour nou tir koripsyon dan Gouvernman Mr Speaker!

(APPLAUSE)

HON WAVEL WOODCOCK

Pour ki nou ava annan ase larzan pour nou fer bann program Gouvernman. I annan en Manm in dir koumsa, nou pa bezwen bann proze ozordi. *Ah!* Nou bezwen get nou priyorite. Selman ler pour koup riban premye pour arive zot menm.

Selman ler proze pe fini ti vizyon, ti plan Albert Rene Mr Speaker, be pran zot en desizyon! Proze nou fer pour byennet nou pep, pour devlopman nou pep, bann proze lapes ki pour ede, peser, non?

Tou sa bann proze ki nou pe fer, lopital ki nou pe fer, ki pour fer ki pour ede? Nou bann frer ek ser ki malad, zot kapab al lopital ganny zot lasante e retourn travay pour kontribye dan sa pei Mr Speaker.

Tou sa ki nou pour fer nou mazin nou pep Mr Speaker. Nou pa kapab vini ozordi, dir

poudir nou pe koz lo en Gouvernman ki *cashless* i pa enportan. Be – i *ok* i pa pour enportan, pour zot aköz zot konnen ki zot in fer dan lepase. Be nou, nou pa pour toler koripsyon ankor dan nou Gouvernman.

E se pour sa rezon Mr Speaker ki ozordi, sa Mosyon i devan nou Lasanble, aköz nou anvi fer keksoz pli byen, pli meyer, parey Onorab Vidot i kontan dir. E sa en Mosyon ki pour ed nou Gouvernman fer keksoz pli byen, pli meyer.

E mon enplor zot lot kote latab silvouple vin ansanm, partisipe, zot en partener stratezik zot osi pour nou koz lo sa plan, pour fer nou Gouvernman bouz *towards* en *cashless Government*, kot nou arete avek bann tranzaksyon likid. Me ki Gouvernman avek paraetatik nou bouz *towards* bann tranzaksyon *online*, bann tranzaksyon ki *cashless* pour anpese ki okenn dimoun ankor zot bouz zot lanmen dan kof Leta.

Avek sa de mo Mr Speaker mon dir ou mersi.

(APPLAUSE)

MR SPEAKER

Mersi. Mersi Onorab. Wi Onorab Loze ou *point of order*.

HON JOHAN LOZE

Mr Speaker, mon demann ou en leskiz ki mon bezwen entersedé a sa pwèn e deranz Lasanble. Mon ti sa Manm ki ti koz fortman lo sèkter enformel. Mon pa'n koz ni lo drog, ni lo droger, ni lo biznes drog. E mon krwar nou pe demontre en mank respe pour tou sa Seselwa ki ozordi i angaz koman son aktivite ekonomik dan sèkter enformel.

In tradisyonnel atraver listwar Sesel ki nou'n toultan annan dimoun dan sèkter enformel. *Now, whether* nou devret pran responsabilite e ankouraz dimoun pour pey en *license*, pour pey isi, pour pey laba, zis pour li egziste dan sa lavi ki pe depas li e *earn* en living pour son fanmir, sa i pa mwan ki poudir, selman nou pa kapab zis ensilte nou Nasyon akòz zot form parti sèkter enformel e asosye zot ek biznes drog.

Mon konnen Gouvènmàn ozordi i parfe, napa koripsyon dan Gouvènmàn, selman sa ki antre dan Larme *carer*, in vin kaptenn. Mersi Mr Speaker.

MR SPEAKER

Mersi. Sa dernyen, sa dernyen komantr pa ti neser e in gat,

in gat ou lentervansyon Onorab. Mon aksepté ki i annan en diferans ant sèkter enformel e trafik drog, petet Onorab Woodcock pa'n fer ladiferans kler. Mon pa konnen, me selman ou pwèn i mon krwar ganny note. Mwan a donn laparol Onorab Lemiel.

HON SYLVANNE LEMIEL

Mersi Mr Speaker. Bonn apre midi tou bann dimoun a lekout. Mr Speaker, depi bomaten mon krwar bokou keksoz in ganny dir konsènan en senp Mosyon ki'n ganny anmennen devan nou Lasanble.

E sakenn in al dan son direksyon, konsènan sa Mosyon. E petet nou bann dimoun osi ki pe ekoute la pe demande be kwa ki vremen nou pe koz lo la baze lo direksyon ki nou'n al ladan ozordi?

So Mosyon devan nou i pe dir, "sa Lasanble i demann Gouvènmàn ansanm avèk tou son partener stratezik pour seryezman konsider met an plas en plan e tou mekanizm neser pour ki apartir le 1 Zanvyè 2025 sèkter servis piblik e paraetatik i aret servi larzan likid dan tou zot tranzaksyon finansyel".

Mr Speaker, ozordi nou pe viv nou dan en monn global, e modernize, so alors i normal

letan ou pe viv dan en *monde* ki global nou pe modernize, alors nou pour bezwen – i annan en kantite evolisyon.

Larzan li menm in evolye li. Ki nou ti komans servi lontan? Ou konnen in vin sa larzan papye, in vin nou servi *cheque book*, nou servi diferan. Ozordi i pe koz ou *visa card*, i pe koz ou nou pey *online*, e tousala se evolisyon, dan fason ki nou fer bann tranzaksyon.

E Mr Speaker mwan a mon avi pour mwan mon vwar ki nou koman en pti pei Sesel, etandonnen ki nou pe devlop - nou osi vreman vit e mon krwar ki nou bezwen nou osi evolye avek letan. Nou bezwen fer sir ki nou pa reste deryer e ki nou osi nou form parti dan sa mouvman teknolozi modern e an menm tan dan sa fason evolisyon, an sa ki konsern bann sistenm peyman ki nou annan.

Me Mr Speaker, sa ki nou bezwen realize, tou keksoz ki nou fer, ki nou met an plas i annan son lavantaz e son dezavantaz, *ok?* Napa nanryen mal pour nou bouz nimerik, an sa ki konsern dan Gouvernman pour konsider zot bann tranzaksyon finansyel.

Me sa ki mon kontan, i se ki Gouverner Labank, ti fer resorti en pwen ki mon osi mon

totalman siport li san poursan lo la. Menm si nou pour bouz nimerik, nou pa merit zanmen get *rid of* nou bann larzan likid.

Nou konnen ozordi ki mannyer sistenm *internet* i ete. Akoz pour ou kapab fer bann peyman *online*, servi *visa card*, tou sa bann keksoz ou bezwen *internet*. E ki nou sistenm *internet* Sesel pe montre nou? Eski toultan nou annan *network*? Eski toultan *network* i marse?

Mwan kot mon reste Pointe Aux Sel dan distrik Au Cap, mon asiz kot mwan pour fer peyman *online*, me en bon pe letan ou ganny difikilte akoz i annan problemm *network*. Pli ki 6an, 7an in konplent problemm *network* avek *Airtel* ek *Cable* - i pa rezourd.

Ou gannyen sa bann problemm enn ler. Nou tou nou kontan asiz dan nou konfor kot nou *or wherever we are*, pour nou kapab fer en tranzaksyon oubyen en peyman *online*. Me eski toultan nou kapab abouti sa peyman, akoz nou sistenm *internet* ki nou annan?

Ozordi loter Mosyon mon'n ekout li byen letan i ti pe fer son lentrodiksyon son Mosyon. Loter Mosyon in fer nou konpran ki 95poursan *MDAs* ozordi i servi en *POS* system. En kestyon, oubyen

enn pti analiz ki ti a bon nou fer ozordi, dan sa 95poursan *MDAs* ki pe servi sa sistenm *POS* e ki dimoun i kapab pey en servis *online* - nou pe koz Minister la ki delivre en servis-eski letan sa dimoun, in fer son peyman *online*, eski sa servis li menm, peyman ale vitman li.

Meton fer krwar tou keksoz pe marse oubyen peyman ale vitman. Eski sa servi ki i gannyen an retour i osi i si vit e i sitan efikas?

Mr Speaker, sa i en keksoz ki petet mon ti a kontan, loter Mosyon nou sey gete si i kapab ganny fer en *sort of* analiz dan sa 95poursan *MDAs*, ti a bon nou konnen. Eski tou keksoz pe mars 100poursan byen letan zot in annan sa sistenm? Ki zot bann difikilte? Ki bann *weaknesses* ki annan avek sa? Ki fason pour amelyore pour fer li pli byen?

E mwan mon napa okenn problemm avek tou *MDAs* dan sekter piblik e paraetatik i bouz lo kote zot sistenm nimerik. E sa ki mwan mon pour rekomannde i sa ki sa servis ki *both* servis piblik e paraetatik pe donner, i pa tro dan paraetatik li, koman i servis piblik sa servis piblik la, zot, zot servis i merit amelyore e vin pli byen, e pli efikas pour nou donn nou bann dimoun. Pa fer

dimoun kontinyelman pe vir an ron, me nou bezwen fer sir ki sa servis i vreman – nou pe delivre, nou pe peye, dimoun i peye, peyman i al vitman kot ou, me ou pa fer son *file* ale/ vini, pour pran 3mwan, 4mwan avan ki i ganny en larepons. So sa servis osi i bezwen *as quick as* sa peyman ki'n fer, ki'n anvoy kot ou koman sa servis piblik.

Mazorite Manm letan zot in entervenir Mr Speaker zot in koz lo son lavantaz, i annan en kantite lavantaz, mon poudir ou i annan plis lavantaz ki dezavantaz, al dan en sistenm nimerik pour ou fer ou bann peyman.

Me selman letan nou gete, eski vreman letan nou pe pey *online*, eski vreman i pe redwir kriminalite?

Akoz nou konnen i annan dimoun ki'n perdi milyon Roupri atraver bann peyman *online*, ki'n pey pour en servis, la petet i pa dan servis piblik li menm. Petet i dan sekter prive letan zot pe fer zot bann tranzaksyon enport keksoz, ou vwar ki letan bann tranzaksyon peyman pe ganny fer, kot bann dimoun in *hacked* sistenm, milyon Roupri in ganny pran pa'n zanmen ganny retrouve ziska ozordi.

Menm si Lapolis, *FIU whatever* ki *involve* dan sa bann zafer fer resers lo la pour

regarde, pa'n kapab *retrieve* nanryen, pa'n kapab ganny okenn lenformasyon. So, i enportan ki nou sistenm tekno – (pardon) i enportan Mr Speaker ki nou sistenm teknolozi li menm, i vreman ganny ranforsi, i vreman – nou vreman sir ki nou sistenm teknolozi i pa pour fel, ki nou sistenm teknolozi i bon e nou kontinyen vreman amelyor li. E ki sa sistenm ki ava ganny met an plas ki loter Mosyon pe demande, i ava enn ki ava efikas.

E ozordi Mr Speaker, nou pe viv dan en monn ki nou dir demokratik. I annan la demokrasi, dimoun i kapab fer sa ki i anvi, dimoun i kapab koz mannyer i anvi fer sa ki le, la nou vwar sa sistenm nimerik ki nou pe – nou pe Lasanble pe demann Gouvernman, pour zwenn avek bann lezot partener pour met an plas plan ek mekanizm.

Me nou pa zanmen merit pe *dictate* petet dimoun, dan ki fason petet ki i pour fer, i pour fer son peyman, oubyen dan ki fason ki – aköz parfwa letan meton nou, nou pe dir servis piblik aret servi larzan likid Mr Speaker.

Mon vini sa zour mon – kot *Planning* de zour, trwa zour mon pa kapab peye *online*. Mon

pour bezwen desann kot *Planning* avek mon larzan petet pour mwan kapab pey pour mon plan. Aköz tousala i pour annan. SKe sa ki mon pe dir ki mon dakor avek Gouverner Labank dan sistenm kot nou pa merit zanmen *do away* avek larzan likid.

Nou merit toultan koman enn pti pei, nou konsider tou lede, kot ki kapab pey avek *cash* bann dimoun i servi son *cash* i servi. Parey ti annan legzanp – aköz la i annan – Mr Speaker fransman i annan bokou dimoun ki pe ekoute la apre midi la en! Depi bomaten i annan dimoun ki pe ekout nou, i annan ki pe anvoy en mesaz petet zot pe sey -dimoun pe *mix up* enn pti pe.

Sanmenm sa ki nou pe relir sa Mosyon dimoun pe *mix up* sa, sa deba enn pti pe aköz nou pe – nou pe al dan diferan *angle*. Kot i annan serten dimoun i dir ou poudir, be la mwan mon pey en dimoun mon fer vin koup zerb kot mwan, la si pe dir *go cashless*, pey avek kart ki mannyer mon pour fer? Konnen!

Dimoun pa pe vreman atrap sa zot. Zot pe riye kote *LDS*, wi! Koumsa zot ete zot toultan pe riye ekout le sans keksoz avan nou riye. Sa i nou dimoun deor ki pe mazin

koumsa, i dimoun deor ki pe mazin sa, *ok!*

E nou, nou la nou bezwen eksplike, zot, zot pour riye, wi. I pa en keksoz pour riye sa, nou la pour nou eklersi sa piblik an deor, pour nou dir li, be non, ou pour *still* ankor kapab servi larzan likid.

Sa ozordi nou pe koz lo bann servis ki *Planning* i donnen, lezot i donnen, e ki sa petet pe ankouraz sa bann landrwa pour zot, pour dimoun pey sa bann servis ki zot gannyen *online*.

En lot keksoz petet loter Mosyon mon pa konnen si ou ti'n ganny sans *enquire about*. Par egzanp ou annan de Minister en! I dir i annan Minister Ledikasyon e Minister Gouvernman Lokal. Zot, zot pa ankor antre dan sa sistenm, petet mon ti pour kontan konnen;

Eski sa de Minister in dir ki difikilte, zot pe gannyen pour zot koman sa de antite pour zot bouz lo en *Point of Sale System* parey bann lezot *MDAs*? Or konmsi enn pti – letan ki ou ti pe anmenn ou Mosyon osi eski ou ti'n ganny sans annan en serten enteraksyon avek zot pour zot dir ou ki *challenge* zot pe gannyen e akoz ki ziska ozordi zot, zot pa ankor bouz ver en tel sistenm?

So Mr Speaker an gro parey mon dir, en kantite dimoun tou Manm setaki in koz lo la, zot in dir dan zot fason. Me selman mon krwar letan nou pe koz dan plan ek mekanizm, nou bezwen wi enn mon pour siporte kot nou revwar nou bann Lalwa osi.

Akoz ler nou pe al dan sa fason parey mon dir. Bokou dimoun i perdi larzan en ler, nou bezwen fer sir nou annan en Lalwa ki for, kot fodre amann serten Lalwa *Cybercrime Act*, lezot osi nou bezwen vwar en fason pour nou amande, pour nou amelyore, e ki tou keksoz pe mars byen.

E apre en lot keksoz ki mon pour met plis lanfaz lo la, ki mon'n koz lo la sa *issue network* kot lapliparditan isi Sesel, nou ganny sa bann *networking* ki fel, ki nou bezwen fer sir nou travay lo la. E ki letan sa sistenm li menm zot pe mazin met li an mars, ki tou keksoz i mars byen.

E ki i pa vin annan okenn, okenn *issues* ki parey mon bann koleg osi in koz lo la, ki nou pe santi, in annan serten bann pti *hiccups* letan ou fek komanse avek en sistenm. Me ki keksoz i ava kapab deroul e mars byen.

So Mr Speaker mon pa pour long lo la. Avek sa de mo –

me selman avan mon fini i annan en keksoz ki trakas mwan. Parfwa toultan letan nou koze nou bann Mosyon en! Onorab Woodcock fek fini koze avan mwan atraver ou Mr Speaker, zot koz bokou lo koripsyon, *as if* koripsyon i zis lo nou kote latab ki annan, i zis lo nou kote latab ki fer.

Me sa ki nou bezwen realize ozordi la Mr Speaker, i paret mwan dan LDS ozordi i annan tou lanz ek tou bann Sen. Zot pa fer pese! Zot pa fer koripsyon! Zot pa fer nanryen ki mal, tou keksoz ki zot pe fer siperb! I byen!

Me selman i annan en santer ki dir ou, “si selman minwi ti midi, nou ti pour vwar bokou dezagreman nou!” Sa i zis *food for thought* Mr Speaker. Mon met sa la ater e mon pour fini avek mon lentervansyon. Mersi.

(APPLAUSE)

MR SPEAKER

Mersi Onorab. Mon ava aprezan apel Onorab Gervais Henrie loter Mosyon pour fer son repons e konklizyon.

HON GERVAIS HENRIE

Mersi Mr Speaker. Bonn apre midi tou dimoun ankore enn fwa. Mr Speaker dabor mon

remersi senserman tou bann MNAs ki'n entervenir lo sa Mosyon. In en loportinite pour nou partisip dan en deba lo en size, kot nou koman bann dirizan ki sorti dan kominote, ki reprezant le 26 distrik dan nou pei, pour argimante lo en lide ki en lanbisyon, ouswa en rev nasyonal.

E koman en pei i normal ki nou aspire pour nou met en sistenm an plas. E parey dan mon lentervansyon bomaten mon'n dir, i en keksoz ki lontan ti pe vini e sa Mosyon li pe senpleman demande ki i annan en keksoz spesifik koman en parti sa evolisyon ki ganny fer.

Dan mon lentervansyon, mon ti dir ki Mosyon ki devan nou, i senp. Mon mentenir sa deklarasyon, lo son senplisite, akoz i senpleman pe demande ki en fwa pour tou, tou tranzaksyon likid i arete dan servis piblik e bann antite paraetatik.

E i byen ki Onorab Lemiel in donn nou en legzanp pour sa dimoun ki pe demande be sa dimoun ki vin koup zerb kot mwan. Alor pour ou ki pe ekoute, mon ava dir li koumsa. Ler nou dir ki tranzaksyon larzan likid i arete dan servis piblik avek paraetatik i ler ou al dan en antite Gouvernman e i

annan plizyer ki mon kapab mansyonnen

. Ou pe al fer en *ID card* ou bezwen peye, ou pe al fer paspor ou bezwen peye, ou zanfani pe al vizit mize i bezwen aste en tiket, ou servi bis *SPTC* i bezwen en tiket, gard in donn ou en ticket R200 akoz ou'n mal park; ou ganny en tiket ou bezwen peye.

Tou larzan ki Gouvernman, setadir brans Egzekitiv pei i ranmase, nou, nou pe dir ek li, dezormen aret aksepte larzan likid. Sa dimoun i bezwen pey ou atraver en kart labank, ouswa i fer transfer sa larzan *from* son *account* labank pour dan *account* Gouvernman, ouswa i fer en *cheques* e dayer *cheques* osi pe aboli dan lemonn.

Alor sa ki nou pe demande se ki letan ou annan en tranzaksyon avek en antite Gouvernman, ouswa en *SOE* – (*State-Owned Enterprise*), ou pe al *IDC* pour al kot *IDC* akoz ou le al vakans lo zil - Silhouette par egzant, ou pa pey li *cash*, ou pey li avek ou kart. So – sa bann antite pa aksepte larzan.

E Mr Speaker dan konklizyon mon Mosyon mon ti dir ki, (la mon bezwen al lo paz 8 dan mon entervansyon orizinal pour mwan vwar ki mon ti dir) mon ti dir ki, kekyon ki sak Manm ki anvi entervenir

lo sa Mosyon i dwatet pe donn nou en larepons se eski i posib pour aret servi larzan likid dan servis piblik e bann lorganizasyon paraetatik dan sa prosen 18mwan? Eski i posib pour aret servi?

Si zot krwar wi, mon ti pe ekspekte ki zot donn bann lavantaz sa desizyon e ki size e ki size bann zofisye ki pe fer *policy* i merit pran kont e ki mekanizm zot merit met an plas pour asire ki okenn kous nou popilasyon pa pe ganny kit deryer?

E si zot krwar non zot merit dir nou ki opsyon Sesel pour annan, pour egziste dan en lemonn kot tou bann keksoz pe bouz lo platform nimerik.

E fransman Mr Speaker dan sa 14 lentervansyon ki'n annan, mon'n satisfè poudir bann Manm in depouye sa size, zot in, zot in seye reponn dan *best* fason ki zot ti kapab, poudir vwala bann konsern, i annan bann dimoun ki aze, i annan bann dimoun ki *disabled*, i annan Seselwa ki ava viv deor prezan letan pe anvoy en *OTP* – diferan bann dimoun ki dan sekter enformel.

So baze lo tousala e Lasanble in dir nou semenn pase, ki i annan en rapor normalman ki ganny fer e sa i ava anvoy kot bann Lotorite

konsernen e zot prezan bann *policymakers* ava adres sa bann size, ki ava enkli lezot keksoz ki mon pour pas lo la koman rekomandasyon, en pe pli tar.

So, mon satisfè poudir nou'n depouye, nou'n sey lev bann kestyon otour pour fer nou reflexir. Mon oule Lasanble avek piblik ki pe swiv nou deba ozordi, i reflexir ansanm avek mwan lo sa bann pwen swivan:-

Premyerman, Sesel i en pei touristik, nou kapab ganny ziska 350mil touris isi e lanbisyon pei se pour ariv ziska omwen 400mil ti dir nou lot zour? 450mil? Eski nou tenir kont ki mazorite sa bann touris pa mars avek larzan? Me zot pey tou keksoz avek kart e Onorab Aglae dan son prezantasyon in fek koz avek nou lo zafer *tips*, akoz zot napa larzan. So lemonn pe bouz dan sa fason.

Dezyenmman Sesel i en pei enportater, ki mannyer Gouvernman ek sekter prive i pey pour tou bann keksoz ki zot *procure from overseas*? Ki mannyer tou sa Kreol ki fer vini sa pake zartifay lo *Shein* kote zot peye? Mannyer zot peye? *Shein* Sinwan sa non? Anh i pey sinwan ek kart solman si mon dir li desann kot Biro *ID* pey ou *ID* ek kart i pour vwar sa en konplent?

(APPLAUSE)

HON GERVAIS HENRIE

I pa devret. I pa devret. Pei ozordi Mr Speaker, i bezwen servis en kantite det, la letan nou pe koze i tonm apepre *62.5percent of* nou *GDP*. Ki mannyer nou peye sa bann det? Mannyer nou pe rann sa bann larzan? Eski nou mont avek *briefcase* larzan an deor pei? E fini kont nou perdi \$4.5 milyon. Non! i en tranzaksyon nimerik.

Alor deza sa bann keksoz i an egzistans. Me le pwen ki nou le fer i se ki, wi i posib pour adopte en fason travay e nou koman Lasanble partikilyerman nou kote latab ki an mazorite, nou lapriyer ozordi nou pe dir avek nou parti ki osi dan brans Egzekitiv, pei, pour adopte sa stil administrasyon kot servis piblik e servis paraetatik pa aksepte okenn larzan likid. I en – i en lapriyer ki nou, nou pe dir dan en fason ki nou, nou le anmenn pei de lavan.

Prezan nou'n dir ki 95poursan bann *MDAs* ki kolekte larzan Gouvernman, ozordi pe servi en *point of sales* – (*POS*). E pour reponn kestyon Onorab Lemiel Mr Speaker sa de trwa antite ki pa pe servi akoz sa i en zafer negosyasyon

ki pe *spearhead* par Minister Finans, donk i par letap.

Akoz zot bezwen al negosye avek sa labank, negosye avek sa Minister, lekel ki pour ansarz. *So, it's work in progress* e i pe vini. E sa, sa dan mon prezantasyon mon ti dir mon konvenki ki di-si lafen sa lannen sa pou'n rezourd.

E an menm tan nou bezwen kalkil volim tranzaksyon aköz par egzanp en Biro Ladministrasyon Distrik, ki pe lwe detrwa sez pandan *weekend*, tousala nou bezwen asize pour balanse poudir eski i pour vo lapenn pour Mont Buxton annan enn letan (nepli - vwala arete tousala) so alor i annan *its work in progress* e i annan bann keksoz ki pe ganny konsidere. Donk i pe vini.

Be sa Mosyon letan nou – mon konfidan aköz tou bann Manm ki'n - laplipar ki'n koze in dir zot an faver, avek kondisyon ki nou adres serten size. Donk enn fwa ki sa Mosyon in ganny adopte ki mannyer aprezan nou pour anmenn sa konba?

Akoz dan kominote nou'n ganny dir, dimoun pe ekoute. Depi yer swar letan mon'n poste lo mon paz *Facebook* ki Mosyon mon'n komans ganny komanter.

Ki mannyer nou pour fer sir ki sa lide i ganny aksepte par popilasyon. Dabor koman en Lasanble, mesaz ki nou merit anvoy-e ozordi e byen for - permet mwan vin en pe poetik dan en refren byen armonize se ki irespektiv ou sityasyon finansyel dan lavi ozordi, sak Seselwa i bezwen – non mon a redir Mr Speaker.

I oblize, i oblize annan en kont labank. Aköz i bezwen annan en kont labank? Nou tou nou'n ganny - nou'n grandi e nou'n tann sa lekspresyon “letan dir”, nou bezwen ankouraz nou Nasyon pour fer sa demars. Alor la nou bann lenstitisyon finansyel, i oblize ed nou dan sa lanbisyon Nasyonal.

E mon ser o bor mwan Onorab Esparon in koz lo la byen bomaten. Se ki zot bezwen fer sa prosedir pour bann Seselwa kapab ouver en kont labank pli fasil. Nou konnen zot pe ganny difikilte avek sa zafer *proof of address* - zot in tir *MNA* prezan, nou nepli kapab ekrir en let pour prouve ouswa sertifye poudir Mr x i reste la, be pa mon'n deza antre dan lakaz Mr x mon'n asiz dan son salon, mon'n bwar en ver delo anba son lavarang?

Mon konnen mwan koman *MNA* ki'n ganny elekte

dan sa distrik. Menm *DA* zot pa pe aksepte, zot fer li difisil.

Avek en kont labank, annou asire ki tou dimoun i ganny en kart labank aprezan. Lo sa kart i pa bezwen annan li en tonm lanmonnen. Me i kapab – me i pa kapab napa nanryen.

E alor nou bezwen ankouraz li poudir frer, ou bwar 4 labyer tou le Sanmdi, dan en mwan i ariv ou pres R400 be pran R100 par mwan met lo sa kont. Dayer nou met R1.5milyon, nou vote, nou lev lanmen lo la. I vin dan *social program of government*. Pour kwa sa? I donn sa paran ler son zanfan i ne, i al labank i ouver en kont, larzan *taxpayers* Seselwa. Mwan mon kontribye, mon'n deside pa fer zanfan ankor, solman mon pe kontribye mwan pour tou bann pti baba ki pe ne. Nou tou nou pe kontribye non? I byen!

Me si nou pe dir pti zanfan pour annan kont labank, apre letan i gran nou dir li oubliy kont labank pa met en larzan de kote. Be non? Koman en Lasanble avek en larmoni byen armonize, annou ankouraz nou Seselwa annan en kont labank. Ki mannyer nou pour ganny enn pti larzan lo sa kart? Nou bezwen rod en lanplwa formel

Mr Speaker, kot nou ganny en saler.

LDS sa i parti ki nou sorti ladan, en! I anvi Seselwa i redekouver son pasyon pour travay, pour vin en Nasyon travayan e ki kiltir travay i ganny enkilke parmi nou popilasyon ki dezormen i form parti nou *DNA* koman Seselwa.

Mon pa konnen konbyen zot ki familye avek kiltir Ameriken. En Ameriken ler ou zwenn li premye keksoz i demann ou si ou travay? Bann – parey bann zenn garson la ki pe rod bann bouldou. Si ou pa travay ou pa kapab pey ou bil, bliye frer, napa pwente. Serye travay i form parti zot *DNA* e mwan mon reve ki nou vin parey Mr Speaker.

Onorab Cosgrow in enform nou akoz statistik mon pa ti'n vwar mwan, ki dapre statistik Labank Santral i annan 95poursan popilasyon ki annan en kont labank. Be sa en zoli komansman!

Alor eski i pa vo lapenn ki nou annan en lanbisyon ki san poursan nou Seselwa, i annan en kont labank. Touzour an sa ki konsern lanplwa. Ki mannyer koman en Lasanble nou vwar li akseptab ki dimoun ki travay, ankor pe ganny peye dan lanmen? 2023 nou'n arive! Ki mannyer koman bann zofisyete ki

pe depouy Bidze pei, nou pa koz pli for pour garanti ki *tax base* nou **Nasyon** i agrandi ki tou dimoun i pey son *fair share*?

Donk si ou dan en lanplwa formel, ou ganny peye en saler, ou a pey ou par, i annan kestyon pansyon pour tou Seselwa, ki tou Seselwa pe met en larzan de kote kantmenm parey mon pe dir R100 par mwan, pour letan dir. Ki plis Seselwa i pran konsyans son lavenir parey Onorab Loze in eksplik nou lo sa size, *savings* e lenvestisman.

Eski koman en Lasanble, nou pare pour vin ansanm e demande ki lamannman neseler dan Lalwa Lanplwa i vini, e fer li obligatwar ki tou saler i ganny peye atraver labank? I ti kapab en keksoz ki'n annan en lanbisyon koman en Nasyon. E ki i osi en kondisyon petet *license* bann lantrepriz, pour pey son travayer dan sa fason.

Larzan ou ganny peye, i transfer lo ou kont labank. Napa person ki desann avek en lanvlop, e bandi i atak li dan semen.

Mr Speaker koman en Lasanble, nou oblize eksprim pli gran konsern ki 16.9poursan nou popilasyon i dan sekter enformel. Lemoman arive pour adres sa sityasyon e

asire ki nou sorti, ki sa bann dimoun ki dan sekter enformel la, i sorti dan sa kwen kot zot ete e vin zwenn larestan nou ki pe kontribye formelman.

E menm zafer pansyon mwan mon trakase aköz bann dimoun enformel. Ler konsern i leve, lo bann group vilnerab - bann ki en pe *marginalized* parey ki dan sekter enformel, dimoun aze, dimoun avek dezabilite. Annou mazine ki sa revolisyon, ki Lazans pour Proteksyon Sosyal ASP ti anmennen an Avril 2021 - Avril 2021.

Nou pran kont ki manner, nou nepli vwar sa gran laliny dimoun aze kot bann pti bis ki parey bis *burger*, dan distrik kan in ariv le 20, 21 le 22 tousala in disparet. Aköz? Tou benefis ki ASP i peye konmela i atraver labank, transfer labank, nimerik.

Be in napa problem, pe pa'n regrese, in napa - konmsi menm dimoun si i malad, sa bann dimoun ki plis ki 100an, i annan en kont labank, zot pe ganny zot benefis. *If anything*, sa tonton nepli perdi son larzan sekirite dan bet.

Avan mon'n table sa Mosyon Mr Speaker, mon le reasir Lasanble e piblik ki pe ekout mwan ki mon'n konsilte avek bann akter dan sa

tranzisyon, ouswa progresyon ki Sesel pe fer, ki nou pe pas atraver parey Onorab Cosgrow in dir nou.

E se sa rezon ki mon'n *acknowledge* zot dan kontribisyon ki zot in fer ziska la. Mon reasir zot ki zot in dir mwan ki si sa *timetable* 18mwan i rezonnab e anfet napa okenn diskisyon ki'n ganny fer par deryer rido, ki konmsi i annan en keksoz ki pe vini. Non!

Letan nou, nou diskite en Mosyon, nou diskite li en Manm dan nou *Caucus* i annan sa nide, nou *bounce* li antre nou, e apre wi nou dan parti ki dan Gouvernman nou, nou pa kapab anmenn en Mosyon la ki pour may parti Egzekitiv zanbek. So nou konsilte avek bann partener dan sa sekter ki sa Mosyon i konsernen.

E nou'n annan en diskisyon avek Minis Finans, ki dir nou be ekoute be si zot swiv nou bann demars ki nou pe fer. E se sa ki dan mon prezantasyon inisyal, mon'n donn koman dir en *timetable* ki manner in annan en progresyon depi ler *LDS* in ganny elekte depi an Oktob 2020.

So, in annan en konversasyon e nou rekonforte ki i rezonnab e ki pei i kapab al

dan sa direksyon. Wi, nou bezwen aksepte ki serten kategori travayer parey *cashier* oubyen dimoun dan *accounts* i annan en risk perdi travay. E an fet bomaten letan mon leve, en mesaz lo mon telefonn en dimoun Praslin, in *text* mwan, i dir mwan be nou ki pour arive avek nou koman *cashier*.

Me lavi i touzour koumsa evolisyon e sosyete i fer ki serten dimoun ouswa serten kategori travay i disparet. Me ler nou demande ki le nesese i ganny fer vwala kot prezan sa bann antite ki konsernen i a bezwen investir dan *retrain* sa bann dimoun. Akoz zot zenn, zot bezwen sonny zot fanmir pour zot kapab rebran en lot louvraz, ganny en lot kalifikasyon, akoz sa i en prose ki nou pe pas ladan.

Donk mon a reasir zot poudir pa bezwen per, mazine letan sa ki apre *COVID* la ti fermen. Pa "*My First Job*" – "*URS*" pei ti investir dan *retraining* bann dimoun. E ozordi napa konplent bann dimoun in bouze, zot partou e mon kontan pour zot. So, i en pe menm zafer Mr Speaker.

Letan nou dir seryezman konsider met an plas en plan e tou mekanizm nesese, mon ti a kontan fer sa seri rekomandasyon lo baz sa 14

entervansyon ki'n annan depi bomaten.

Ki nou kontinyen investir dan lenfrastruktir *ICT*; setadir *Information Technology and Communication* pour enspir konfyans konsonmater an term sekirite e *reliance* sa servis.

E Onorab Lemiel i byen mon ti al en batenm Baie Lazare Dimans e ler mon desann sorti lanmes mon pe sey fer en tranzaksyon, bor la Fairyland napa ditou *network*. So nou bezwen amelyore sa, aköz i pour kout larzan ki dimoun in anvoye apre i pri dan milye, i disparet dan *Bermuda Triangle*.

Ki nou akseler ledikasyon finansyel. Mon dakor avek tou bann Manm ki'n koz lo la. I form parti *curriculum* lekol Onorab Kelly Samynadin in dir nou. Ki nou target bann adilt. Savedir bann *advert* lo *TV*.

E la mon ava eksprim en pe dezapwentman - zot rapel an 2018 sizyenm Lasanble nou ti annan en konversasyon avek Labank Santral ki ti entrodwir nou avek *the Financial Education* ki zot ti pe al *spearhead*. E zot ti eksplik nou tou bann detay, e mon ava dir poudir mon krwar zot kapab fer ankor bokou plis investir ladan e ki i ava annan - piblik i ava vwar plis.

Parski mon ankor tann zafer Seselwa i perdi larzan an bonnavini lo sa zafer anvoy larzan deor pour dimoun. 2023 in ler pour nou arete ek sa zafer!

Ki mannyer nou amelyor t ou bann kad legal dan pei pour asir legalite bann tranzaksyon nimerik, pour adres *grievances*? I annan en Manm lot kote latay, in koz lo la. E asire ki bann Lalwa avek regilasyon i azour.

E anfet bomaten en Manm ti koz lo bann Lalwa *Digital Signature*, mon le zis reasir sa Manm ki dayer ti annan en *Circular* Nimer 13 ki ti sorti an 2020, ki ti rapel tou bann dimoun dan servis piblik lo tou bann regilasyon – mazine sa an 2020 poudir sa zafer *digital ID* pe vini e vwala bann regilasyon avek Lalwa ki kouver sa sekter. Donk i deza dan domenn piblik sa.

E nouvo loportinite lenvestisman, Onorab Hoareau par egzanp in koz lo kekyon pour kwa pa en kart lokal olye ki larzan i kit pei, i al pour *visa*. E la alor i en loportinite pour nou bann zenn antreprenner ki atraver *NISTI* ki mon pe vwar bokou bann loportinite pe vini, pour zot met latet ansanm, rod en larzan avek *DBS*, ouswa bann lezot oportinite finansyel

ki annan, pour kapab fer sa bann prodwi dan Sesel.

Mr Speaker kekyon eski sa i priyorite? Wi i priyorite, yer letan *VP* asiz la, e i ti reponn Onorab Audrey Vidot lo kekyon nou pa'n ganny elekte pour fer pli byen, me pour *run* pei dan en fason pli efikas, ogmant *service delivery*, koup birokrasi, redwir gaspiyaz e koup koripsyon. Vwala priyorite e sa pti mezir ki nou pe demann servis piblik e bann *SOEs* pour fer, i en priyorite. Akoz?

Letan larzan i reste dan pannyen, se sa ki fer nou kapab partaz prosperite pei avek tou Seselwa. Akoz zot krwar nou'n nabou donn 10poursan logmantasyon saler resaman ki pli pti gin ti R1000, ki'n premye fwa dan listwar nou pei? Akoz koman nou'n vini nou'n bous tou bann trou kot ti pe annan *leakages* ki mon'n koz lo la bomaten. E i priyorite pour nou kontinyen.

E alor enn fwa ki nou aret met larzan dan lanmen bann dimoun dan servis piblik, ki i fer li? I kapab la i gete i mank en bouyon, i pran enn pti larzan dan sa *petty cash*, i ale i servi, akoz tanto i pour demann gran manman prete, demen bomaten i vini i rann.

Sa larzan pa pour mwan, pa ni pour ou, i sa bann kalite

pratik ki nou, nou pe dir nou bezwen sanze. Donk ler personn pa pe tous larzan, i a fer ki, pei i pli prospere e nou ava kapab anmenn plis bann devlopman an term servis, an term lenfrastruktir, ki Lopozisyon toultan pe dir i bezwen e ki nou osi nou krwar i bezwen.

Alor Mr Speaker, mon krwar poudir pep Seselwa i a konpran ki nou pe demande. Nou a repete ki zis ler ou al kot en servis Gouvernman ouswa en *SOE*, ki ou pa donn li larzan, me nou pa'n dir ki servis *public sector* li aret - nou pa'n dir sa nou. Non, non, non.

Larzan likid pour kontinyen. Anfet dan mon prezantasyon inisyal mon dir zanmen nou pour kapab elimin larzan. Savedir Sesel a vin en *cash-lite society*, akoz i annan bann landrwa, bann pti laboutik. Anfet Lanorvez bomaten mon'n koz lo Lanorvez. Lanorvez zot ti'n telman avanse avek pa servi larzan, ki zot in bezwen fer en pa an aryer, entrodwir regilasyon pour anpese ki i annan bann laboutik ki pa aksepte larzan ditou.

Akoz i ti pe kree en problem pour zot popilasyon. Donk nou, nou pe dir zis servis piblik avek bann *SOEs* me dan

larestan keksoz, bann servis prive i ava lib pour zot, pour zot fer sa ki zot anvi. Wi Gouvernman in entrodwir *POS, compulsory* pour bann sektor retail ki mon krwar i bezwen agrandi pour al dan bann lezot sektor ki vann lenz, ki vann pyes loto, bann lezot kalite laboutik akoz i ava permet *SRC* ranmas plis reveni an term *VAT*, e bann keksoz koumsa ki ankor nou ava kapab pey tou nou bann det, reenvestir dan lasante, dan ledikasyon nou pep, donn en pli bon saler.

E alor an *grosso modo* lenportans ou sa lanbisyon sa Mosyon, se pour anmenn en meyer lavi pour tou Seselwa san eksepsyon. Mersi Mr Speaker.

(APPLAUSE)

MR SPEAKER

Mersi Onorab. Mon ava apel bann Manm pour vot lo sa Mosyon. Bann ki an faver lev lanmen silvouple? Mersi. Manm ki kont? Lo Mosyon anmennen par Onorab Henrie, 22 Manm in vot pour, 0 kont e 5 Manm in *abstain*. Donk sa Mosyon in aprouve par Lasanble.

Bon i reste mwan pour remersi bann Manm pour zot partisipasyon ozordi dan en lazournen ase long. Me zot a ganny rekonforte ki sa i nou

dernyen *item* pour ozordi. Mon swet zot bonn kontinyasyon dan zot lezot travay e petet osi en bon repo, pandan *weekend*. Lasanble i ava *adjourn* e nou a zwenn Mardi prosenn 9er. *Adjourn*.

(ADJOURNMENT)